

近代中國史料叢刊續編第四十五輯  
沈雲龍主編

蒼虬閣詩

陳曾壽著

卷一——卷五

文海出版社

有限公司  
印行

近代中國史料叢刊續編第四十五輯  
沈雲龍主編

蒼虬閣詩

陳曾壽著

卷六——卷十

文海出版社  
有限公司  
印行

蒼虬閣詩集

蒼虬閣詩

陳祖五



舊序

自辛亥之變興流人類聚於滬濱吾友陳君仁先亦其一也仁先居數歲復移家杭之南湖上偷活劫燼所不能已於詩者稍多及太夷及余余與太夷所得詩激急抗烈指斥無留遺仁先悲憤與之同乃中極沈鬱而澹遠溫邃自掩其迹嘗論古昔丁亂亡之作者無拔刀亡命之氣惟陶潛韓偓次之元好問仁先格異而意度差相比所謂志深而味隱者耶嗟乎比世有仁先遂使余與太夷之詩或皆不免爲僞父則仁先之宜有不可及並可於語言文字之外落落得之矣江甯蔣蘇厂頃索

得仁先辟地十年所屬稿授之刊印爲聊寫詭語以質  
之辛酉七月陳三立

光宣之際余與蘄水陳君仁先同官京師數相從飲啖博塞爲樂時君詩已有名余未嘗治詩無由知君詩之美好也國變後余不自揆思乘時有所樹立君則懷不二之節結廬杭州西湖濱養親讀書益肆力於詩兩人蹤跡遂闊疏久之世事愈濁亂不可爲余大悔恨斂身退侍母僑上海春秋佳日游杭州必訪君湖居君或以事泣漚亦未嘗不過余也會江浙交惡君亦挈家避兵來僦屋與余鄰當是時海內耆宿雜居爲流人者猶八九輩時時遮邀過逢爲文字飲兩人者蹤跡乃復密余益愛慕君之爲人亦稍稍能讀君詩矣居歲餘君被召

赴天津 行在所爲羈旅縲紲之臣復扈從之長春蹤  
跡雖益乖隔而書疏往還不絕常郵所爲詩示余余亦  
閒有和答癸酉後義甯師移居故都余歲必一再往省  
行前輒以書要君來會旣會必出詩卷屬題字或賦詩  
識合并歲丁丑君年六十余與諸友好釀貲爲君梓蒼  
虬閣詩期以八月君誕日前集津門稱觴比六月而中  
日覺起義甯師亦憂憤發疾卒南朔兵禍經年不解無  
緣由繼見戊寅仲冬君子邦榮書來請曰大人詩劄劂  
之役幸不以亂輟行告成矣願有言也嗟乎余將何以  
稱君之詩哉當承平少壯之日幸而獲交君其時與力



足以自致於詩而惑於功利曹於持擇因循玩忽曾不  
稍厝意及其老也粗識爲詩途徑而奪之以人事之膠  
擾重之以才思之積廢卒不能闖藩籬而窺堂室視君  
蹇蹇始終持一心蘊蓄深摯淳涵清明發而爲至音絕  
詣者其慚負爲何如蓋詩之高下恆以其人性情識度  
志節爲衡而才與學猶後焉然則雖名詩人其讀君詩  
而慚負以爲不可企及如余者又豈少耶十餘年來曩  
所從游諸耆宿凋謝盡矣而變亂未知所極卽近歲相  
攜持看花時載酒聽歌窮日繼夜促坐笑語啜豆粥聞  
雞聲而歸此樂亦不知何時可復得是又余序君詩所

不能不低徊慨歎而泣然以悲者也戊寅十二月湘潭  
袁思亮

歲丁丑八月蘄水陳侍郎年政六十朋舊醪資謀刊其所爲詩曰蒼虬閣集者十卷侍郎子邦榮郵書徵序於余時海宇方苦兵夏口尤軍事重鎮嘗一夕數警居人徙去泰半余奉母蟄居小樓計無復之偶欲爲詩歌以寫其流離鬱伊之懷往往不能成章念初識侍郎此邦直辛丑媾成後朝野鉅創深痛務爲休養生息湖廣總督張文襄公號能惠工通商當是時夏口富庶聞天下侍郎故文襄高第弟子以名進士官郎曹舉大科而歸論議風采傾一時物望翕然赴之侍郎亦隱用澄清康濟自任雖篇什流播人口意弗屑也卽余亦以陸敬輿

張叔大視侍郎治經之餘間學爲五七言詩詫其輩流者未嘗出以相質今三十餘年矣誠不意曩者從容燕見之地竟淪爲烽燧矢石之場而侍郎自遭世變平生閱識偉抱力詘勢禁百不一施不得已而一託於詩余頻歲奔走南朔數得與侍郎相遇於津滬舊京之間少年意氣都盡亦惟以愁苦之辭相往復比復阻兵萬里當攬揆之辰不獲奉一觴爲壽惘惘執筆序侍郎之詩蓋有不勝其慨歎者豈天故厄侍郎之遇以昌其詩所謂豐於此而嗇於彼耶抑風雲際會自有其時不若深造自得者之無待於外耶至侍郎之詩出入玉谿冬郎

荆公山谷后山諸家以上窺陶杜志深味隱怨而不怒  
海內讀者類能言之而其精詣孤尙則又有非淺學如  
余所能測者故不贅述云新城陳祖壬

A large, empty rectangular frame with a thick black border, possibly representing a page layout or a placeholder for an image. The interior of the frame is white and contains no text or graphics.

丁丑八月伯兄六十 賜壽余以南北阻兵未克往祝  
今年夏得赴新京省兄強志弟出示晚學厂記南歸陳  
君病樹避亂過滬出所作蒼虬閣詩集序皆寓祝嘏之  
意余竟無一言豈非缺然兄幼卽喜爲詩余雖不能作  
兄詩脫稿輒寄讀之竊以爲兄詩之佳固其學古功力  
之深然自有其性情以爲質故不同於人也蓋兄之天  
性忠愛悱惻又喜交游談讌之樂沈酣日夜而不厭所  
至之處賓客滿座皆引以爲相契而無逆虞傲物之心  
其志潔而行芳故發之於詩沈思孤往醜郁淒馨讀之  
往往令人感動於中而不能自己也其喜怒哀樂困窮

鬱結既見於  
萬嶂幽秘險  
題詩數百言  
歎未曾有晦  
畫松故以蒼  
鬻畫以自活  
上於析津一  
錢盡以散之  
相聚月餘每  
尊嚴於兄弟



故舊則情益真切而深厚此其爲詩之質乎兄遇事直情逕行無所顧慮或亦不免爲人之所忌嫉蓋其貞心嫵節始終不貳其於居朝爲官趨利避害巧於迎合而擅於傾軋本非其所長徒以忠愛之固結依戀而不忍去雖以事機之叢脞艱難辭章屢進而 上之知兄最深終不聽其去也余至新京以兄之薦侍 上一月以事南歸兄意以爲愬然謂非所以答 上之恩意余亦覺未與兄弟久處引以爲憾因書此以寄其意聊以補祝兄壽或亦可爲詩集之序乎戊寅冬十一月曾則書于上海吉祥輪室



題詞

題耐叔詩

梁鼎芬

病牀展君詩散此千載憂呼號天地窄淚與江海浮細  
看有何物心血成一邱生來不示人誇我尙可儔病翁  
不宜此積悲如何收窗前作風雨似起潭底虬精思所  
造處成者鬼神愁苦語心造之萬事一浮漚我身久已  
厭於世真如疣待盡不得盡誰云死可求掩卷但太息  
詩剛笑我柔奚爲有此病肝膈煩雕鏤惜哉義熙花乃  
爲裕所幽偶然示異同相好無相尤將詩表我意冷淚

沈雙眸

奉題蒼虬閣詩卷

陳寶琛

束髮傾心簡學齋三傳晚更見倫魁性情於古差相類  
世界疑天特爲開此後風雲還幾變等閒花木有餘哀  
九京遺恨君能說霜鬢當年苦費才

敬題蒼虬侍郎詩集

周學淵

平生忍作秋花恨得句深窺病釋心我亦暮年同唱和  
沈吟八表共蕭森

文學名家過百年尙餘忠孝兩經傳可憐貫日擎天手  
剩把詩情落九邊

蒼虬閣詩卷一

乙巳至辛亥

蘄水陳曾壽仁先

乙巳二月赴湘長沙湘陰武岡爲先高祖金門公舊治  
遺愛在民至今父老猶能言之時先曾祖秋舫公官  
京朝常忽忽不樂明發之懷形諸篇什舟夜不寐感  
懷先德夢中得長歌明發篇浩歎京國年十字醒成  
之

嶽嶽我先祖慕親厭華軒清冷玉堂夢夜夜蒼梧煙長  
歌明發篇浩歎京國年耿耿永不寐四世澤未湮浮天  
屈原本浩蕩孤舟前小子來何暮落日空蒼然言采澤

下蘭還復上修門  
千春白雲望不昧  
舟夜魂

予自游焦山夢寐不能忘  
舟過岳陽雨中登樓懷望

載雨滯春檣  
登樓快明瞭  
西北稍吞天一氣  
青浩浩連洲  
芳草暗拍浪  
鳧雁矯煙出孤嶼  
明皆入千帆  
小極目天東南  
焦山影孤抱  
憶憑觀音崖  
千里收寸杪  
蜿蜒眾峯趨  
風煙四天渺  
落日鎔如金  
長波織成縹  
入世此江山  
萬古夕陽好  
蜂房各戶牖  
雲窗亂窈窕  
海西書一龕  
定慧竹千篠  
玉蘭施香嚴  
銀杏悅枯槁  
諷佛曉鐘清  
說鬼夜燈宵  
夢中自然庵  
再過僧病老  
門外浪翻江  
庭內寂無鳥  
真我悟蠅空  
塵寰觀蟻擾  
去住皆定因  
喧寂隨

所造昔賢整乾坤家常茶飯了凌江有石闌跌坐忘暮

蚤

庵前石闌彭剛直公巡江時來憑憩

武昌舟中

暫寫閒懷向水濱片時鷗鳥未相親蒼崖終古收殘照  
碧樹前宵送晚春便恐輕陰成日暮更無偏霸在風塵  
冥看正見孤飛翼一爾翻然未易馴

嘉興弔強甫

其兄明甫其夫人及其女共四柩

別院閒廊鎖暮煙尋來真到四棺前猶疑飛動生前影  
如此莊嚴死後天神鬼蒼生都是幻美人黃土自何年  
先師關先生絕筆有美人黃  
土詞三闋強甫時時誦之  
殘陽獨下扁舟去可得重

來誅此阡

何曾留得堂堂去但見陰寒觸眼來神旛劍立無風動  
佛齒金堅應手灰塵劫有心元不滅滄瀾終古可曾迴  
冤禽敢負平生志自衽冰霜沒世哀

天甯寺聽松

斜陽布滿地雷雨忽在顛仰看四次寥聲出雙松間屬  
耳倏已遠飛度萬壑泉老龍動鱗甲破碎還蒼堅金剛  
萬毫毛一一威神全仰屈尋丈地開闔成諸天落落孤  
直胸迴盪生高寒提挈四天不度入太古年想見陶隱  
居擁衣但高眠無聞茲未能且證聲音禪



秋日同李伯虞左笏卿周沈觀丈訪菊太清觀不得遂  
至龍泉寺歸過酒樓小飲周丈有詩次韻

節寒氣逾爽逸興當秋闌輕車赴晚道影墮蒼茫間當  
年亭館地今日斜陽寬靈宮訪秋菊落葉空池壇迴步  
過蕭寺著履蒼苔乾長松抗高閣雜卉迤修欄龍蛇動  
四壁贊賞生微歎壁懸翁叔平相國書文字爲小技今成空谷蘭  
厯厯鐘梵音諸天度鳳鸞地清坐忘暝茶歇神初完妙  
境如追逋胸瞥迹已殘歸車就市飲嘈切干指彈一心  
造喧寂同境殊悲歡百年非可知放懷尋所安  
游天甯寺同左笏卿丈作

驅車塵冥冥隱見孤塔圓大佛相接引一徑橫蒼煙升  
堂坐初定微風度檀栴開窗納遠秀小幅橫輞川春芳  
滿秋砌悴葉猶扶妍想見腰鼓發車馬何喧闐暫榮悟  
常寂愛此蕭境閒長廊引幽步奧複窮諸天殿古金界  
壞樹老秋陽殷何代萬石鐘橫身卧高阡出手試一擊  
龍吼殷河山煌煌乾隆碑天筆驚如椽明政移寺璫狐  
鼠多功緣真源一飄灑薰腐爲洗湔惜哉灑掃缺歲久  
生荆菅園林虛有神運化悲如環俯仰日向暮勝迹空  
流迤松風無世情謾謾吹面寒

和左笏卿丈並簡泊園丈

河伯乍驚身一蠡十度眞成九度休平生所負忽失據  
別有窺見無由求要自黃巖入韓豪更參李婉調王道  
剛柔純肆非異致望見難至風引舟先生說詩如說道  
一稊直可窮明幽根器鈍魯安足言刻鶩聊可息一邱  
涼風颯颯天忽秋疾雷破柱驚聾虬我軍出手有周侯  
閒居飽飯百不憂且從先生長隱几深堂爐香幻成紫  
定心時爲微物起

讀山谷忍持芭蕉身多負牛羊債詩句有所感用其韻  
爲十詩

村婦飼雞孫辛勤養嬰等鼯鼠潛殺機強食罪可剗感

君哺育恩肥時報一鼎爲仁旣多術殼鯨從可忍

子瞻謫惠州夜半困醪醕兒子擷園蔬宿醒解芳飴盎  
然煮風露妙絕無人知黠哉五柳翁美酒常自持

驅車赴近局卯飲日西斜歡然多笑言歸眠眩空花雲  
霞千朱門晏晏轉歲華何門寂寞宅載酒思侯芭

刀匕森在几朶頤動天驕鱗鱗魚脫淵燔炙良自招眉  
睫有不見吾聞螳捕蝸六合一大夢逐鹿迷覆蕉

爲人只爲子學道先學貧茲言聞夏峯使我汗漬巾清  
晨不努力拂枕萬感新未覺夢中夢安得身外身

我友沈休文素食如頭陀去看春寺花爭棋爛斧柯本

來妙明身忽已同山阿自君之去矣來日何其多  
栖栖劉使君閉門菜一畝散粟烏鳶集菲食童僕走與  
之从周旋了不見尾首積累愚公愚萬一山可負  
浮生何營營八荒同一邱古人足佳傳斗米良可求芻  
狗自芻狗宛轉不能休何當春草間脫身穿鼻牛  
跖腹甘人腦柴步防蟻傷道家葆嬰兒佛身施虎狼子  
莫如執中豈非釣不綱雞栖白日暮彷徨歧路羊  
學詩作黃語學道執黃戒遠輩剛制酒脫汝世俗械忍  
語小兒拳意根大本薤已矣婚宦人鋪張清淨債  
次韻治薤觀落日詩

城居日高眠奇景悞朝綺趨曹晚迴車長對西山紫一  
日復一日冥行不知止晝閱塵世容暮浴大海水甯知  
孤根悲磨旋一蟻子快倚閣東西魂歸墮鄉里我聞十  
日出大千岌崩圯爭鬪無時休中天失旖旎誰來一矢  
加燿落不可底萬象沈中宵顛倒孤枕倚披衣雞忽鳴  
蒼莽寸心裏

我昔入海天落日散奇綺碧浪噴千花六合橫一紫須  
與寒雲吞欲繫不可止使我太古心投入太古水蒼茫  
無垠悲同舟對徐子維時歲在戊銜冤去帝里回望天  
路昏真疑地維圯狡獪弄羣陰幻出千旖旎哀哉九重

圓翻作覆盆底故人就青山絕景空徒倚天風撼夢醒

惆恍十年裏

徐鶴巢同年同舟

江山第一區夕陽萬古綺雲水合空明晃漾千翠紫勝  
游憶焦山拾級絕巘止明霞開鏡奩秋漱桃花水樓臺  
擁煙鬟金碧射眸子天人紗縠裳舒卷一千里影澄孤  
塔雙波折連檣圮六朝煙雨愁一霎春旂旒欲以色幻  
真持問天眼底安得身一龕危欄寄孤倚寂攝諸界天  
永住殘照裏

盈仄拘墟言貞明有常綺下界氣空濛迴光生暮紫孤  
行青冥中風雷旋不止呼吸萬星躔如海納眾水何者

爲坤輿微塵一黑子燕蝠晨暝爭得失豈計里志士惜  
景光愚人憂覆圯悲觀感蒼涼愉玩愛旖旎庶人旦暮  
業姝暖明窗底迷陽復迷陽柴立將何倚安能造天游  
六鑿通表裏

太行何高高高塵寰失秀綺我數乘飛車側度千嶺紫聞  
君觀落日立馬井關止獨憑天下脊俯視衣帶水一綫  
走金蛇絕倒龍門子天風一徘徊迴盪九萬里纈眼射  
寒光太古雪不圯雲幻三兩峯全晉作旖旎禹力不到  
處金輪下無底春寒凍不出瑟縮西窗倚突兀世界觀  
求君五字裏



感春四首次昌黎韻

春之來兮自何所雪澌冰泮兮悲故處眾人熙熙登春  
臺我欲從之意忽阻今我不樂誦書史其骨已朽空自  
語驕氣滯志何益身漫擲幽憂付來許

我聞先聖感春時遲遲白日心傷悲我巢漂搖苦風雨  
綢繆一綱振天維深衣玉几式憂患簾外萬息潛相吹  
天人當春悄懷抱下土蠢蠢疇知之蓬門小女貯薄怨  
春風入幕輕猜疑蜂顛蝶舞絮撩亂含意凝睇羞陳詞  
蕩蕩青天那可問屈葬魚腹陶沈醮江花惱人訴不得  
杜鵑啼血成冤癡仙凡貴賤勢殊絕心煩意亂知無宜

初蘭經年香氣滅忍此縣邈當語誰

晨興不能食夜思不能卧役役形空勞忽忽志潛惰江  
湖入懷新鄉井合眼墮一醉三年留投轄真無奈

挂冠神武猗何人洗耳松風拂龍鱗不知有冬漫春夏  
了無榮悴空喜嗔我今何爲在塵世看花對酒長憂貧  
長安市兒弄狡獪變化往往能通神仙人長爪雙鬢雪  
彈指東海三揚塵嗟哉吾黨二三子呻吟蛩駘還相親  
清晨坐起天氣白下照萬木濃光新不須停盃轉爛漫  
隱几一夢山中春

甲辰歲日本觀油畫庚子之役感近事作

我昔東游何所睹山川步步傷甲午忽觀壁畫使我驚  
身入庚子天津城干霄烽火飛霹靂合圍虜騎紛縱橫  
殘軍一旅據水次鼓聲已死猶力爭大旗紅折驚颺斜  
半殘馬字飄塵沙頽垣下照白日淡妖紅一丈龍船花  
神傷魄動愁逼視太息沙場生尺咫却歸故國弔遺墟  
不見煙塵雙闕起天崩地圻無由逃其雨杲杲寒霾消  
誰翻殘局作勝勢氣盈脈僨酣醲醪水晶之宮何岿巖  
五侯甲第爭相高龍武新軍氣矜豪劫人黑夜胡國刀  
河伯汪洋輕海若大人游戲連羣鼈寸地尺田樹荆棘  
中央四角酬天驕不聞韶州遣使祭誰當社飯長攀號

挂冠汲黯留不得吞聲杜老空悲騷出辱下殿那可再  
坐撫往事憂心切雲愁海思無斷絕五陵石馬風蕭蕭  
游仙

湘娥啼血斑竹枯仙人遊戲耽蓬壺三山媧皇補天餘  
春愉秋怨世則無綽約仙子多敷腴中有一人獨清癯  
千門萬戶無空虛何年再見青鸞孤臣朔偷入駭睢盱  
修廊濃花照明湖松篁萬籟真笙竽舞殿閒煞紅氍毹  
忽走一殿慘不舒白日下照空四隅當階設几香爇鑪  
絳帷朱瑣網蜘蛛天降玉棺遺雙蚨清供無人付花奴  
却轉後院蒼苔蕪金風瑟瑟摧清梧監者謂此鳳所廬

舊障紅牆今始除團扇不怨秋風疏銀河咫尺千里迂  
雜花破紅鳥相呼獨非我春親道書偶戲赤水雙明珠  
胭脂澆井紅模糊瀛海晶瑩不可桴日聞斲冰進飛魚  
九洲采藥羣靈趨丹成忽墮龍髯鬚朔聞此言驚且吁  
歷三千年神不娛影眸淒景無由驅魂夢不敢朝華胥  
仙官笑謂子何愚海水清淺曾斯須向來清怨鍾上都  
日墮月蝕真區區仙家哀樂與世殊玉女司冊連環如  
不見王母今迴車

朔風

金戈鐵馬氣如虎愁聽北窗風撼沙不見白衣且高卧

兩三黃菊義熙花

七月初四日夜直時復園寥志正游焦山雜憶山中諸

勝小詩寄之

擾擾爭窠蜂世界勞勞旋磨蟻生涯憑誰更問山中事

玉樹無心幾度花

定慧寺空  
心玉蘭

夜檻憑江萬象冥崩雷忽遣睡龍驚  
鸢輪馳過久無影

纔有潮迴浪打聲

自然庵  
夜坐

江天漠漠化空煙半榻容身真自閒  
咫尺不知帆在水

百年安得雨藏山

松寥閣  
坐雨

背負明霞葉葉舟  
鞞文萬頃夕風柔  
閒看落日平生事

不待山僧更苦留

觀音崖  
觀落照

駭耳滔滔萬派東百年驚浪壓孤蓬  
何時栖息焦山去  
卧看斜陽自打鐘

落花

早將零落付微塵不耐當前恨  
又新長歲祇供三日賞  
殘盃甯洗一春貧  
寥空厯厯風輪轉  
白日昭昭色相眞  
客去花飛終有極  
眼穿腸斷可無人

贈劉樸生丈

丈人天機精守駿用其跛行李地一周  
嚴身無侍嫖去  
歲江淮饑急難蛾赴火願了卧僧庵  
清夢一月可病中

自觀身返照跏趺坐江海晚喧囂避地隱青瑣不見疑  
天人既見忘爾我行脚欲無毛頗謂參淨果我來分蒲  
團衡門常反鎖

再贈樸丈

蕭然行脚四天下不見白頭僧卧庵老傍君門心暫住  
晨澆花木興猶酣南榮罔罔何來眾孔叟栖栖未去貪  
似此誰能忍終古一經燈火寫孤龕

閱兩浙輶軒錄載紹興張岱事岱字宗子累世通顯服  
食豪侈家蓄梨園數部日與諸勝流度曲徵歌及間  
以古學挑之則自四部七略以至唐宋說家薈萃瑣



屑之書靡不賅悉嘗自謂少壯穠華恍如夢境耳因有感于李猛尸丈之爲人率賦一律寄贈

風流昭代張宗子寂寞當年丁令威少日穠華真一夢  
重來景物已全非春明小結城南禊秋晚仍旋漢上磯  
公去更無生事好閉門風雨獨思歸

恭輓

德宗景皇帝用李商隱昭肅皇帝輓詩韻

恭默殷高后開明魏孝文殷憂從沒世多難啟吾君  
待蓄三年艾旋停八表雲茹哀占復始儻見鼎來汾  
萬國歸心久蒼皇一舉烽秦山愁駐馬遼海喜歸龍欲

待悲風木翻成應洛鐘 天家殉慈孝辛苦啟雙封  
漢社英靈在 宸謀運幹神執樞真有託移筭竟無人  
九譯哀何切千秋恨尙新小臣無以報空溼景山塵  
渭漁三兄殤女感寄

去年我失女涼秋生炎曦歸家見我姪面貌驚如伊長  
女錯識妹喜極但索歸我亦多抱持相對何依依安知  
歲一周地下真相隨遙想瓢飲人雙涕還一垂書來使  
我咤寄字聊相悲

送魏剛長之官滇南

劍叟蒲團夢未回九衢車馬殷成雷魏南劉北天萬里

長晝斷無剝啄來

桐城方劍華先生邃于易即潛數十  
年劉樸生丈與剛長時溫燂之時樸

丈隨使

俄羅斯

夢莘田出詩一卷皆詠梅花也因倩松厂畫梅寄莘田  
月落香寒罷楚辭夢魂忽與故人期不言塵海三年別  
先讀梅花一卷詩何遜揚州微醉後杜陵人日斷腸時  
欲憑驛使傳消息更倩花光寫一枝

題江杏村前輩梅陽歸養圖

繩絕從知處沈吟竟至今孤臣盈篋淚 先帝十年心  
去國殘春黯藏山愛日深無由見高躅佇立望輕陰

寄莘田

無復心情羨暮鴉晚菘陳酒共年華故人天末如相夢  
秋雨荒園種菊花

林四季鴻幽居善病養菊佳種甲都下花時予必往觀  
君以病不能多言默對而已然君少年時風情適上  
工奕曲以至琴笛琵琶之屬靡不精妙酒間諸鞠部  
子弟環侍問業君爲之正拍訂誤通夕不倦自喪偶  
蕭然獨處終歲不出戶庭今年正月竟以肺疾死感  
念不已爲賦此詩

年年秋色君家好一度相看一歲除從此菊開誰作主  
他時花下渺愁予妻孥和靖微相似棋曲東坡二不如

結習空時了無病暗塵隨意點精廬

夢強甫

死別吞聲意已灰夢中驚起尙疑猜紙窗未白殘燈盡  
譙鼓初沈朔雁來語不分明宗國事意何悽愴百年哀  
披衣瞑坐存飄瞥相望人天記此回

齋中紅梅水仙山茶瑞香海棠牡丹玉蘭盛開

山谷謫荊州復入都下夢

山谷與李端叔帖數日來驟暖瑞香水仙紅梅皆開明窗

靜室花氣撩人如少年都下夢也

小窗逢春暄撩人花氣重今我住夢

中風味略相共園丁擔花來一笑分薄俸火速三春妍  
併作斗室供隔年水仙梅貞秀出冰凍多香不相襲并

妙難伯仲安居蝨清時視涪得孰眾幾得如許閒清坐了賓送

雞鳴懷樸生丈及四弟

雞鳴一何悲眾生不同曉誰能脫悲歡鞭心悔不早卓哉寶應翁天眼夜常瞭不樂長安居徒步仁餓殍呼我與之俱穿鼻嗟服阜子季涉憂患同行賴挈保栖皇無定居何由訊安好

題梅道人畫松

昔我病中展此畫捕逐真氣歸羸形畫師精神貫千載意想至人無窮齡四松鱗爪互隱見蒼鍼不動風泠泠

倒盤老藤挂日月苔厚如鐵鴻濛青千巖萬壑氣奔赴  
空際負運愁六丁龍蛇啟蟄破戶牖雷雨在內無由扃  
雲開六合忽清朗卷藏深密海入瓶平生世物不挂眼  
獨與此畫通精靈苦修堅固無解脫安得慧刃磨天刃  
種菊同苔雪治薌作

五載長安居真作長安人移家城西隅喜與二子鄰秋  
來種佳菊次第評芳新一秋無雜言花事徒津津懷歸  
不得歸貧仕祇益貧得意疏籬間味比盃中醇

晨光發奇姿晶日起我早皎皎玉盤盂亭亭眾芳表九  
幽鬱潔意風露白清曉沈冥亦有秋冷士豈枯槁誰懷

汲汲志既晚無用好真意不相違棄捐何足道

靈均賦秋菊終古以爲期采采見南山淡磊淵明詩沈吟二子作古逸影燈帷開門汲井闌雪厚白玉墀積陰竟滔天草木其能違但解菊中趣虛白原芳菲

皇天賦我知平居動心魂寒灰一念在耿耿不能髡朝北暮天池何物爲鵬鷗故園一籬秋夜夢常溫溫物候萬不齊何由訊寒暄琤然一葉脫若減寥天痕歸墟不早計感此大化奔安能荷鴉嘴退息南山根

春花態多方維菊實兼之吐納九秋精變化絕思惟衣白與衣黃灑落天人姿入道初洗紅蓮娟青蛾眉續紛



天女花微笑難通辭亦現莊嚴身獅象千威儀頗疑造物巧意欲窮般倖得非騷賦魂搏化爲此奇世人立名字與俗同妍媸心省不能言此妙無人知

瑩骨醒寒寐竹雪明照窗微風振琅玕掩冉久難降親鑪煖宿茗犯冰澗寒缸冬嚴入秋花清絕不可雙坐覺蕭寥心斂定還在腔有弟尺書來計程發龍江皚皚雪黏天四極絕吠厖遙知予季念楚夢暗蘭芷孤芳此相待佇聽幽徑蹇

凝陰齊憂端六合同凜冽冰鋒入餅樽却此霜下傑虛壁熒四照孤几心光結豈關護養殊盡性爲奇節采露

老生詩集卷一  
三  
憶芳晨裊袖香未滅微茫履時心隨序驚飄瞥萬物有  
成毀願續須臾絕號木晚未休催年亦何切

十二日請急回武昌

春夢不知白日去歸來惟見樹參天無多涕淚酬親舊  
絕少情懷對酒筵一代衣冠賓畢獻百年心事月初弦  
征途自衽冰霜重炊黍勞薪敢自憐

車過武勝關雪中購得蘭數本

車行楚豫交蜿蜒入山腹矯首望雄關勢絕天地感一  
脊界江河向背異寒燠雪峯襲雲衣漠漠煙生玉濤凝  
疊嶂松翠壓一澗竹崢嶸幻冰花僵踣慨眾木野人市

修蘭倉卒得一束堅冰塞兩儀芳馨遺此獨嗟爾幽谷  
姿何緣附馳轂且恐騷魂蘇因之酌醞醪

同茗雪游慈仁寺看雙松

雙松足壯帝京色可惜看松人已無天上孤雲長獨往  
域中奇氣此能圖翻風動日僵龍起屈鐵迴枝衲臂枯

暫洗塵沙一趺坐沈泉悽愴上甕餽

時張文襄  
公新逝

瑩甫寓中有蓼花一枝屬賦

春花適游觀秋花適獨坐徐子官如僧孤集一蓼可裊  
裊輕紅花偏後江湖墮夜雨孤榻懸歸夢常自柁  
幾輔先哲祠看海棠

北賢祠中海棠花生小隔鄰今始見出簷十丈花光紅  
城南狂蜂喧一院坐覺白日生清輝碧草萋萋亦何淡  
來遲賞暫懶幽尋花發春歸獨憑歎風雨來朝未可知  
漫嗟重見隔年期不惜濺紅供晚景但愁潛夜葬胭脂  
法源寺看丁香

清陰淡日轉空廊坐久曾無蜂蝶忙真實不虛花滿地  
殘春來看白丁香

四月十五日田伏侯同年約崇效寺看牡丹予晨往主  
客皆未集次日晤李猛厂文言是日到最後席散客  
已盡矣獨坐成詠因憶昔與半塘老人來游恰亦四

月十五日感懷三首予因和之

侵晨看花去落紅猶未埽晨光在松顛奚童怪我早幾  
叢昨夜開遲過風天好初香未分蜂正色持窈窕睡足  
出嚴妝午韻不如曉坐久三四移露逼衣裳少有酒斟  
酌之不待盃盤繞興盡遂言歸清景付啼鳥

不惜便歸去輕與來歲期昔年當花時踴躍猶悔遲花  
開到花落惟悴傷春詞如今異哀樂開謝了不疑未見  
怯爛漫既見去若遺隨緣徇物我過眼酬芳姿人笑看  
花勤痼慵中心脾此寺曾幾來歲歲改情思思之還淚  
落亦不知何悲

遲到義州翁靜院空游人夕陽正嬌花藤杖久逡巡芳  
菲看欲歇獨念平生親頭白今再來廿載隨颺塵黯黯  
風雨思奪此一笑春戢影忘世間暫出觸光新作詩寄  
餘慨悽惻同沾巾

戒壇卧龍松歌

戒壇之松天下奇尋常所見皆十圍一松據臺獨下垂  
橫出十丈猶躡蹠健鵬探爪風在下渴蛟飲澗鱗之而  
繩幽欲引陰蟄出承欹力負蒼崖危萬鈞壓空不危殆  
反走潛根疑過倍凍雨洗幹未濡足眼底渾河犯高墪  
雲開穿枝落日黃萬里暮色浮孤觴欲憑咫尺精靈意

貫入冥搜百怪腸

游戒壇寺

落日策蹇蒼山中過雨澗谷香蒙籠  
千盤萬轉不見寺  
劃然斗絕開神宮入門趨殿猶里許  
廣臺千步高連穹  
憑崖下視轉空闊來處鑿削皆平庸  
未窮山深見山骨  
磊砢稱意數十松惜哉神物一先化  
蟠際冥漠無由蹤  
活動松  
已死 蚪髯海客席廡下靈液正滿  
玻璃鍾山僧導宿  
啟肩鑰院幽石古深房  
權牡丹連叢堆碧葉想見如斗  
春花紅清晨躋攀縱眺望帝畿  
一線呈織洪俄然足底  
盪雲海石闌以外空濛濛  
天低殿角忽浮動回頭陡失

青芙蓉恭瞻天下第一壇收納萬象如朝宗智名勇功  
無堅固獨以戒力擔無窮一心直貫無量劫我來贊歎

如螟螣彼法有人知何晚于此驚倒南皮翁

張文襄公戒壇詩彼

法有人知何晚善  
踞靈奇爲栖止

後有來者別開逕不知天外藏何峯

嗟子塵土紛世念一夕暫洗清涼風去囂憩寂終不得

夜夢鄉井還忡忡傳聞巖顛有穴處髻年早識千緣空

雲深路絕窘初步雖有寒拾何能逢

時有童子出家極樂洞欲訪之而未

果

貽先弟見予戒壇松詩遂夢至戒壇見松高數丈濤聲

如雷驚寤寄書相告并感懷四首走筆和之



我昔游戒壇三日坐松陰磊落入心骨哦詩作龍吟寄  
詩感予季夢入蒼山深琳宮宅奧幽壇宇何蕭森問松  
在何處突兀生千尋驚疑忽然寤震耳猶潮音年來涉  
憂患浩蕩欲無得震動得良止坐卧薜蘿林松聲薄九  
天若慰千憂沈子止無復疑我行歸何岑

張文襄公輓詩

正笏回天手清流實地人朝年恢大略末命瘁孤臣時  
至堂堂去憂來種種新老成遺脈斷甯止淚沾巾  
事大謀能定機沈見若遲濟時新貫舊沃主孝兼慈宇  
泰陰凝日心寒痛定時彌留天下計繼座孰愆期

陶齋尙書作東坡生日宴集同人節  
師會張文襄公之葬亦來京師

東坡千載人忠義秉孤尙幼齊孟博賢長接韓富行嗟  
晚來京師流涕范公葬登進無他途召對何直伉知人  
先帝明欲語聲已放金蓮送夜歸步步增悽愴身後萬  
口傳生前一篋謗千秋幾丙子此紀獨難忘好古今陶  
公異代同高曠張筵拜公辰設像酬眾仰萬金刊七集  
朱本陳新樣齊翰剔耳圖古趣不可狀入座多詩人老  
輩留三兩妙蹟影西樓禮罷一一餉有帶腰弗勝遙情  
寄孤唱吾師海南來久病喜無恙君劾我休官二老笑

相向三年逢都門未見倒瓶釀昔奔 兩宮喪一宿翻  
然颺平生抱冰翁咫尺不相訪再見已爲棺三過遂營  
壙勞勞萬端憂償此一日暢願少留斯須杯行勿辭讓  
晚景最可惜坡語真無誑

武昌洪山茶臺色紫與他處異移植色味俱變蓋吾鄉  
蔬菜之冠居北地久思之甚適家中寄至欣然作詩  
霜蔬首菜臺最良爲楚產紫玉黃金花入齒冰霜軟腴  
壓芥孫肥脆勝菘心晚薦食冬歷春三月忘鮓嚮產地  
專洪山色味遠輒換物性不可移靈區若有限山陰梅  
花村年年破徑蘚歸路買盈筐離土喜新剪春盤對花

開有酒常引滿夜夢墮南天一塔千尋遠六年不知歸  
舉箸世味淺高堂念游子殷勤致京輦一束同兼金森  
森翠映盃不獨面故人江山秀在眼鄭重貽友生破慳  
佐一飯縱啖仍問餘莖甲無汰檢嗟予圖果腹對此腸  
空轉作詩且嘗新如見蔥寸斷

和渭漁三兄詠草木詩

杜老所居地必有數竿竹我生如泛梗還同此心曲新  
居種百竿日夜鳴寒玉聳雪雖便娟戰風終損威過春  
葉猶黃深夏叢始綠懸知蒼碧時已值涼風復晚出及  
蕭晨得時慚眾目瘦節終不展來序若相逐雪霜復何

辭俯仰隨轉軸

前過古冥阨野人贈修蘭孤懷冰雪中忽化青琅玕新  
采帶山氣美箭方叢攢自攜京國來漸覺青痕乾因訪  
種蘭人得知護養難中虛防溼根餘地容舒蟠多叢喜  
并植如結君子歡一一順其性稍稍迴初觀終然異山  
谷半開旋凋殘心香或時斂蒂露不常溥不知氣候迕  
但責人工完生意茲可知何不求所安

贈密丹堦

密公奇氣誰相肖四大天門萬疊山獨起承當忠孝事  
游行出入死生關憂端瀕洞今猶昔頭上崢嶸去不還

如此英靈好身手一尊江上老醜顏

復園以詩寫贈次韻

同居類木石異處有餘思所思觸一感竊然寄新詩師  
門剩子存孤轡羈天馳挹子一念定拯予千步危意得  
偶成詠高下皆宜之澄宇發天光一洗漆室悲水流復  
何心激盪生環規俯仰受風篁泠泠瓊琚辭犁然忘官  
商何地評妍媸嗟予徇聲聞曉曉佛所嗤清風能起予  
象外契微知

和人詠松二首

孤松

萬雪一東道雄擔嗟爾能枯心生世界寒色起鋒棱絕  
谷空無待彌天氣若憑風來助嗚咽無淚洗峻嶒

疏松

堅瘦入松骨疏疏天色中何心動鱗甲無力補秋空葉  
勁風猶滿翎寒鶴未豐冷筇久孤倚寥闊思何窮

八月乘車夜過黃河橋甫築成明燈綿互無際洵奇觀  
也

飛車度險出重扃箭激洪河挾怒霆萬點華鐙照秋水  
一行靈鵲化明星橫身與世爲津渡孤派隨天入杳冥  
地縮山河空險阻朝來應見太行青

夢中作

萬草千花點綴新  
翩翻長曳地衣塵  
却嫌重累難勝舞  
笑把春衣借與人

辛亥八月十一日生日感賦

七年留滯卧修門  
一夕秋風醒夢魂  
事與生來知未了  
吾先我喪欲何存  
孤蹤骯髒天方厭  
萬影淒涼月不溫  
隔歲風光驚似昨  
重看愁對菊花樽

徒負生平友與師  
心慚地下儻能知  
積愁自笑蜉蝣世  
逐序空吟草木詩  
四海驚塵多難日  
百年清夜獨醒時  
勞生世味捐都盡  
腐鼠相猜更不辭



辛亥八月二十五日舟過黃州

鼓角聲中幾度過夕陽如夢舊山河再來更覺西山好  
只是青隨淚眼多

滬上別莘田

百年墟莽三綱死開闔不知日月明猶有壺觴存故意  
無多情話聞平生兵戈滿地驚魂散風雪殘年盡室行  
無計留君無可去相看惟有淚縱橫



蒼虬閣詩卷二

王子至丁巳四月

蘄水陳曾壽仁先

詠懷

王子

哀哉道喪世消息疇知之母子一念忍機發傾天維決  
流沒一日鱗鱗魚頭悲有鳥名姑惡哀哀三月時廣室  
無空虛再摘蔓離離黃美不在裳媧羿相推移有物何  
不仁芻狗天地爲蜉蝣旦夕死見曉何由期

翳翳園中桑過夏無人采夕陽黯平蕪輕篔將何待春  
陽二三月游女如雲夥苔花上鴛機毛羽生光彩願君  
勿縑絲絲膠固難解質滅會有時性結終不改

春郊靄微雨韋侯詩句中菜花燦新黃楊柳碧叢叢出  
門二月半節候驚沖融北地易南天誕漫難爲同跼蹐  
自跼蹐優容自優容穹廬覆下怨夢瘞春花紅

擔荷不可弛規然理人事曉憎盤中蠅暮慄堅冰至風  
花徇時妍露草染春思芸芸各有託惕惕獨失次讀易  
絕韋編不減憂患字

曉發車殷牀皎皎春愁曙舊愛痲子心十載夢中住初  
日上金莖春殿從容賦宮粉倏飄零匍匐天縞素連騎  
蕭寺花剪燭故人寓城西有故居交香幾叢樹淚眼竭  
修河望將漢月去粥窗亂村雞欲語不得訴

曉來微雨過木潤園氣清新綠低柔枝好鳥時一鳴眾  
生欣適候盎然生意盈豈忘飄搖期媚茲旦暮情得時  
暫亦足潛然感吾生

眾鳥何啁啾相羣非一朝所託非惡陰翔集亦相調鶯  
老微惜春鳩鳴使芳銷高翎志遠壑眾翼營棲條颺風  
捲地至倏忽寒煙飄事與終古息慘共濡濡焦春溪夢  
故影故故啼殘宵

今夕復何夕辰良天氣佳比戶旗翩翻鎧火明長街主  
人設廣筵濃笑紅玫瑰獨立揚清歌歌聲何徘徊似言  
三山外浮出金銀臺潭潭千春樂園住玻璃杯我無伎

求念百憂忽乘懷嗟我紀歲時笑顏無由開社飯罷春  
明寒食傷焚骸纏筒五色絲徒餌沈湘哀

五月二十六日為美利堅

人獨立  
紀念日

周易著通變老氏慎明愚大哉文武道張弛在我孤山  
川有崩決寒暑有愆踰物變極繁蕪造化難為樞任覺  
伊何人終始煩馳驅早取新法新晚同迂叟迂毀既有  
不辭譽亦有不虞九原如可作精爽徒悲吁

孤燈耿長夜暗雨流庭柯蟲鳴復唧唧四壁驚秋多開  
卷若相慰往往言同科但惜我生晚不得同山阿古人  
日以遠義馭忽蹉跎雞蠅了無辨問夜當如何

白梅

不復微頰上玉肌也無清淚化胭脂空山淡薄收拾住  
便了酬春無限思

謁節厂師不遇感賦一首

烈士甘徇名貪夫則徇財不謂俊及流兼妙然蠡才寥  
翔忽下集洽狎鷗無猜烈烈貞婦操高築懷清臺古疾  
未有此豈日非怪災儒服捐一恥維絕驚天摧淒其衡  
門下商歌出荒萊曲肱無一飽吐食盈瓊瑰茫然羣刺  
天飢鳳孤徘徊天寒竹實盡淒我千春懷

江陵戴烈婦詩

人生孰無死一死扶三綱天地將欲閉見此麟鳳祥江  
陵張氏女殉夫何從容絕命遺兄書辭義嚴秋霜上言  
秋君死苴義當隨行一時苟怯死萬日恨之長非謂無  
舅姑非謂無弟兄非謂無女兒所重沒世名童年母見  
背及笄丁父喪今夏痛子天今復降此凶今隨秋君行  
天帝在我旁下言女假巧乳少今無孃長成多讀書於  
兄終不忘是歲庚戌冬張子旅上京哭妹感噩夢晨寤  
大愕驚忽忽淚承頰容貌爲變更同人方慰薦夢幻故  
荒唐翻然一紙書開視刀劍傷事真乃非夢失聲去堂  
堂張子赴喪歸嗚咽陳始終烈女適戴君字沅名苴衡



少小明詩書事夫何溫良秋君苦鑽仰痼疾已在牀形  
影非一朝至性知其剛立後答婦恩預託諸母行諸母  
夙敬愛聞言重兢兢烈女喻指意笑謂非所望爲甯諸  
母心絮述自處方反面謝秋君自保寬胸腸肺腑不能  
語醫言詎無誑爲君撫巧兒何忍自賊戕女伴或來視  
酬對逾尋常收檢及瑣瑣假貸咸歸償父兄有手札一  
一奉姊藏一朝望斷絕不見憂迫容膏沐進新衣還進  
餅與湯秋君氣僅屬有語目微張似詰眾不救聽者莫  
能詳烈女面大赤眾意親鑪錡旋遣婢媪去有聲發內  
廂羣疑乃反視解救驚不遑方知進食意仰藥犯所妨

猶懼不速發閉戶傾餘漿先時有劉媪助殮人稱揚生前戲相託倉卒忽來傍玉貌加生時啟手見新創何時眾未覺割臂曾作羹千曲達一直十日辟精誠爭仁淬智勇匪人能周防一念遂萬年合葬龍山陽張子徵文辭冀以傳芬芳哀哉道喪世禍有滔天狂周公不爲公莊姜不爲莊國變覩視息泚筆汗我裳前年急鄂難張子獨相將孰云共患難誼乃同死生頽然偉丈夫哭妹涕浪浪三年負一諾寤寐叢彷徨清晨天宇肅高風正寥翔我仁日月至志氣當清明發憤爲此詩一髮爭微茫

壬子二月同恪士梅庵至西湖寓劉氏花園

淡澗青冥裏湖山正寂然十年藏我夢孤影入鐘天步  
冷溪橋舊心蘇釣石前一椽聊可借橫榻晚梅邊

竹樹深深地天留聽雨聲山藏餘塔淡陰迥逼花明點  
滴無春思飄搖損客情道人寒不睡煮茗話深更

小立真忘世栖遲荒徑苔嵐光壓新柳鶯語及殘梅二  
月春猶靜微陽晚暫開臨流商去住何日更重來

聞日本乃木大將殉日皇事感賦

將軍死所勝沙場凜凜君臣義不忘早識大倫捐二子  
晚標奇節報先皇飛騰灑落千秋思忠孝堅貞一室芳

亡國孤纍驚破柱傷心無面讚堂堂

紀夢中所見

疏陰一徑竹交加竹下修蘭繞徑斜竹露潺潺如過雨  
素心初放兩三花

曉晴偶作

故人書卷暖生涯猶勝巢泥處處家遠寺分鐘侵客枕  
曉寒連海凍瓶花澆腸茗澀宵棕在明眼窗晴日計賒  
芳草欲萋春夢斷倚牀空殷九衢車

斷夢

斷夢敲窗雨未收暗涼驚起小堂幽雞鳴未盡多生淚

蟲語爭分一夜秋據槁尙餘殘樹影解紛無復舊蚊幃  
乘除萬念微燈裏驀地聞鐘不自由

以舊京菊種移至海上寄養鄰圃

下斜街口擔秋霞崇福山腰老圃家海上羈魂斷鄉國  
一畦寒守義熙花

雲物

雲物蕭寥極野陰黯然天地入行吟秋衣野水閒鳧夢  
瘦杖寒山落葉心迷望鄉愁孤塔起流空杵力暮鐘沈  
霜明一角秋如許貯雨籬花恨不禁

零落

零落桃花雨不知  
滴階清怨一絲絲  
小樓殘月通明夜  
無復褰簾一笑時

題劉幼雲先生潛廬讀書圖

我皇卽位初輔導  
資賢王進賢宰相事  
首舉講官良妙選  
十二輩劉侯何印印  
燕坐抱冰翁獨許  
侯文章深心紀網地  
諷議迴肝腸稱歎不去口  
手撫霜髯長哀哉元祐政  
朝露事不常陰王遂漸進  
羣兒攬天綱張公起抗爭  
嘔血去堂堂啁啾見孤鳳  
百憂瘖一吭處人骨肉間  
苦口非激揚至誠無不動  
乍起旋迷盲我時數周旋  
相對憂旁皇但言臣力竭  
無藥回膏肓天地猝翻覆  
流言

破斧斨掩袂出國門無狀徒自傷終始義不負此志日  
月光幽幽東海廬讀書穴匡牀龍潛自成德天意方微  
茫披圖感往事北望涕浪浪

至鄰圃視寄養菊花已出蓓蕾喜賦

京華幾年居所得是佳菊九秋歷三冬閉門看不足去  
年急鄂難花開不及矚出門星在天滿地霜華肅脫命  
息海隅稍稍生事復渡海移故根殘書共一束灌養寄  
老圃憔悴不盈掬別畦何歲蕤哀此一寸綠旬月未經  
過蓓蕾忽紛簇彭澤招我魂粲然秋在目乃知一息存  
生理絕可續天平一物慈長得依草木

述菊

滄海沒沈冤悲壯成歎息腐草分自灰何力回蕭瑟永  
畏世笑嗤淒其望彭澤槁木黯無絃蕭寥天宇寂幸餘  
霜下花永此一朝夕

黃農雖云沒秋菊不惜情終風窮簷底一枝表孤清零  
露不成滴我思忽已盈彭澤去已久知復爲誰生

桃李何芬芳百繞至日斜退之善春懷所以紛歎嗟老  
盆空階上羅列盈霜葩徘徊盡日影苦意相周遮庭木  
晚蕭蕭疏厯共生涯人生若無情何事慚其花

燦燦黃金姿高張楚芳色昔年薦秋筵四座動嘉客對



之不敢燕重是鹽梅列及今共蕭晨歲蕤還皎潔對酒  
忽悽愴回念中腸結

物外有日月得意爲我辰閉門自成世此花宜賤貧  
靄天中暉孤雲難爲鄰逝止有殊勢浮世多苦辛山川  
自悠遠風露以爲因

秋盡懷抱空燈殘耿疏影瀟瀟風雨夕相對生淒警襲  
露非一秋拒霜未俄頃相酬無後期留命有餘哽性違  
氣候殊根損支離甚護此寸意芳便恐殘年靜

十一月二十六日同君亮表侄展外祖墓謹賦

岡陵畢遠神猶接雲水重來世已新海闊天空一坏土

外祖遺言有我此時  
已海闊天空之語

夙興夜寐廿年身驚風飄蕩鸞凰

族上帝畸零蟻蝨臣寸燭寒香回暝色木蘭殘雪尙嶙

峴

福孫表兄以心疾居山寺中屏妻子不茶不飯身備諸

苦往視談竟夕別去途中感賦

荒寺翼峯尖到門日已隕寒犬出吠客相見驚且哀忍  
述別後事但問眠食佳結構依崖根厨竈分隅隈皚皚  
雪爭席屋漏漸若篩訣絕妻子恩甘此冰霜埋浮生艷  
不滅勸我致敬齋我聞十種仙終竟傷歧乖矧茲幽痲  
疾恟恍證奇佺還恐泡幻影起滅明鏡臺煮粥進園蔬

意厚難相陪，擁鑪夜不煖。語寂淒風來，亂離幸一合。繼見何由諧，天明下山去。咽淚酸心懷。

贈散原先生

百年容繼見，一代數公存。孤酌迴天紀，微吟狎海喧。支離非世質，耿介是騷魂。還作微蟲螫，尊前許細論。

被酒晝眠夢，在西山戒壇寺中得松翻急雨未全龍之句醒成之

憶宿西山最上重琳宮，高下占諸峯。銀鐺夜度臺廊迥，犖确晨披草木濃。殿裏烏雲猶聳日，松翻急雨未全龍。舊游歷歷成殘夢，剩拾山門一杵鐘。

聞寄禪上人怛化口占一絕

脫鼻春牛卧不知白桃片片雨中吹  
初年功課輕干劫浮玉撞鐘又一時

哭劉松厂

惘惘有不甘人生極苦相世緣所縛繫  
窘若鮮在盎儻有脫鼻時哀哉此屬續  
避地逃空虛憂來輒知向煩窳徹毛裏  
山川不能障名賓何與天分寸未借讓  
繪事三十年未極志所尙年來逢亂離  
杜門尤怏怏我歸當去冬強步猶過訪  
神形已支離憤世氣逾佞畫師多享年  
冀接湯戴行世短數亦奇意氣隨斂葬  
寂寞身後事酬

君涕一放

婉變相因依都門火三改忘形有傳徐晨夕過從每義

州今眉州

李文石丈

談藝空千載南北與中央尊酒極瀟灑

看花過僧庵吹帽坐磊嵬小園風露夕得意東籬采天地非昔秋江海遺根在哀哉祀與輿竟作龔與隗好花留歲月君何不相待

勞生共行役邂逅豈偶然疇昔同江舟佳處多流連初秋白下柳落日莫愁煙秦淮值髯叟

洪子東丈

一笑紅燈前

焦山市旬宿魂夢清欲仙愛髯夜語長恨子貪早眠旋去客姑蘇逃寂滄浪園樹石鬱深深並影棲一椽微雪

映窗光紀游寫長箋我時不自揆一一勝詩篇前年走  
兵間渡海隨播遷草草厯下游湖樓愛魚鮮京國許子  
廬對榻雙眉闕朗哦遺山詩曉夢入淒酸事迂或變色  
意迷迫憂煎當時咤怪迂回思盡成妍逝者不可作誰  
聽誰爲傳

哀哀五十慕頭白反哺烏素衣見京華匍匐已需扶局

傭黽長晝

時松厂充圖書局畫師

夜夢還兒初昔昔起浩歎淚墨

追爲圖老屋三兩間花樹圍扶疏微聞太息聲入視驚  
顏癯温温誠慰罷命取架間書屏息待趨承喔喔啼階  
除入懷白日光天地忽已孤又夢陟高峯環海如蓬壺

飄飄吹袂過慈杖遙相呼魂悸俄魄動恍然墮牀鋪性  
感非一境見者猶欲獻地下今相遇訴淚當何如松廠時  
夢見其太夫人因  
繪圖以紀其事

與世微異尙幾希在人禽衡門踵屢決可託千黃金嗟  
我漢陽師吾子所溫煇懷賢述舊事往往涕沾襟聞子  
易簀時微噉素衣衾得正可以斲堂堂本朝心舉世  
烏擇栖微木銜已沈奪我哭國淚哭子子所歆

子生亂未已子沒亂方滋迢迢老憂間積瘁終南齊孤  
舟蜀山川耳順子規啼飢驅轉北南呻吟雪犯髭畢生  
所造構詎等鴻與泥終然一瞑去蛻化迹如遺我今得

解脫冥心撤憂思了知生易盡不復歆無知耿耿萬端  
曙淚接雞鳴時

理安寺

癸丑

幽幽理安寺一徑入雲斜不斷夾溪竹忽流何處花  
筍參遠年酒泉薦本山茶誰得心無事僧房共歲華

清淺

強要青帝占年芳玉殿瓊堦夜有霜幾見月圓三五夕  
祇供天笑億千場可能久視憑靈藥便信香棲穩畫梁  
汗漫先期應有意不教清淺鏡殘妝

以京師菊種寄養蘇堪園中託之以詩



辛苦微根北海移春深無地插新枝何緣庭下依高密  
爲愛詩中有義熙託命孤芳能幾許招魂終古與爲期  
使君不惜階盈尺儻待秋來一展眉

覺先弟自京寄檳榔來詩以報之

我生嗜檳榔日用論斤夥了無羊踏園空用敵飯顆柳  
州昔禦魅持以克憂瘴壅積雖破決正氣傷亦頗萬味  
舌所甘肉食觀頤朶獨此風調殊斷斷與齒可齧猛饒  
嫵媚堅磨勵坎坷酒罷宜解醒倦餘還起惰造次代茶  
煎炯炯長夜坐疏通齷筍腸出言如炙輒洗滌助冥搜  
字字必貼妥諸弟各異嗜汝嗜乃近我年來患臆膈方

寸鬱嵯峨食少仍導之腸胃日春簸遠道肯相貽纍纍  
啟包裹燕製甲寰中密理瘦而橢京華故人面相見一  
笑嗟醴醴萬歡空拾墜此么麼前年遯兵間日憂不舉  
火須索如穆之眾口嘲喧歌前年武昌之變余到漢口  
或問所需乃索檳榔一包  
或笑曰此時正憂無食豈需此乎余亦自失笑寒士有食籍安排及瑣瑣檳嗜  
如未盡殘年券腹果

五月十三日同散原恪士壽丞瘦唐同武游焦山一宿  
與瘦唐壽丞同武先去散原恪士留山待王君伯沆  
好境初逢兩相得重到便惜哀樂參焦山諸庵尙好在  
惟屢識想隨幽探昔來玉蘭正作花今看綠葉空扶檐

清梵晨鐘不改度十年夢寤飽塵凡沈

約略話舊資僧談

甲辰歲十月同游者  
敏洪子東丈劉松广

山真實意到此惘惘仍難甘飢愁恐  
去吾何慚兩翁少留定清絕有待未  
出諸籟寂涼思一髮酬幽耽

次韻節厂師高碑店菊花

孤疾錮南山行行近天闕解鞍荒店小  
天何肺肝露下百草歇披衣夢不成  
逢此花騷魂驚醉兀相遇定何心霜  
得遺惆悵至明發敢苦塵沙黃哀愚工

沈乙厂先生以新刻陵陽倚松二集見贈索詩

堂堂青石牛重負萬鈞去八風作日用幾輩仍此度無  
益遣有涯何緣得依據飲水圖滿腹雙井一盃露風雨  
不予違婉變同寐寤深冥千仞谿滑坡留一步東軒一  
老人啟我開徑路欲嘗初滴源派流茲可泝韓饒並高  
音寂寞傷遺著潛幽七百載乍見乃如故陵陽自得師  
臭味不差誤倚松頗早計一偈了災患萬古身後前片  
羽資感慕要知薪火傳杲杲初無住無隱有心香百世  
猶旦暮何用惜夏高無言同此趣

若雪與覺先弟先後寄菊數十種日涉小園聊復成詠

東坡謫惠州攜手葛與陶孤光如海月寒鏡閱滔滔清  
吟却老至甯止詩中豪我生百世下憂端兩相高開卷  
若有得往往破愁牢殘燈守菊影寤寐同寒宵

種菊無百本朝夕涉小園晴宵定微風清露一何繁葉  
翻急雨態花漾千珠盤泠泠沁心骨匪我衣裳單淪浹  
九秋心歲晚復何言

彌襟萬千秋慰眼難一掬好花開較遲已履繁霜肅安  
能展過隙暇及秋陽暴潛幽或終古誰與昭此伏芳馨  
雖不展應候聊結束浮生繭修途逝者當何贖

亦有高秀姿亭亭滿月相得霜乃清嚴禁雨不悽愴空

室了無悅得意千載上龍章雖雋烈天黥偶遺忘出爲  
一大事甘此詩酒放

故人慰我癖送菊託海槎諸弟續有寄幽居忽豪奢愧  
我所持約無物酬芳嘉資生日以薄託命餘秋花秋情  
月旣望幾度減清華幽姿還起予破涕迴青霞

聲焦知悴葉吟緩悲寒蟲殘月蛻曙光秋夢俄已空婉  
變自婉變一燈支霜紅蕭寥失依倚冷抱還沖融密移  
逝可悲真存儻予逢一勺有來秋抱甕勤未終

十八夜同李道人野次看月

夜色滿柴門二人自成世眾木霜氣中葉黃影在地竹

筱擁寒溪相虬入煙態貧家惟白曉庭空靜如寺遙柝  
轉寥天疏星耿三四清言不世出萬象破幽寐歸寫良  
夜圖清冷難題字

寄懷陳師傅弢厂先生卽題聽水齋圖

太白何睽睽獨與殘月曉鐘鼓夢西清如見顏色槁昔  
我見公初堂堂送張老倉皇臨夜半流涕看遺草平生  
無黨援死友心能表

張文襄公遺疏弢厂先生增  
不樹黨援不事生產八字

千迴

鬱結意並世復誰道清酌陳哀辭奠罷自焚稿我時賚  
几筵相視何淒悄蕭寺隔重湖僧房頗靜窅邀觴重九  
辰破寂一灑埽先朝雙白髮心苦詩愈好

是歲九日  
約弢厂先

生節尸先生飲廣  
化寺中皆有詩  
別來無歲月合眼金華杳似聞退休

餘不忍懷魚鳥  
幽幽聽水齋修竹插天杪披圖意空多  
徵題情慰少初陽上金莖昔昔風露早來日自舒長論  
語半部了閒居三十年洗耳事幽討再出坐子房傷哉  
爲綺皓翻然恣翱翔目極孤鴻矯

散原先生夜過觀先師關先生及強甫遺稿感而有詩

奉答一首

有歡非世同有淚當自咽我生眷師友半世芳馨絕菲  
菲九淵底峨峨千仞雪波流萬人海弔影彌孤子繁冤  
枕遺書魂夢向誰說悱惻散原翁湘纍通一脈夜過拾



叢殘同命在芳潔歸眠月皎皎窈窕哀輶側孤奏起騷  
魂使我寒灰熱哀哉廿年事龍戰水火烈熙甯薦士初  
程顥淚已滴散原先生尊人右銘中丞公會保薦先師得旨之日先師棄世矣殄瘁帝  
何心萬流雜喧吸消息理則微遂至三綱裂聲放還復  
吞憂端不可掇

次韻沈觀文見贈

高雲作時霖小雨成薄霧變滅須臾期杲杲同一夢才  
老天心奇文字極所縱氣攝龍象瘖大千震微諷孤往  
若有見借來已失眾飄風小噫欠甯覺蚊蚋鬩蕭寥楚  
山川可歎非時鳳笑我滄溟蹄短汲纔一甕煎愁自相

濡悠忽了賓送多生何因緣清淨每飯共願睹成寶坊  
斷柄備斲龔

和散原先生寒夜見過

萎菊同殘夜昏檠且復光流天鐘發甕堦戶夢排闥海  
暈一痕月風鳴千樹霜閒過散原老苦茗與參將

曩歲住武昌有賣餅叟作秦聲寒夜過深巷其音幽咽  
以長爇小鑪擔間以竹筒炊餅令爇焦香噴鼻自予  
入都遭世變忽忽二十餘年今以事復來城中聞聲  
呼之果叟也詢其年已七十自言業賣餅四十年矣  
感念舊事爲作一絕

華表崢嶸不住塵  
望門呼舊只酸辛  
霜街一擔油酥餅  
猶是當年皺面人

二月初六日出東門  
展外舅子封公暨外姑周夫人墓  
過洪山卓刀泉途間感賦

流離避地歸不得  
門巷重過傷婦家  
東郊上冢更淒絕  
風景猶昔驚年華  
舒青柳眼已無賴  
方塘淺水初鳴蛙  
難尋山陰萬株雪  
時見幾樹檀香花  
松風古寺一泉冷  
惛惛不暇評僧茶  
當年春郊鬪游騎  
綱之朱強甫羣季何  
紛拏長堤颺忽三十里  
桃林袖底翻紅霞  
戲撞鐘鼓動  
僧眾少年意氣如驚鷹  
死生交情倏灰燼  
况益變亂相

乘加乃知一身撫陳迹亦如望古徒興嗟崇岡佳城尙  
蔥鬱急趨展拜當日斜何年重來際世定偕同孤女攜  
甥娃零丁困苦滯海角姥老反哺酸慈鴉愁心掩抑不  
可訴挂眼一塔時呈遮

舟夜

雙流浩渺送殘春孤艇淒迷溯暮津萬事回潮空有淚  
殘燈相影且爲人求仁幾輩堂堂去開卷幽情往往新  
一念不迴應到海歸田無意誓江神

落花四首

海竭天荒有別離義山腸斷未曾知關心嬌寵都成夢

立望偏反尙可疑  
萬里陰濃愁未暮  
三山事息憶成癡  
幾回雨後仍相見  
一爾風前便永期

一片俄驚萬點新  
更勞車馬碾成塵  
費聲林際催歸鳥  
負手闌干獨立人  
願以虛空爲息壤  
偶迴庭砌聚殘春  
青天淡薄難充紙  
欲寫芳踪迹已陳

溝水參差西復東  
誰憐無主淺深紅  
新陰方滿園亭瘦  
殘醉未消天地空  
白袷香餘初夜露  
虛堂夢穩五更風  
當前本意猶難遣  
何要年年歲歲同

日夕懷人人未歸  
難憑孤注送殘菲  
尋知池館來何暮  
惜到芳樽願已違  
一樹穠盈酬夜雨  
諸天縹渺共斜暉

紛紛蜂蝶休猜怨  
題節尸師 崇陵  
帝恩猶戴天臣土  
呼我 先皇沒世  
也實不諒深宮落  
亂國不亡豈不由  
朝誦 先君至德  
府千萬資貪人食  
賊氛惡行暴議尤  
孤臣誓銜微木徇

莊康衢無人徑二三老司香世隔孰過問減數及朔羊  
守衛少餘餒犯冰楚然來驚迎淚交迸雨露三百年獲  
報惟此僅薦饗當隨班例格仍敬慎孤蹤聞九重  
與祭特頒令明發趨崇階遙瞻黃幄映魄動見前和  
慟哭長河互降階焚祭辭天地痾孤奮毅力無艱難至  
誠終格應義激將作臣集事効速迅合杳萬靈趨奔走  
百執駿哀哉蒼梧葬娥皇終耐舜薄海動悽愴百國赴  
觀臨坎閉空靈輿匍匐臣力盡璨璨翠玉璫遺佩承  
懿訓豈意遠小臣寵錫絕貴近嗣皇念精忠臨軒  
召入覲松柏旌其廬鬱律天章勁魏峩金粟堆有待

貞柯蔭 帝曰種樹職直節惟汝稱殊恩出阡危九死  
甯足殉向來易代初戎馬率蹂躪掘發理無完遑問樵  
採禁我 朝秉忠厚遠駕百代勝監護明諸陵備禮無  
缺贖 三祖逮 八宗恭儉自天性視民每如傷何罪  
于百姓土崩古未有瓦全豈彌恨昔人表冬青辛苦悲  
至行今茲備榮哀天人稍可證煌煌萬年碑悠悠四時  
運拱把望參天敢阻霜雪盛抱木暫未枯長鏡以爲命  
題勞玉初先生勞山歸去來圖

楊子渡揚子椒山住焦山姓字巧智合古人邈難攀不  
謂遯世人名山恰相關言訪逢萌居受姓湖其先嬴秦



昔亂紀萬戶琅玕遷實惟勞山下因山姓以傳賢者避  
其世得姓非徒然自有此山來幾閱海成田蒼顏破涕  
笑乃今見公還孤蹤感行止信矣非人權哀哉道喪世  
本根必先顛末季壞禮法首決三綱藩一老口卒瘖滄  
流不可填天心忽盈蕩殺機動瀛寰我欲避蹄跡一盼  
空九天先生正高卧獨擁松風寒半壁晃海日猶夢先  
王觀東坡詠遺逸死灰或餘煙萬一東園翁翻然下商  
顏

三台山山居雜詩

陰雨連朝昏蟲鳥共啾唧飯罷坐攤書靜影自汲汲野

穫秋場寬寒翔啄餘粒笠鋤闢蔬畦歲事未遑畢衣食  
定須幾辛勤或難給操約而願奢淹泯何嗟泣

養疴適林野奉母營幽居南湖最深一畝分隈隅諸  
弟禿秋穎力縮辛苦餘名園足盛衰天儻畀區區但惜  
秋水涸木石艱航桴決流漑旱乾敢怨工作紆山居日  
無事諸子奉肩輿弄漪坐山光往往歸忘晡涼風感子  
仲朝朝公府趨紅葉被徑深夢熟山中廬

我昔官京華趨曹日僕僕戢影今海隅朝夕困馳轂命  
坐磨蟻旋了不異城谷書堂踰十里日往共呷啜稍演  
劉項爭未畢論孟讀穿鼻貧所甘素飽愆豈贖大千方

震蕩獅象競騰蹴狂流敢橫身實地誰立足羨彼山門  
僧打掃自結束顛倒悲喜中形影何局促

論才及宋代豈不先乖崖遺像留僧庵了了明去來惜  
哉太華蓮專爲希夷開不獨神清子事業限鑪灰伊來  
有成人古德資扶培淵源不可誣變化非一胚周旋盧  
鄭間陶範英雄才留鄴及新建所遇尤奇佻下士未聞  
道拘墟獨難迴寸莛叩洪鐘焉能應風雷殘年託細字  
積悲當沈災海濱事諸老婉變忘形骸願浥彌天瀾一  
漣千劫哀

人生寶苦相種種含悽酸尋常暗飲刃不在血流川受

者徇一瞑見者猶纏牽一端偶接觸萬象疾當前反觀  
儻自覺不暇人悲憐陳陳往不復孕自無始年誓度無  
量劫佛力何有焉寥廓望前修褊心遺誰安徑情絕隱  
欺差覺靈均賢

多塗趨一軌何事爲生機發憤以忘憂孔叟乃孜孜平  
生已半世晨光乍熹微常恐墮幽憂聞道曾無時山空  
露氣盛蟲吟不肯遲耿耿對無寐孤燈我因依

山中栗正熟坼苞滿田畛蒸煖拌醬椒侑酒滋芳辛醉  
中有陶蘇頗洗戰國秦山氣忽蒼涼炊香愛松薪近鄰  
過朱馬數見彌情親雖止桑麻言不雜朝市塵一邱萬

事舊開卷時汲新冷月與朝陽皜皜同昏晨片端且論  
定真作山中人

謝子漢之陽亂世皋比擁截流逢生源壁立見真勇劉  
叟卧江潯破寺俯洶湧苦約過顏堪遠念生敬竦至詣  
久寂寥雙繭或破蛹石徑秋氣高夕照明孤聳何時共  
游蹤物外一笑踊

獨行至六通寺

山深息交游獨往尋僧庵徑轉忽異色迎面堆濃嵐高  
柯正脫葉新紅醉霜酣上方帶修竹萬翠猶毳毳到門  
剝啄久偃僂應瞿曇院靜無履聲微聞度檀楠長老信

古德耿懃致敬謙同居盡清修不數前三三上堂儼夕  
課龍吟起深潭一步千威儀千業一拜參皈依罪過身  
慘怛人天含旁觀敢贊歎偷懈徒心慚方知設教力歷  
劫禮所擔晚尋竹徑歸回首情猶耽夜枕接瞻聞寤寐  
同清嚴

龍井寺中坐雨

坐對寒湫一鏡開凡鱗么麼未相猜不知有意還無意  
忽送飛雲片雨來

八月二十七日奉母再到龍井

浮蹤到寺似投林我與寒泉共一心坡老來如前日事

慈雲閒作本山陰，堅蒼入骨嵌巖樹。曲折沿流繞指琴，  
未識諸天定何意。佛香遙送過前岑。

樓望

殘柳新芙晚更幽，湖天沈寂一當樓。亂鴉脫葉參差暮，  
單雁重雲夾帶秋。舊事已乾叢菊淚，閒心難繫故園舟。  
危闌盡處從孤倚，攪入邊風畫角愁。

晚禽

晚禽啼罷夢初回，繞砌芳蘭幾度開。山月常看杯引滿，  
松風不爲世悲哀。臨流棲鷺同閒影，過雨寒花笑獨來。  
天末涼風歸雁盡，有誰乘興破蒼苔。

李筠厂以錢南園曹劍亭二公遺蹟合裝一幅屬題

國朝名臣妙書畫絕筆最數南園錢家藏脫銜有二馬

勢欲萬古爭騰先曹公翰墨世罕睹曾見僧寺馴雞篇

京師崇效寺所藏馴雞

圖有劍亭先生題識張公表幽目如炬獨寶遺札逾

瑚瑄圖有張文襄公跋以劍亭先生遺墨爲最難得百年聲名異煊晦一朝合

并當何緣豈非大節貫不朽藝無多少皆天全二公忠

直二楊匹埤視嚴魏加能奸天鑒照臨惡未逞雖有隱

忮無顯患豈如明代禍慘烈廟堂幽暗非人寰及今綱

絕那知此座右獨凜秋陽懸嗜書還搜古遺直嗟君好

尙殊亦賢



素心蘭

靚夢亭亭在含情渺渺何干春傷不盡猶惜一花多  
露重空餘淚月明愁化煙不知紫苔意何事稱年年  
予數夢至一寺門臨大江略似焦山定慧寺而幽窅過  
之昨又夢至其處詩以紀之

何朝遺古寺門對荒江開幽境出世間夢中時一來紅  
廊繚千步殿角高崔嵬蜂房巧接連琅函淨籤排簷竹  
浮江光几榻碧滌洄老僧強爲禮雪眉映枯骸似言暮  
色深一宿且爲佳上燈起霜鐘蒼茫入江雷恍然暫已  
覺我夢何時回

次韻蘇堪謝遺泉水之作

短瓢親浥愛澄澄巨甕行擔笑未勝試茗安能妨夜睡  
傾瓶聊可漱晨興松風一往縈殘夢石磴何時坐並肱  
空說清游住塵界中心無那醉曹騰

九日懷人四首

文筆堂堂一世豪養親滿意屈閒僚秋來瘦菊燈前影  
深巷誰過慰寂寥

茗雪

壽酒年年泛菊花依依嘉會憶君家眼中舊夢都相似  
只少劉郎手畫叉

治齋

叔氏醺醺醉濁醪仲兄落落愛題糕遙知眉白思予季

一握秦雲雁字高

季湘

佳節從來憶兄弟中年恨事更相參何生重倚斜街月

酒後論詩說木庵

石遺

徐園看菊已殘萎矣同莘老作

徐園殘菊愁吟眸支離萬本皆垂頭繁霜晚節豈辭避  
夜來風雨胡相讎與君來遲敢傷暮要知劫外叨天優  
強張孤芳祓物忌姿回泉石酬清謳牆陰籬落秋影亂  
坐冷茗椀神夷猶游人千睨各殊意斜陽一晌因誰留  
塵搖形役念念改何須照面恆河流臭味潛通花可省  
對影或恐爲花羞故根移轉久零落年年魂夢紛離憂

風露在天根在地慰眼何時仍好秋

雨後同貽先覺先買茶至法相寺

買茶雨後來山寺乍啟虛堂眼界寬  
修竹連牆邀雪淨高櫟一樹破僧寒  
聞鐘漸覺安心竟出谷方悲值世殘  
無用傳衣參佛祖夢魂應繞白雲端

劉園朱棣老梅下共醉

扁舟就梅花壓帽湖陰重長廊接殘滴  
宿雪沒石縫誰施一院霞繽紛如異夢  
清淨自成妍遲暮一笑共物外得朱老  
深盃發昔甕空字無藏明設色春情縱  
高松表疏枝當無有花用

看梅後歸舟遇雨

梅間有新得歸棹失眾山疏林但一抹三界沈空煙塔  
身未終隱落落仍孤閒雪苔宜幽屐千春誰在還

大雨後同復園至雲林寺

上山瀑流礙輿行寺門未入風濤聲轉橋衝躍玉龍橫  
九天派落千雷霆陰崖陡起萬佛撐樹不識春何代青  
下漏日色變幽熒徹晶噴雪寒日晴徑深憩亭俯澄泓  
上方潛洄下震驚偶與石鬪波瀾成本來淵默非不平  
突兀高殿轟蒼冥崇階百級排丹檻本末十圍仰列楹  
佛力一髮邱山輕去年奉母禮鬢纓猶記塔鈴語丁甯

今借謝屐乘新晴  
賦歎奇絕昔未經  
山雨一夜愁瀟淋  
翻然倍百張詩情

宿州道中

蕭條徐泗漫經過  
九逝英魂一盪摩  
永去南中淹日月  
忽悲北向看山河  
屯淮列幕酣歌急  
挾海崩雲變幻多  
勢轉圖窮驚七見  
遠塗垂暮定如何

靈璧道中

葦敗煙空釜底村  
殘陽留夢浸餘痕  
春風一樣穠桃李  
靜掩門中半菽魂

潼山村宿

曾無一漑蘇窮壤欲乞九河湔涕痕胞與斯民原妄念  
子遺末世自煩冤髓乾猶迫誅求令時改方知湛澣恩  
水澀山枯夕陽盡夢魂悽惻住荒村

過洪山閱兵臺下

當年霜鬢爲神州士馬精妍耀上游手足不曾頭目捍  
痠癰翻作腹心憂書生自有西涼簿神筆空傳上將猷  
臺蹟未荒賓客在九京遺恨已千秋

乙卯四月歸里謁祖墓

十載重來祖墓山老僧成塔隸爲官更無煮筍燒茶事

已過花時問牡丹

曩與延齋六兄楚生八兄怡齋九兄  
渭漁三兄掃墓輒擷人家竹筍食之

香味俱絕先曾祖墓在調軍山寺僧必貯本山雨前茶  
以獻今僧已再傳不知此故事矣寺後有牡丹高丈餘  
花時最盛今來零落已盡祖墓金盆架守山者  
于國變後爲軍從前草舍今則夏屋渠渠矣

慚謁家祠第一回磬聲驚是夢中來堂堂陳氏非王臘

可鑒餘生負國哀

余去歲夢至祠堂祭祖神龕後有人  
擊磬聲鏗然驚寤故此反里卽日

謁祠儼然夢  
中情景也

老屋當年聚族權祇今池水剩清寒本來難語還無語

落日荒庭拜一棺

到老屋時怡齋九兄他出不逢一人  
庶伯母洪太宜人之樞殯于中堂獨

拜而  
去

大雨過黃梅

江舟一夜黃梅雨正向黃梅山下來雨過梅黃春去了



欲將何事問黃梅

南湖晦夜寄懷散原先生

溼螢亂開闔山影霾半湖  
險喁聞格磔雜杳喧荷蒲宵  
沈潛蟄作萬竅爭號呼  
長飈忽飄捲颯若幽靈趨大千  
入星光貞明忽已無一息擬終古  
遙夜何時狙握雲天一角下有青溪廬  
脫襪此偃息諦吟定何如

蒼然化一碧高穹爾何冤  
故躔漸就窄蝕魄定亡存  
流人不惜日五載移寒暄  
相逢海枯年行見豕零尊  
淹留竟何待去住傷精魂  
淒其望鍾阜白頭晚相溫  
寂寞復寂寞寒潮親故痕

蟻渡困坳流出謂幾不免人落憂患中何異蛙在坎行  
行夢當覺暫未百年滿餓鄉雖窮處正堪一笑莞德人  
妙天游萬態齊枯苑微生獨悄悲終恐法華轉

繫夢淮底村愁步千里積荷碧水到門洗眼湖上宅徇  
物情易遷俄復百端集初年耿志事千仞瘞冰雪漫作  
徐泗游恂恍對溝瘠未能六鑿通那救枯魚泣所學失  
平生銜髓餘慘戚有如臨化消空養千金壁孤往違因  
依懷遠互淒惻

十五夜月

卧聞魚躍水聲洪起視高天月正中分耀同光一星在

有香無影萬荷空百年何事酬良夜微念生涼自好風  
寶相瞻前旋在後鏡奩只是嶺西東

七月十五夜登海上最高樓看月

彈指虛空不夜城市煙海氣漫縱橫更無燈火闌珊處  
却與何人共月明

廿一夜夢作書畫真有契歲月來無窮二句似翻后山  
詩意醒後偶有所會遂成二詩

新秋送殘暑雨罷來清風湖天出淨碧盡爲窗几供焚  
香展圖畫往往名山逢書畫真有契歲月來無窮但使  
妙明在自有精靈通千秋旦暮遇何必非我躬得意已

藏密五家詎能公知益却傷晚隘矣后山翁  
高峯半雲雨觀棋坐一老楚天巫峽圖千古一畫稿天  
陰贊公房壁潤龍鱗好想爲宏偃筆變化松夭矯山谷  
游落星燕寢清香裊小幅對寒山妙絕無人曉我讀兩  
翁詩魂夢輒飛繞何當逢解人破秘一傾倒

八月十一日生日偶作

早忘自念猶傷逝難洗餘哀那入禪味簡多生甯有債  
把詩過日豈非天僵蟬咽斷繁霜後瘦菊魂銷細雨前  
一念嗟峨妨學道儻看射虎未殘年

將至金陵視散原先生車過鎮江觀落日作

金焦于我豈有私每過常逢夕陽好夢中留庵曾獨往  
欲說生前仍縹渺貪看落照一孤僧片念微差墮塵擾  
流浪多生無畔岸偶對江山愁皎皎海涸天荒試哀樂  
虎倒龍顛破強矯舊歡掣電往往空殘懷落月垂垂曉  
青溪老人方閉門一勺寒泉自忘老行過相見一開眉  
有酒何須問懷抱江光搖空霞影亂遠塔孤標漸深窅  
輪馳腸轉且未休蚤暮何時憂患了

九月以事至天津季湘茗雪治薊子安楚生八兄寥志  
二弟皆自京來會適逢九日就市樓小飲卽別去途

中感賦二首

恩恩北上止天津不過西州擬未倫豈料京人爲異客  
何堪門厯注亡臣相關歲晚餘親友一笑燈前孰幻真  
草草盃盤作重九天涯半日尙逢辰

回車念念盈眶淚未解真爲徐李哀

李猛 厂丈徐瑩甫見新逝從擲

干冤爭一慟已空舊夢可重來天寒白雁江湖盡秋老  
丹楓日夜催未了餘青迷望眼參天岱色只成灰

病山先生獨游天目山歸述其勝且示新詩歛然神往  
亦擬一首

五年一日暫失憂聽說東西兩天目雨中獨行世境異  
有目所見惟松竹千盤萬轉出雲外晚投佛寺仍山足

道逢跣趺顏色好削壁安巢當半腹連天濤風度鸞凰

中有眞龍帝畧木

有巨松一株土人謂之樹王

絕頂老僧歲一往必

待兼旬霽紅旭光芒六合瘴霧空四大海水一鉢縮我  
聞夜夢儻見之插天青棱震雄轟煩冤覆盆入井底仰  
懾崇高悲短促熊啼猿哀酸骨死託命山中老尊宿至  
人道峻天與齊俯視嵯峨等平陸乞公起廢與新詩萬  
仞憂端爲降伏

輓李猛厂丈

辛亥出國門已分不相見今來何因緣萬贖惟一奠殘  
生所欲言未死餘自嘸千春無芳菲滄海成枯淡先生

北學宗藝事特餘玩龍蛇道東方志事掩談謾出入朝  
市間侯尊齊隸賤天眼灼方物望氣得真贗世兒詫萍  
實多識原一貫末世淪賤愚長者知服饌溝猶幾專家  
眾中雄顧盼寸莛叩洪鐘聾耳或驚竄沈沈百怪鑑汪  
汪海若歎交游遍湖海我父夙所善小小逢鎖闥老大  
同江漢不遇數何奇氣盡十一戰飛騰幾輩傳南北知  
兩監飄泊鸞鳳姿公族輕衰亂賤子舊學詩雕刻羞自  
炫未傳西江衣謬許南州冠五言竊句律篇出輒蒙讚  
詩拙過梅窮題序缺歐翰京師萬人海晚極魚龍變載  
酒物外游一隙展荒宴相過傳劉徐形影夜及旦酣嬉



卧屠沽雜沓穿歌院看花累春心說鬼噤冷面心知來  
日惡因循極浪漫醺醺萬歡悰慘作隔世戀國變痛天  
摧行遜各分散我屏東海隅公潛南宮縣他生渺未卜  
魂夢淒永斷遠哦寄懷詩憶苦神輒眩今來一月淹終  
古人天判問疾驚已遲深葬遑及殮登堂見白衣手澤  
猶在案質亡我何存哀迫生何暗吾生邁殘運有樂蓋  
微幻區區不慙遺往往供涕泣風流遂銷歇天平絕文  
獻知復幾百年靈竒鍾此彥故知神理存傳世有遺硯  
還從小蘇游歲晚矢婉變

往寶應視樸生疾過鎮江作

霜嚴風急夜淒淒踏影微行月向低北府兵屯殘角冷  
寄奴巷陌曉烏啼熏天可待揚灰盡學道終憐到死迷  
明滅龕燈愁外遠不眠心拾上方梯

夜過鎮江

下車無人逢凜冽橫貫霜空風有力大千塵界曙鐘聲  
第一江山殘月色煙樹微茫了非夢魚龍浩渺喧仍寂  
羌無陳迹影興亡只有空明出寒碧卧庵老僧幾何歲  
梵唄多生會未息平生誤記稼軒詞曹蹶劉顛事歷歷  
湖上一夕大雪寒不成寐寄懷節厂先生梁格莊  
冰合重湖玉照窗心緘萬里對殘釭人間只有梁莊雪

天地高寒不可雙

朝來 饗殿失崇基着履深痕臣在斯有淚經天如此  
雪杜鵑血染萬年枝

往金陵視散原老人因讀近詩夜過俞園看梅翌日同  
游掃葉樓歸寄一首

詩哀餘古人愈好更可哀巨刃破愁地擢數窮根荏閉  
門滅聞見據槁忘形骸寸心非砥石憂患滔天來涼秋  
把詩卷再見春已回眾湏一日短孤櫻千劫灰輟哦語  
未定夜破鄰園苔秉燭照霜月不負餘寒梅卽幽洗鬢  
暫攬曠傷高纔驅車清涼山淒象凌空臺名都士類盡

城處遇荒隈災殃奪物性存歿供吁唉夸父逐日影肉  
身覬聖胎所徇異清濁迷妄將毋儕老至一關塹壯趾  
多歧乖終古往不反莊語痛非諧天全屹一老行直無  
疑猜還持遠公法往參陶潛盃

擬漁洋讀三國志小樂府

來時正伏魄窈窕魏宮娥淒絕分香語空悲更事多  
冬獵秋讀書初意何俊曠可笑羣兒愚踞君鑪火上  
萬事皆雞肋還悲去日多芳樽薦野葛風味妙如何  
獨抱漢官恥新恩寵莫躋何如題墓道猶愛故征西  
不仁與不孝異等皆遮羅新宣崇禮讓禮讓奈公何

天命雖吾在，逡巡廿五年。猶聞頌九錫，君豈綴旒然。  
同流必合汙，末路安可避。君不徇虛名，臣食得空器。  
六月十五日夜同九兄四弟五弟步至飛來峯看月  
高柯交影散，瑤臺露氣橫。流撥不開無，住奔泉先我去。  
孤飛大月逐峯來，清寒一往甘終古。勞轉多生記此回。  
勝絕都空哀樂意，山門殘夢洗風雷。

中秋日恪士邀飯于法相寺

荷已離披桂未稠，淡雲微雨過中秋。爲耽野飯尋僧飯，  
還覺平流勝俊流。小閣空山宜客夢，寒芳深院助禪幽。  
院中秋海相期更醉重陽節，晞髮天風最上頭。  
棠甚盛

湖上寄懷治薌卽祝九日四十初度兼訊茗雪季湘子

安

湖居預擬登高處絕頂南峯定北峯夜雨銷魂燕市酒

天風吹夢戒壇松中年諸子看猶健

茗雪季湘皆四十一歲子安三十八

子三十九一念懷人剩未慵長日臨流何所羨雙魚會有尺

書逢

年年壽酒黃花節愛子飄然思不羣別後西湖空付我  
秋來東道最思君寒芳老圃悲殘雨落葉荒臺掃暮雲  
灰忍已無驚坐句疏狂應有答嘲文

題南園畫瘦馬

日短風蕭山澗曲意往神迷影碑兀百莖一豆夢皆空  
潤吻寒泉聊注目雲雷降精事豈偶厚地高天一窮谷  
千秋死所非易致自恨崢嶸露奇骨絕筆空傳形外姿  
賞真誰是道林師枯禪便入駱駝坐雪壯霜驕耿此奇  
九日同俞觚庵其姪伯剛朱棣卿馬卓羣陸澍齋徐肖  
研許姬傳七伯父覺先弟兒子邦榮邦直共十二人  
攜酒肴至龍井登高

飮餽杯盤野興長招提蕭散作重陽坐深潭影閱雲過  
望淺秋暉暮氣涼却笑清游貪寂住翻因高處怯蒼茫  
今年今會還如此濁漑何辭奠侍郎

于晦若侍郎墓在山左近

和觚庵

杜老佳辰對羣盜陶公九日闕持醪幽憂不出古人下  
極目依然天界高萸菊暫酬秋寂寞江山空覺氣蕭騷  
舊京糕字無消息斷雁西風首重搔

同覺先詢先兒子邦榮邦直游陶莊

秋晶躡屐南峯高陶莊之勝臨峯腰修篁半天結一綠  
萬鳳交舞鳴簫韶緣坡剖竹走泉溜鬱律直下縣青蛟  
陰陽咫尺異寒燠我踵屢息忘疲勞長耳老僧入禪處  
潛竇細瀉瑩泓坳結跏一念萬年去至今幻體猶堅牢  
洪楊奇劫斷金臂飛磔颯颯天神忉試升絕頂望城邑



紅鱗萬瓦秋陽騎西冷當前渺一勺隔江欲挹寒癭瓢  
當年 純皇奉 文母屢駐 絳節觀靈潮琳宮法宇  
變荆棘陰崖突壁空焦堯百年反覆憫狂穉淨土往往  
污腥臊妖祀客魏等然耳了知彈指灰塵消丹牆一角  
餘正色煙竿猶認錢祠遙清都赤城起方寸避世何地  
違氛囂山僧烹泉薦綠茗麤瓷盛玉逾名窯有梅憑巖  
最殊絕雪時待訪青霞嬌寺後綠萼梅  
一株最勝  
散原先生來湖上次日蒿老亦至遂同游虎跑泉  
二老經歲別世亂積幽疾相逢在名山一笑乃至矧霜  
姿不改度取證寒泉影山光秋正濃高樹沃丹頂澗流

自磬鐘激翠上襟領虛堂倚懸崖削鐵石骨整嵐氣浮  
長廊清寒入甌茗還尋濟公塔靈跡仰昭炯爲齊塗割  
觀遂壹冤親等褊心不能迴學道愧無忍適野情暫移  
隨杖坐忘暝依然廣長舌送客溪聲冷

同散原老人登六和塔

當年建塔鎮江湖萬弩難勝一柱標昔覽烽煙愁飲馬  
今荒榛莽任棲鴉老懷憑遠餘悲健寒籟迴空振悴凋  
欲向簷前問鈴語冀州喪平後更蕭條

法相寺中老樟一株雙幹皆大十圍其本殆不可量不  
知何代物也散原老人屬同賦之

法相院中長耳僧早空諸相藏鋒棱一朝永明偶饒舌  
結跏俄頃驚膚冰應身歷劫住山寺定光一線燃龕燈  
我尋春茶數來止但賞修竹青層層忽逢大身仰突兀  
老樟分幹雙龍騰亘如天柱伸兩戒矯若雲翼張孤鵬  
神物不敢臆年代但識倒挂千歲藤山僧築閣度長夏  
片枝所覆蒼雲崩四時風雨掃落葉老衲偃偻階難升  
散原老人詫一見平生奇觀嗟未曾匡廬五爪震寰宇  
對此只落聲聞乘遯世无悶亦有待發幽奇句精靈憑  
高吟千里起鍾阜仁聽夜半霜鐘磨

子修丈約同蒿庵散原游西溪飯于交蘆庵

欲雪未雪花冥冥  
汨流四望迷煙汀  
平生蕭瑟夢魂處  
扁舟一往如重經  
交蘆庵子水中渼  
伊人不見餘荒庭  
年年秋菊薦芳馨  
遠山何許雙豕青  
閒居避世淵穎老  
喜載舊友攜樽瓶  
呼陳僧藏玩圖卷  
恍出犀軸紛幽靈  
歡娛朝野隔生事  
何論風節垂高型  
酒酣不忍歎家國  
但說同輩多飄零  
荒陬游過數不厭  
略尋影事如江亭

京師陶然亭

蘆花略相似

飛來成畫  
唳寒雁北向  
且被愁顏聽

游西溪歸湖上晚景絕佳同散原作

行盡西溪三百曲  
忽開天鏡晚晴中  
仙山樓閣無限好  
碧海銀河何處通  
落日千峯橫紫翠  
中流一葉在虛空

時無小李將軍手奇景當前付散翁

同散叟游龍井蒿老先至

靈湫昔龍幸傑構周巖阿兵荒道場歇寂寞稀游過

前秋我適來異境驚難摩平林絢高嶺濃醉霜容醅升

堂試泉茗提汲煩頭陀碧潭瀉澄流冷然奏環珂石磴

出眾木干日仍纖柯山寒敵堅瘦詩骨增嵯峨隔晨奉

母輿侍坐忘日蹉同時聞妙香清迴如風荷不知何因

緣散花證羅婆

甲寅歲奉母來游同時聞荷香甚濃時已深秋且在山中也

靈奇話

散叟踴躍窮煙蘿先登蒿庵翁倦几夢羲媧眾游與獨

往所得竟孰多嵌壁仰天題剔蘚勞摩挲篇終念舜

三  
二  
三  
憂 主惕知時和梁摧泣龍象地勝空雲波僧豈無辯  
才發祕誰東坡

雨中諸真長約同散叟觚庵游雲棲寺

昔來暑晴中白日疑幽月今晨對秋雨寒瓊化我骨修  
修不見天山鬼所宅窟蹠影迴碧間自照寒光佛衣單

煖尊酒嚼雪筍新掘酌不及公榮主客笑通脫

真長攜酒一瓶

子與散叟共盡之不酌真長也

香光寫經卷筆勢瞻秀發了知功德無

報母資津筏千載且暮心虛堂證超忽僧寮足深嚴但  
惜少軒豁空負竹萬竿不見青排闥禪修屏聞見游賞  
恣林樾何當雪後來支筇屐同沒

散叟去後獨游雲林寺二首

不雨晝冥冥，千山擁佛青。  
松身寫羅漢，泉夢入風霆。  
古徑惟寒葉，秋芳有異馨。  
吹襟坐巖石，添我兩忘形。

入望禪機第幾乘，金松翠竹白雲層。  
突峯洶湧長遮日，迴殿深冥欲上燈。  
寂寂石壇雙塔影，沈沈鐘梵四天聲。  
再來誰共茶時夢，一個襦衫掃葉僧。

湖上雜詩

九秋積風雨，百昌未全零。  
堅冰一夕至，水天皆若醒。  
陰湖晚逾白，浮嵐斂純清。  
寒雲洩莽蕩，大嶽垂真形。  
平生愛雪候，砭骨神爲惺。  
謂勝春秋佳，廓然媚空冥。  
惜哉肅

殺刃空發霜天凋沈吟竟何俟獨掩梅花扇

雪淨高下峯幾點巖腹綠心知有佳處禪棲託修竹永  
慚枯定僧片偈了幽獨飯餘更何事洗鉢對寒玉耽游  
記坡老寺寺留芳躅衝雨洗足眠鐘動隨僧粥有如永  
嘉師妙覺參一宿高風今則無清景說亦足

咫尺驚藏山不風成斷渡擁雪聞雞鳴高梅見真度侵  
窗玉虬肥隔帳明寒寤飄花本無心而與妙香住清薦  
獅峯茶未可傾濁酷昨收病翁詩耿耿緘幽素儻來共  
扁舟蕭然此中趣

大雪後同觚厂至靈隱寺二首



萬峯爲雲吞玉龍羣無首飛丹翼絕壁縹緲開瓊牖一  
徑排蒼官鬚眉俄老叟寒泉未示寂猶作風雷吼眾佛  
相向冥嗒然我何有惟餘一鐘聲純白無所受  
松顛一夜雪山中十日雨寒滴浸諸天支筇入太古朗  
朗登寶坊密室茶可煮料無丹霞師木佛饒兩廡聳肩  
一觚翁白地參水牯我來真空回見淨不見土

游元墓聖恩寺

青山爲屏爲輔佐參天柏湧金剛座從來寺好在山門  
夷叔片言真道破和尚坐具闕幾許一藏經數驚誰作  
寺房五千四十八  
闕合一藏經之數  
太湖接几光動天帆影茶槍浮一箇

明眼未逢香雪奇日極長空憂始大紗籠舊題翁陸洪  
小人九四壁還流倏者滔天庸者全未死論定安足唾  
壁間懸四  
狀元書  
僧導佛堂看履跡彼何人斯嚴自課眾驚入

石跌印深豈知念念薄冰過吾人來游暫一飯流轉千  
生蟻旋磨出門還參柏子禪身倦津梁斜欲卧登天平

山同病老作

老楓臃腫春不葉山門萬古寒鴉色石巉徑微出奧幽  
下俯風軒見鷹脊插天積鐵磊嵬高迎面殊形動魂魄  
白公賦泉不賦石應知對此愁筆力病翁登臨愛絕頂  
選杖直上窮行迹局躋何必非人間縱目高空竟何益

我難問天伸不平更付撐胸千石壁

柏因社觀柏

身行鄧尉心戒壇非松非柏森屈蟠西山今生恐不到  
對此皮骨空汎瀾從來柏身尙勁直故鬪奇肆橫闌千  
神物中斷霹靂斧兩活不復資泉源我疑柏空壽者相  
忍辱節解降魔頭一物精誠有不滅奈何已死誣蒼天  
平生松風滿懷抱得茲魂夢雙牽連不須長短較南北  
啜茶倚樹鐘聲圓

石湖山

歸橈晚尋石湖渡春湍箭激風裂衫大聲震撼海潮寺

直下葉葉喧蒲帆巴僧肅客憩荒構了無

同游者王病老爲蜀人石龕立佛炯天眼特兆上吉

弛隳陷鬼域神儻欲福吾所貪地荒盜斤

祠宇空甍甍惜哉目成不得往香雪一樹

同人訪韓蘄王墓碑予陪散叟他游未果

聖湖春色付平章諸將中原事久忘欲訪

當年居士已清涼

王晚年自號清涼居士

光福寺與夷叔圍棋夷叔屬賦詩紀之

鬢底湖光萬頃浮極天帆影落茶甌半牀

一磴松風對奕秋逃世何心還逐鹿忘機

浮山說法歐公喜國手應知遜一籌

太湖石壁

飄泊東南天地間眼明初見洞庭山松風石磴無限好  
祇共沙鷗片刻閒

壽陳叟老及其配王夫人七十初度

遺直今黃髮貞元世幾遷如編周季略莫記伯陽年賈  
疏先憂切桓經晚遇偏不應采芝叟長作武夷仙

巖築孤臣老龍潛 聖學深行藏關運會位置費天心

豐羽存商皓斟元備傳箴恭聞 執業語歡喜爲沈吟

偕老同裘褐傳家祇禮詩人稱獻之姊

王可莊太德劭守之姊

仲弓兒去國違尊酒攀天紫夢思遙疇海棠宴遷約菊

花期

公所居海棠極盛王夫人三月生公以九月生

三月二十一日雨中奉母游七里瀧

天然大青綠畫稿芟荒寒我來春雨中白雲正未閒連  
環鎖碧流上肩白玉關濛濛入甕底舟外無人寰至人  
道非一或潛或在天動靜偶殊迹精誠原往還事業一  
竿重黽勉無窮年徒然詫高隱安窺龍德全我愧介推  
風奉母樂清漣夷猶更何事飯香蓬底煙

忍冬花

疏籬翠蔓玉交加雨後清香透幔紗獨表芳心三月盡

忍冬宜喚忍春花

和庶侯紀夢詩

人生實夢幻好夢良無多  
念念役貪嗔狎狎戰修羅  
我生未聞道塵鏡稍揩磨  
常以夢莊慢自驗心平頗  
疇昔夢一室清虛息吟哦  
窗外皎夜光梧影懸婆娑  
其明異常月滉漾怯金波  
又夢誰氏園滿植芭蕉窠  
葉大時卷舒翻露如風荷  
清涼瀉肝腑刹那洗煩疴  
景光似欲曙隔溪辨煙螺  
經年此兩夢異境難傳摩  
見君紀夢詩心證知無叱  
哀哉眾濁苦酣嚙紛癡魔  
努力事淨業把臂

期南柯

庶侯自寶應來並出近詩賦此贈之

棲眉一往瘁痕深如見平居悄悄心積懼可能澹沈劫  
抗懷猶自託微吟飽經霜醉楓初落小放晴寒菊可尋  
留命桑田能邂逅拚除百慮盡芳斟



蒼虬閣詩卷三

丁巳七月至辛酉

蘄水陳會壽仁先

湖夜不寐憶蒼雪京師

從來居處愛蕭森  
翦燭西窗夢一尋  
憂患未曾捐故態  
笑談時復見初心  
凋晨逢菊方知重  
獨寤無人竟廢吟  
涼月湖堂愁不寐  
到門潮落舊痕深

湖上雜詩

殘夢鈞天付混茫  
瓜廬仍占水雲鄉  
荷聲忽滿三千界  
成就南軒一榻涼

海棠花畔叫秋蟲  
枕簟星光螢影中  
長夜通明了無睡

虛堂流轉只荷風

雨颯風冷間暮鐘秋深樂事比春濃前山嘯處成鸞鳳  
曳杖尋知第幾松

相思嫋嫋託微波縹渺青峯入夢多手把秋荷問秋水  
夜涼風露定如何

梧竹蕭蕭翠鳳然鑪香淪寂入初禪從今乞與新涼睡  
秋雨虛堂五百年

玉樹繽紛儼作行瓊軒臨水碧茫茫更無人處憑虛几  
只薦秋蘭一朵香

願隨李廣近要離生死茫茫兩不知便赴湘流了無憾

靈均曾記目成時

九日同龍山居士觚觚九兄四弟五弟七弟兒子邦榮  
邦直煙霞洞登高

纍臣佳節苦相妨歲歲年年供斷腸破壁攀天一端午

傷高啼淚六重陽

五月五日在梁師傳  
家分食 御賜點心

急難驚逢復壁中鴛鴦今我不相從午君枯寂申君懶

肯到西山第幾峯

二弟三弟  
在京師

石鼎茶聲沸冷泉夢浮秋水欲黏天樓遲却與龍山老  
來共僧房半日眠

諸天龍象表嶙峋洞口蘇龕寂寞身絕代敬歛鄭重九

不應來作掃花人

洞口鑄東坡像顏日蘇龕鄭蘇堪有詩云洞口掃花人安知卽風漢蘇堪

每年九日必有詩嘗戲謂

子他時當呼作鄭重九也

### 次韻復園紅葉詩

淒淒露爲霜點點淚成血  
頑雲爾何心林際幻明滅  
儻過陸渾奇開此徑路絕  
萬物有歸根敢讓秋一葉

### 同復園游雲林寺聞鐘聲

鐘發空山甕底雷流雲萬壑  
共徘徊一心古廟香鑪去  
合眼諸天龍象來定入枯僧  
猶未塔坐深寒石欲成灰  
神旛淡盡殘陽影斷夢還憑  
再杵回

### 九月十九日同復園謁禹陵登會稽山頂

秋高游蹤寄禹穴雨中攜屐同謝公隔江故人具尊酒  
連朝聽雨酣烏篷山靈何心展重九招要二客凌高峯  
拏舟稽山次山麓始見淡日開矇矓廟門嚴扃掃行跡  
司鑰村媪來龍鍾廊陰碑荒寥石斷蒼柏鬱鬱含悲風  
唧啾萬蝠穴殿廡遺矢堂陛塵埃封巍然廟貌煥圭冕  
倣予氣象驚猶逢天翻六載祀典廢滅德斲本虛報崇  
纍臣私叩凜僭褻敢以孤憤伸皇穹帝光天下塞魑魅  
鑄鼎刻畫今難窮幽無鬼神明無禮禍烈洛水神其恫  
還挽暮色躋絕頂盪懷出沒千山濛聳身願附秋隼上  
放目滄海觀朝宗

節師見予九日詩寄語曰豈忘庚戌重九耶何詩中未及之蓋是秋節師入都弔張文襄公之喪予以九日邀同陳弢老集於十刹海廣化寺淒然相對二老皆有詩劉松厂爲圖記之今忽忽八載矣感賦長句奉寄以誌哀

庚戌重九那可忘置酒蕭涼廣化寺愁對先朝兩白髮寫圖題句供流涕是時新遭相公喪隔湖第宅喧哀吹江山彫疏老成殂桓公此座當誰繼九原可作應痛絕大荒披髮今何世元陰凝沍日暫開綺皓天留資倚界國門餘生竟重入訪舊仍返西州騎歲寒堂上作端

午玉盤角黍曾分賜豈知遜竄復人間去天萬里題糕  
字我 皇廣淵齊 聖祖天降殷憂豈無意蹉跎小忠  
甘九死回潮萬事空餘淚懷賢念亂數佳辰嘆霄一雁  
心相寄

九月二十九日同散原觚厂復園絜先游七里瀧

朝發山陰暮富春扁舟事業未因循碧山紅樹可千里  
故態狂奴能幾人妖亂久應腰領絕滄浪忽照鬢毛新  
遜亡東海情何極重上西臺意未馴

洗心閣中菊花開時復園來住一月將別爲詩四首  
早菊爭得露晚菊只得霜清嚴一氣中夜夜彌天涼秋

魂攝縹渺凝魄爲幽芳隱然墮孤月破此寒畦荒霜心  
與菊性婉變成相忘搖天一杵盡忽見初日光

飄香經幾秋託根暫尺地我花如日月歷劫食不旣深  
明洗心閣瓶巾在水次朝簾捲秋妝欲奪西子媚下榻  
來幽人一月同寤寐花魂忽入腕雪壁書奇字開御絕  
代芬別有經天淚菊固不易知知菊良不易

三春復一葉九秋蘊一葩陶醉有時醒屈飢豈無涯秋  
心忽蕩漾跨鳳僊如麻一笑睇靈修玉宇明朝霞願爲  
廣長舌遍向人天誇天胡移我情暮氣橫相遮歸哉禰  
心子澹對無悶花



相賞必至精愛極反成狷落落隱逸圖凜凜獨行傳凡  
流瀾終古花知應淚濺豈無同心人顛倒獲一見飄零  
自根蒂天地存畔岸兀然醉吟魂孤影若相勸

復園旣去夜坐洗心閣對菊偶成

一室留得秋好花天所縱夜夜下孤月寫影碎鸞鳳香  
寒初意滿情深晚妝重出門履繁霜乃知天宇空故人  
泝江舟獨續水窗夢

散叟復園先後來湖上同作富春之游過滬與石欽下  
榻海日橫旬日別後皆有詩至作感懷六首寄答

驟暖作雪候晶天忽蕭颯鱗鱗激黯波殊光動楹榻洩

雲揜長飈捲搏成破衲殘照萬古痕陣雁帶孤塔氣兼  
冰熾競色沍天地雜燠雨兩非眞仰立愁閭闔山鬼不  
見天嗒爾何問答吹息彼何心萬象困噶沓吾方有菊  
事蕭然一酒榼

世事雖謬悠花理固常定飄風極控搏獨立渠有命淡  
迴遺世妍靜益寒妝靚蕉身對散花維摩了無病山居  
接蕭寺深夜發鐘磬眞寂動者存人天感至聽出入一  
世間矯放孰爲正

世外青谿翁湖秋常一來執手隱嗚咽積憤高鏡崖攜  
作富春游疊錦隨帆開貪山厠俗旅雜沓爭舡隈絲風

繫九鼎釣者真奇才登臨賺我輩蹀影東西臺歸舟犯  
深黑星芒久徘徊尖風逆淺舵破席吟空盃卧廬追亡  
逋光景造冥哀可憐正則痛自詭昌黎諧連朝以詩至  
遠江墮予懷騎鯨水僊夢吞象螺螯涯

七里瀧有螺螯灣

連牆老居士淡味等僧粥日出吸蒼涼日入擁殘燭春  
枕飽驚濤緣空意仍感夙種哀樂深大千震微觸蒙莊  
齊是非駘蕩返不復不如守一者徑徑轉自足三年結  
鄰居微許同歸宿繫馬終一馳冰堅反成燠八表極蕭  
寥何寄償幽獨

生還竟相見破涕海日樓君真髭髮侶我慕必復傳

宋陳

无咎有書叢割片席朝夕坐萬流因依餘二子蒼天彼

何求連牀雞戒曉苦語不能休懶師一尺涕恂恍諸天

愁排閭豈真夢臣袖香烟浮含生憤所切義敢慚蚍蜉

昭昭九死志懼爲再見羞君去日森森我思積悠悠

湘纍故憔悴盛氣齊包胥揚已敢辭毀忠憤誰能踰飄

飄魯連子才辯讐昏愚順逆雖較然糞土安可朽滔天

非一族吾道其云孤心傷有難言所痛讎所愉覆車一

邱貉恢恢信非疏此輩亦何恤鱗鱗悲同魚江漢復狼

狽禍水趨故墟沈吟故侯言天意終何如

左文襄公嘗言禍起於廣

西其竇起于廣東嘉應之匪民今汪逆全股竄入嘉應禍水趨故墟以理以數言之滅亡可期齊人所言慶封

之朱方也出乎爾者反  
乎爾以此始者以此終

凜冽

凜冽成何夜沈吟非一今枕空千古事鐘滿五更心虛  
影侵窗竹頻呼警水禽悲懷定游思未敢入蕭森

過馬廠

徒快恩仇淺者爲自甘獍醢亦堪悲重來馬廠迴車地  
何處刑天第八師

次韻惜仲白桃花

綽約芳心與世殊東風無力可相扶亭亭誰記前年影  
緩緩猶期陌上姝希色真爲天下好有情難證本來無

雨苔月地清涼甚明鏡明朝恐暗癰

落花十首

微裊春衣寸角風依然三界落花中身來舊院元都改  
名署僊班碧落空一往清狂曾不悔百年惆悵與誰同  
天迴地轉愁飄泊猶傍殘陽片影紅

慵起朝朝廢掃除流塵生意竟何如巾因奉佛餘心結  
衣爲留僊有皺裾碧海青天存怨府綠陰幽草付閒居  
繞階泉去漂紅盡別館清涼枕道書

不盡相思瀉御溝恨來欲挽海西流珮逢獬犬憎方急  
黛損顰蛾妒未休早識漏因償漏果豈知深色換深愁

還鄉腸斷韋端已再見期期誓白頭

生小凝妝不自前忽驚飛絮共蹢躅殘脂未淨還過雨  
飄雪難蹤更化煙隔日樓臺成隱秀早時天地入中年  
新陰交影簾櫳暗風味聊堪中酒眠

啼笑難分態萬方九迴腸後剩迴腸餘妍猶作千春好  
輕別重經小劫長香色有情甘住着虛空無盡極思量  
惜芳片偈無題處夢斷棱伽變相廊

隱忍風前笑不成可憐珍重未分明早知芳緒游絲亂  
何惜深盃廣坐傾啼血空教勞杜宇爭巢從此付羣鶯  
他年本意誰箋得曾感東皇謁上清

曲奏涼州客未歸  
海天幾樹望依稀  
香寒舊夢仍留枕  
鏡掩濃羞竟換衣  
幸有同心連芷佩  
更無悔過到鴛機  
平章自是姚黃事  
多恐新來減帶圍

悄悄春心曉鏡慵  
披衣涼入五更鐘  
篋中鳳燭緘新淚  
天上鸞書問舊容  
韓偓有身酬雨露  
陶潛何病止醇醲  
偏反一樹思何遠  
萬一金華殿裏逢

又見青郊喚鷓鴣  
夕陽留影只平蕪  
易成薄暝愁朝暮  
半失東風事有無  
陌路相看憐故地  
烟竿直上笑靈烏  
樽前能會傷春意  
獨感東欄雪二株

歷劫風輪日夜馳  
賞心動是隔年期  
記從盧橘含酸後



看到青梅如豆時舞罷清光凝翠袖道成黃土作燕支  
昌昌春物尋銷歇芳意終然寄一枝

湖居與蘇厂結鄰次蘇厂韻

板輿佳日住湖濱春滿樓臺氣象新盈室芝蘭爲世瑞  
小園雨露得天均共看壽母傳圖畫留與他年說蔣陳  
海水羣飛豺虎亂約君物外永相鄰

梁節厂師六十初度

磊落平生志常憂莫致身淚枯滄海變任重白頭新  
龍德當潛躍天驕費擾馴至難真幸爾輔翼仰高宸  
辛苦湖堂語蒼涼已十年鋤奸終遂志留命似符天昨

掃銅駝棘曾開角黍筵長看松柏健忽覺歲時遷

才老天心見身肥義戰強先師有遺句晚節淬剛腸種

菊承餘露傾葵耐曙霜平生蘇太史兼燕后山香

先師  
關季

華先生贈節  
師有身肥  
義戰勝才  
老天心奇之句

乙老六十九歲生日祝詞

無位東軒老生心一是閒江河迴獨念天帝照孱顏問

道經三匝明宗示八還埃風閭闔迴昔昔夢同攀

海日常明夜高樓坐久如逍遙盈几字憂患疊牀書客

至言無隱居深澤有餘晴窗揲周易破涕一軒渠

敝帽欹徐整深衣絕屢縫外形從躡躅自哂託龍鍾霧

豹深冥見雲龍合漠從卿容  
醉書氣天語肖 高宗

晚遇過陶翟貞榮度歲寒志同  
眞法喜觀諦得心安渥  
澤三危露迴顏七返丹待舒憂  
國痲九畹藝萱蘭

夏五月與愔仲同年北游過天津  
主瀾老浪公兩家浪  
公一夕夢至一處層樓複閣琳瑯  
滿架一老人以所  
書樓額視之首尾爲五樓二字中  
覆以紙問浪公曰  
試射何字曰當是鳳字老人微哂  
曰君知五鳳樓耳  
揭視乃嶽字也浪公旣誌之愛其  
名屬予歸請太夫人書之因題長  
句於後邀愔仲同作且視瀾老  
插天嵯峨起寸地隱然不平爲何  
事浪迹七年江海人

心芒一片春坊字名山學道望久絕射虎殘年儻可致  
干公魚壳爲小鮮益陽烹狗真異味平生四海胡開州  
悲來同作汗漫游天門晝開詆蕩蕩側足不得三日留  
違天之血可爲碧違人萬口嗔何求高曾祖父服食地  
今來姓字愁探喉天下賢豪惟二李安邱複壁恩難酬

髯也窮愁天地窄

瀹老自號髯李

浪公意氣幽并秋君夢仙人

示神翰大書五嶽懸高樓莊嚴百級出彈指蓮花日觀  
雲交浮滿堂丹翠掃不去暫居一日真忘憂鄧樓卑凡  
不足道

梁鄧郁有五嶽樓

漢武真形仍畫稿高懷恢宕移我情

梁月夢君顏色好我居南山多白雲勞人夜夢空紛紜

山中黃石何齒齒曠世難逢滄海君

戊午七月廿三日蘇尸招同疆村長劬澍齋游龍井登  
棋盤山有詩奉和一首

湖堂扇殘暑山中淒已秋樓欄下黃葉新悴故不留驚  
烽隔旦暮塵語破巖幽死生一大事歷劫成虛舟荒龕  
出盤磴袖底長江流海雲足瘡雁息機怪閒鷗

時有西  
人傲居

棋盤山境地范身世曠憤皆妄浮清游擬佳夢暫蝶吾希

周

九日同疆村病山兩侍郎悒仲閣丞強志弟焦山登高  
漫游選地作重九焦山佳處會留庵載夢扁舟倏驚起

壓篷秋翠堆晴嵐松寥閣開置牀席持螯呼酒江動簾  
我難破戒繼山谷舊京風味題糕諳歸來有盃祀忠敏  
嚴裝屹立如遐瞻當年陪讌盛賓客招魂一老摧霜髯  
盃爲節師所建抱巖嫋嫋信幽步極目煙樹窮淮南僧房隱几  
待落日江聲上引風雷酣晚鋪重雲獻日脚海門深窅  
開鏡奩橫天一抹展奇翼飄飄赤鳳仙人驂浮生萬事  
此不負逢辰一笑良非愁歸山我無真實意但剽絕景  
供遲淹暝樓歸倚盪明滅幢幢餘影搖鐙龕

重陽後一日同人定慧寺山門夜坐

晚上峯頭觀落日霞表詩情極孤縱夜來山門踏明月

呼吸風雷轉空洞  
松杉挂月是何年  
寫影驚濤法梁棟  
干涸萬激聲合時  
門內霜鐘初發甕  
坐階五人相對閒  
撫掌山靈撰幽夢  
欲訴煩冤訪彭屈  
儻出琴高波裂縫  
明月清風孰爲我  
顛倒悲歡笑搏控  
不如遺世老磐陀  
鎮卧奔騰了賓送

定慧寺山門看月與彊村同作

天水與階平  
山門坐月明  
檣鐙移殿影  
蟲響出江聲  
語寂鐘初發  
宵寒茗更清  
浮生苦勞轉  
淨業羨支更

焦山紀游雜詩

朱老悲秋強陟臨  
病翁題壁感重尋  
孤吟已懺貪多習

百劫難灰愛好心

松寥閣中懸病老十年  
前所書楹帖堅欲易之

遺筆椒山膽氣麤綴題院體益陽書丈夫未死誰能料

留取他年說二胡

胡文忠公跋椒山卷子小楷精絕  
惜仲亦誌年月於後書法極似之

解咏荆軻處士哀辛陳投契並豪才申君所學惟朱子

却對江山欠玉杯

朱子游山常攜一玉杯  
遇勝處輒流連盡日

枇杷可啖書可讀欲伴海西寒病僧聞拓殘碑易香飯

暮江聲裏隱登登

蘇牆月影海棠枝繞榻蟲聲來和詩乞米隔江王太守

先生謫味是清時

還石山房節  
先生讀書處

夷叔聞馳九陌塵看山宿諾竟逡巡爭棋舊夢憑誰話



淒絕重來作記人

甲辰歲與端忠敏公來游  
夷叔與蒯禮卿爭棋竟夕

心游碧落睨蛛窗定入枯禪背佛缸爲欠聯吟散原老

苦摹澀體入西江

同人戲彷彿散原體聯句情仲  
有睨客懸蛛就紙窗之句

魂夢山樓戀夕暉前生結習是還非橫身滄海沈憂患  
一去名山更不歸

同人登高後至白下訪散原老人

聞翁止酒吁不樂得見開尊病却忘老屋拈詩妨燭短  
鄰園分榻破苔荒劇憐燕蝠朝昏促喜近鬚髯意興長  
還約湖州載諸老萬梅深處補秋觴

蔡甸上關師墓

遺禍重來又四春蒼蒼高柏鬱嶙峋  
聲吞注海經天淚立盡蕭風淡日晨  
難答生成何敢死暫稽蛻委已無身  
義川晞髮今頭白相向銜悲更幾人

予因事至滬寓同武家與莘田相距半里許予歸杭未  
明而起未作別莘田追送車已發矣次日有詩來和

寄一首

衝曙攜琴片月孤

何君梅生新送予琴

傷離未敢過門呼殘年垂

老他鄉別濁世窮儒送顛倒狙公常賦芋飄寥雁

唳遠將雛

莘田

北游

寒江何日扁舟發解纜如聞杜

老吁

莘田將

觚厂先生輓詩

世短意空多脫屣苦不早勞生甘息機已復傷病老昔  
同湖上游君選南湖好我營茆三間君亦架檐椽新瓦  
見炊煙一飯笑先禱衰遲迫婉變竊冀十年保君多身  
後言談諧破煎惱我習陵谷悲常恐跡如掃安知隔晨  
別蓋棺事卽了恫懷驟驚觸未信斯人少衝凍梅始花  
怪事出白旒

身世惟殘山供眼傷春心閒居費幽屐佳處分微吟摘  
茶斲獅峯衝雪僵雲林僧樓飯疏雨樹屋眠潮音還極  
汗漫游江舟縱攀尋上餐子陵魚下招真逸禽往往嚼

佳句却病愈苓葠我拾后山餘君痼簡齋深難放一  
過索癥契虛襟哀哉所歷妙迴相成蕭森良辰誌一往  
腹痛當何岑神傷後難繼坡語識我今

殘年所託命濡煦友生仗好客君所同傾耳空谷訪往  
來踐籬落兩家羅酒醬近傷疆村翁老懷西河愴簡招  
強來游談笑詎云暢豈期異路悲轉先羸博葬湖濤挾  
風雨鐙影淒屬纊死非婦人手此誼古所尙相送爲高  
賢君可無快悵但遺後死哀酸膈何時忘温温度歲約  
翻手忍相誑遲來我何言相向聲一放

君逝時家人  
皆不在側

知君有遺戀南湖與青溪亂後歸草堂藤竹當路迷蒼

莽度隴悲暫洗青玻璃萬事餘挂眼手植牡丹畦常約  
當花時一醉爛若泥對宇散原翁懸寐荒城鼙攜酒鄰  
園花吟入萬方啼從茲斷經過殘楊付烏棲結鄰亦何  
好同此積慘悽今秋重九辰偕朋破幽蹊兩翁清若鵠  
靜影相扶攜暫榻尙餘夢陳迹安可犁翁當序君詩契  
分歐梅齊報君我何有觸淚書新題

謝梅生贈琴

有求不得望不見秋空碧落長悵悵人生何故撒天紀  
焦髯惟石環孤吟同心幸期戴安道遺我焦尾仁盲瘖  
試彈一曲破幽涕若哀窈窕迴高深孤山處士去千載

零梅槁瘦愁至今何當坐君起孤奏引袂馨魂還故林  
除夕對菊口占

秋菊真佳士同傾餞歲鱗相依忘甲子不覺見春王

己未正月二日偕婦及絜元覺先兩弟至靈隱寺

己未

千皴萬透飛來峯散花一色真神工立雪溪山最佳處  
歲朝一笑家人同紅亭著我玉峯底風柯冰澗交笙鐘  
清寒肅肅振衣袂屢乾瓊液玻璃鍾前年同來記俞老  
示疾彈指還虛空人事往往遭扼抑惟有清興天難窮  
人生行樂貴勉強斯言吾取六一翁欲界清都不常見  
天機所赴爲豪雄沈陰晚開入霞氣連霄萬疊生微紅

涼風爲報故人憶題詩正在明光宮

雪後寄懷梅生

水凝山欲無枯桐坐隱几寥寥寫予心皚皚通萬里坐  
我天地初仙佛皆後起一花象帝先孤梅誰氏子

清華園卽事

夢落殘山剩水邊故宮禾黍入荒煙

園近圓明園故址

飢餐尙

藉遺黎粟

校費係美利堅退回庚子賠款

渴飲仍分御苑泉

玉山泉水引入園內

枝上空啼烏啞啞原頭又動草芊芊倚樓看劍終何事  
白日青春祇惘然

次韻弢厂師傅見贈

無私聽水兩高齋

張文襄晚以無私名齋用蜀志水鑑無私之義

落落清流見

傑魁金鑑千秋天不憖巖香一樹晚應開酬恩敢替先  
臣澤負國常存未死哀漫浪詩篇忍終古深心還祓散  
檇材

與茗雪圍棋

餘生相見剩枯棋長夜厭厭與子宜猶待驢年穿故紙  
劇憐蠹化困膠絲夢回清簟疏簾處劫盡中央四角時  
客去燈殘心語口空梁落月始應知

贈石禪

落寞誰知楚兩僧早空梁肉謝何曾生涯勞軫且炊飯



事業煎茶還倚藤  
一夕相思滅明月  
百年滋味話深燈  
清涼未捨人  
天果此是禪機第幾乘

可羨坡涪兩謫仙  
相攜小德小斜川  
生兒幸免雍通拙  
編集還期劉白傳  
衣鉢窮工誤來者  
燈窗鄰近夢何年  
殘生畏聽傷神語  
聊寄新詩一蹶然

石禪書來有悼亡語其子新學詩

### 惘惘寄石禪

惘惘經過意未甘  
槐陰門巷舊宣南  
從來大好應大慙  
所見不生良不談  
獨旦敢辭知日罪  
亡羊未悟挾書慙  
逡巡待共濡需盡  
珍重涼宵對一龕

### 湖齋坐雨

隱几青山時有無捲簾終日對跳珠瀑聲穿竹到深枕  
雨氣逼花香半湖剝啄惟應書遠至宮商不斷鳥相呼  
欲傳歸客沈冥意寫寄南堂水墨圖

蘇堪六十生日

白日當天三月半萬人如海一身藏使君留得堂堂去  
四海都知鬢未霜

罷盥盧奴酒自斟幾人出戶震微箴知君執拗從無悶  
一往硜硜媚奧心

波辭知蔽遁知窮末世逃禪等捉風得正由來出生死  
先生密語在檀弓

花近高樓竹滿廊園基樓勢恰相當幾回聽雨疏簾坐  
消得人間一味涼

斂手孤吟氣更新閒居歲月鬱嶙峋何窮蓋世回天意  
付與黃州陶子麟

種松日夜望松高滄海沈冥一世豪領取十年真實意  
與君洗耳聽松濤

蹀躞三搗意未平涼宵願曲每同行相思只在歌聲裏  
解事今誰青兕生

談藝論兵兩不窮掀髯會起抱冰翁何時更上南樓醉  
歷歷晴川落酒中

次韻病老樟亭

納納乾坤著此亭，細書深刻記初成。  
寒山落葉今可掃，獨樹畸人來與盟。  
茅把遮頭謀已慙，風枝動日世何驚。  
便須攜枕卧長夏，一任浮雲流太清。

惜仲年來酒量稍減感贈一首

海竭天荒意未灰，芳樽漸淺足低徊。  
奮豪精銳猶摧賊，絕代悲涼自惜才。  
用胡文忠尺牘中語何事牽懷迴斷夢，  
記同忍淚酌恩杯。等閒甯解吞江渴，  
待脯鯨鯢製膾材。

次韻復園

知君仍世不忘僧，生活清涼得未曾。  
微息周流玉池水，

定心起倒剡溪藤寄來江艇千峯色涼入湖窗一穗燈  
百輩滔滔浪淘盡故山安隱白牛乘

何梅生以荔枝三百顆寄餉報詩四章

寒儒氣蔬筍亦飽風露鮮藏神昨相報玉肪盈菜園清  
晨一書至說荔甘我涎如披米顛帖如許載一船密語  
緘密意馨密在我邊啟筐裏新葉一一頰珠圓天然冰  
雪膚絕代姑射仙生心色香味破我金剛禪

百年相見遲一笑同臭味空持歲寒心莫報佳實餽去  
年貽素琴壁懸寫空意但味老蘇詩知音彈可廢林珍  
雖細物發興見深致及時謝芸芸孤往極所恣聊破重

深阻芳香表同嗜區區縮地心中有違天淚

東坡昔遷謫海角挂孤光林家賞紅紫翟舍叩昏黃義  
井獨後汲至味逡巡長偶過荔枝港纍纍照滄浪父老  
欣見留及食邀過嘗海南一卷詩字字含幽芳無入不  
自得火宅生微涼披猖今何世敦俗忽已亡溼沫相响  
濡良厚誠可傷

襄陽有耆舊採桑逢佳客坐之桑樹底曾不廢採掇不  
知何所言酬答朝至夕古人足風味難爲不知說何當  
造君廬晨露正可摘飽啖三百顆樹下同列席清坐盡  
日影兩忘語與默那能知許事聊用自怡悅

病老以自撰姬人蘭嬰小傳寄示卽書其後

無出非我憂奉主自歡喜嫡男就傳書出入謹護視童  
烏秀不實惻怛易初旨禱佛期抱送茹素但蔬水食淡  
甯無傷痼疾遂不起遺女在襁褓老淚酸怙恃此心固  
堂堂了無世念滓生心無所住所住皆天理已矣翁何  
悲卓哉善女子

張夢蘭先生以南翔羅漢茶見餉其太夫人手醃也相  
傳茶種爲達摩祖師所遺止附南翔寺十里有是茶  
祖師來時有鶴南飛故以名寺云

震旦花開第一祖飛錫會過南翔地當年有鶴嚮南飛

至今猶認南翔寺了知攜來無一法但挈霜蔬飽禪味  
有情下種自然成十里森森鬱葱翠世人知味不知名  
有口但宣羅漢字夢蘭先生今白頭腹笥便便教童稚  
有母有母慰行役擷茶手醃親付畀分甘布慈乃及我  
謂我依然酸餽氣開瓶入齒冰雪鮮一笑西來得真意  
何殊拾得與寒巖殘茶竹筒勞餉餽北來我亦致鹽齏  
臨別辛勤吾母製打包千里負晨昏寸蔥每飯空凝淚  
安得此身便南翔薦食高堂親奉侍

同鞏尸畫寒山拾得圖戲題

寒山本寒子國清逢拾得殘茶貯竹筒朝朝就來食對



跌廚竈煙吹火燒落葉有時步長廊一笑驚霹靂前後  
眾三三但道狂癡絕何來舂米僧出山偶饒舌遂動輿  
蓋徒入山窮追躡隱巖遂不見松風寒凜冽臨去復何  
言笑指但曰賊

張銓衡爲其母壽建塔摹刻柳書金剛經嵌其上徵詩  
四萬八千偈瀾翻浩若大海難窮源黃梅爲示第一義  
直證惟有金剛禪寸心合尖無所住無縫之塔生雙肩  
太君精持數十載攬揆止殺仁孤寒銓衡居士報阿母  
鑄經建塔長生甄光華七級出三界燉煌遺蹟昭誠懸  
非經非塔非莊嚴阿母口唵生青蓮以諸花香散慈雨

廣覆大地兜羅綿方今梟豺塞六合佛救不得悲沈淵  
鐵圍山高幾千丈業力陷入無中堅願揭斯義告來者  
悲懺涕泣爲洗滌誓承宏恩度萬劫心與母壽無窮年  
小人持經爲母病冀仗經力迴人天心同願微竊仰止  
感動歡喜交回旋

題海棠木瓜

節師自西陵歸持贈

芳馨入握自移時誰報瓊琚絕妙辭從此淵材可無恨  
天香新發萬年枝

題楊園先生遺像

孔子孟而還一藐孤貞元多難啟純儒寂寥天地今誰語

夢想寒風伫立圖

梁文忠公輓詩

先帝幽憂極攀酬有一臣心枯廿年事史見十分人遺  
孽圖仍蔓 崇岡植已新向來訴冥漠慘淡忽相親

命繫三綱重 褒逾九錫榮易名孚異口恆性動蚩氓

鵠拜傷臣甫鸞訛痛屈平區區異微尙一世詫孤行  
瞻拜思初地天泉到此時誰承江漢學相望柳堂祠

遣祭昭先見 宣哀惜愍遺深宮終始念占復九原知  
贈盧鴻滄

皺面觀河十七年相逢一笑故依然人天長者稱流水

有虫 言卷三  
三三  
文字遺民託鈍禪未懺多生蔬筍氣那知許事蛤蜊前  
與君更結連牆約拄杖南屏落照邊

爲王病山侍郎作飛鳥山館圖并題

家住江源行入海壯游昔有眉山蘇却登金山望鄉國  
夜江光怪驚棲鳥高才盛年世清宴歸山誓水甯非誣  
多難方知太平好或出或處皆裕餘明季流寇禍至烈  
易堂尙可安琴書團瓢厯厯七十二卽今何地容潛夫  
天遺地子幾耆老削迹夷市踈窮廬神州莽莽塞荆棘  
三湘百粵無完區引繩而絕必有處激發禍始鍾巴渝  
勢劫馴良化豺虎閉關猛噬安逃逋中江老人髮過耳

家屯與國齊瘡痛十年千憂犯真宰白頭形影酬羈孤

相過朱

古微  
侍郎王  
丈息存

慰朝暮濡沫那得忘江湖覆舟之

山渺天際鱗鱗萬眾真爲魚千重萬掩愁肺腑濺淚驚  
心空友于眼穿望斷歸不得偶觀畫稿疑鄉閭何時聞  
雁空冷峽且視飛鳥山館圖

自辛亥八月乘京漢車南下今歲四月復由此路北上

### 感賦

口銜石闕腹車輪衣上重沾京漢塵鶉首十年仍此醉  
雞聲獨夜對何人滔天終有還清日誓水難酬未死身  
山色憑河青到眼太行何意尙嶙峋

過良鄉

良鄉燭粟佐浮卮猶記城南退食時一代朝官心死盡  
傷心容有李和兒

過長辛店

此是京畿第一程長辛店字記分明普賢行願非吾分  
且辨長辛過此生

六月同愔仲出都過濟南遇劉潛老

事到無人見古人幾回離合助傷神頻年解識勞生淚  
只有青徐道上塵

與愔仲飲水閣

明眼荷衣是水鄉秋深花木尙昌昌織蟲聲急曾何慕  
聽雨心平暫得涼塔外明虹生指顧林間新月隱微茫  
相看飛動平生意消得沈冥半日鶻

秋日同愔仲劍丞病山疆村勉甫游西溪訪交蘆庵秋  
雪庵遇雨歸作西溪泛雨圖題四絕句

閒居久慣西湖好棹入西溪路轉幽萬頃秋陰壓秋雪  
一天涼雨灑輕舟

病起西山更有情若爲青眼慰勞生雖然不作傷心碧  
一片蕭疏畫不成

寒鴉流水繞孤牆訪舊重來舉葉堂祇共癯僧尋野飯

會無秋菊薦寒香

英氣清愁總作塵一盒同證法華因

秋雪庵近法華山  
湖州周君夢坡築

祠其側祀  
歷代詞人

當年絕妙箋詞手應作山門接引人

同苕雪游南山別後寄此并簡浪公

與君攜手入南山得意青紅杳靄間石磴坐談齊物論  
松風涼屬片時閒茶甘僧院嘗泉遍衣濕煙嵐帶雨還  
此去應過浪公宿翦燈尊酒話開顏

寄懷輦厂清華園

簾深氈擁入嚴霜一夕懷人古月堂散步長廊多落葉  
挾書講舍易斜陽園中水木憑誰記

水木移爲同  
人作畫之所

別後



鬚髯應更長細數歡悰已陳迹問君何寄慰蕭涼  
腐儒生計破天慳行樂端能出冷閒酒渴盤空煮秋菊  
燈殘風吼畫寒山絕憐一載同形影似與孤雲共往還  
擾擾京華冠蓋盡不須憔悴損離顏

次韻石禪

護鉢南來命一絲紛紛趁眾豈能移助垣無用資山鬼  
對客何心拭涕洟蟲沙猿鶴各成就凡聖龍蛇皆住持  
栖皇人海一迴首流浪滄溟空所期

買石四首

積雨商歌擲地哀更誰屐跡破蒼苔束薪澗底燒寒葉

春山隱居詩卷三  
三  
猶有山靈裹飯來

妍醜天成各有真  
連茹頓覺草堂新  
由來野馬塵埃外  
何限嶽嶽磊落人

梅徑端宜玉骨斜  
亭亭扶住亞枝花  
從知一往清寒夜  
冷落仙人萼綠華

一旬九雨養雲根  
漸活苔痕淨  
流痕獨畫秋山通  
縹渺塞窗雲氣坐昏昏

夢中至某寺醒記以詩

寺門長帶碧雲開  
過雨松花欲掩苔  
江上峯青人不見  
石頭路滑我重來  
依然花笑會相識  
微覺經聲未淨哀

貪近危欄憑夜色打崖足底海潮迴

和乙厂師二首並簡悒仲

未許津梁倦還成示疾因藥囊猶待檢詩筆已相親橫  
氣驚巫日華顛掃穢人何時報飛衛真見蝨如輪

寂寞吳趨曲淒涼越絕篇羣迷塞蚩霧短景促羲鞭意  
鈞連江海天游閱歲年楓香起沈滯端望玉堂仙

除夕作數點天心圖

深擁梅花野雪廬開門寒碧斂重湖枯毫猶上燕支色  
獨寫天心數點圖

次韻悒仲同年元旦試筆

東坡詩集卷之三  
三  
門對南山寶鏡懸  
焚香心耿一鑪煙  
湘纍極目傷千里  
幕府吞聲忍十年  
柏葉樽前還獻歲  
梅花枝底忽逢天  
遺民猶戴王正月  
比戶春聲笑語闐

惜仲同年獨游湖上園寄示二律次韻寄懷

海棠吹雪送餘寒  
日日風沙怯倚欄  
客舍夢過三月暮  
帝城花負十年看  
遣春如此甯無恨  
縱酒何人惜未殘  
却枉尺書詩句好  
寫愁猶得暫愁寬

遙憶湖園獨破苔  
殘春如夢靜池臺  
冬郎易得芳時恨  
昭諫猶淹記室才  
雲過龍鸞聊寫影  
風高燕雀漫相猜  
花邊紺鬢低吟處  
一片飄紅可得迴

詠史二首

晉公早許濟時才，少主恩緣數世來。  
跋扈強藩能駕馭，艱難天憲復昭回。  
六年行意身何憾，萬死投荒世可哀。  
莫謂平泉猶未達，我心陵谷尙難灰。

孤臣頭白醉鈞天，蓮炬金杯照夜筵。  
問答玉音猶在耳，淒迷春夢已如煙。  
肆奸檜賊空遺臭，僭號昌奴豈自全。  
二十年來家國事，傷心成就一胡銓。

夜行臨安道中

肩輿入山疏雨斷，暗月頽雲微。  
可覩泉流淙淙響，深竹插天落落峯。  
四五樓殿參差起，巖腹鐘瘖梵寂絕。  
僧侶

長橋千步玉虹卧吟嘯松杉雜龍虎仙棲咫尺動魂魄  
絕世清寒入肺腑夢中所至今再來除却山靈誰可語  
護龍亭

攢列萬松青山開孔雀屏嵐光出膏沐仙子示顏形疊  
石寒溪沸憑巖古木猶欲將泉洗眼小坐護龍亭

宿龍泉庵

月黑度雲根高寒不可捫全凝蒼靄色始覺夜山尊竹  
雨穿輿入溪雷隔嶺奔欲投僧寺宿燈火辨松門

登天目山望雲海

山僧茶飯家常事過客驚人句欲攜出壁蚪枝兼石大

裹身龍氣壓天低，泉飛寒灑秋衣濕。  
鐘落初分咫尺迷，離合神光時一見。  
羣真端冕半身齊。

雨宿昭明寺賦呈同人

我藏仲圭天目松，做篋龍飛驚壁破。  
分寫第三第四株，勝蹟吳倪世傳播。  
夢想此山三十年，佳游往往逢抑挫。  
初喜官長靈運來，邀往攜朋飛雨墮。  
已驚平生得未有，鞭鐙回旋莽屏佐。  
山川奇麗自千載，袍帶天人往無那。  
晚投下院鴉噪林，晨躡層峯蟻旋磨。  
盪胸雲海空復空，夾道曾無松一箇。  
出沒騰拏影飄忽，作鱗之而一瞥過。  
眾仙紛紜擁靈君，笏玉微茫受朝賀。  
中峯身到竟何睹。

天眼真形妨筆腕鐘聲喚客到寺門淨竹交加不敢唾  
插天殿角時有無敷榻虛堂挾雲卧幢幢燈影忍寒滴  
擁鼻吳吟仍唱和安得出尋第一松樹王突兀眼中大  
觀瀑亭

百丈飛泉挂一亭巖欄危坐俯冥冥松身獨表諸天白  
石氣寒噓太古青澗草無心來鳥啄梵潮如夢起龍腥  
元壇真宰愁何事滃湧爐香會百靈

昭明寺夜坐

我今天目來坐雨三日飯乘霽暫登臨勝景歷未半禮  
佛眾則同攀天結孤願韋杵定何心秋雲暗前殿

寺爲  
韋賦



道場

鐘樓口占

平生最愛鐘聲好  
今上鐘樓更看山  
樓下鐘聲纔一杵  
白雲幾度幻蒼顏

垂虹亭觀瀑次惛仲韻

絕壁挂天琴  
泠泠調奇變  
天風海濤迴  
終古輪一澗  
落帽石梁底  
愧乏秋翮健  
大珠小如霧  
逼視甘唾面  
茗溪潤百里  
出谷幾迴旋  
安能雪中來  
瓢沍冰可嚙  
白繞玉龍飛  
爭舞花萬片  
絕景非易攀  
應讓寒衲見

過齋廚偶作

清晨齋廚香瓜蔬紛在几剖竹走滔滔洗菜天目水積  
薪高若山不嚼一粒米辛勤吹火人日供干食指煮飯  
吾未能何暇徹生死但乞焦飯回堂上獻甘旨

十九日上分經臺

名山遺蹟表蕭梁開卷猶疑貝葉香口偈瀾翻原了了  
人寰霧合自茫茫孤生拳竹初宜杖悲誦殘僧已穴牀  
如此登高應不負分經臺上展重陽

鐘樓晚眺獅子峯

鐘樓斜倚山一角勢成注坡千丈落其下諸峯盡培塿  
劃開天鏡天如削新霜點樹疊雲錦絕頂僧巢飛鳥託

大筆天然斧劈皴沈吟欲畫知無因安得清湘瞻尊者  
山門來作鳴鐘人

宿西峯禪源寺以雨甚不得登絕頂歸途感賦

雲龍氤氳華蓋天呼吸海氣迴星躔勢尊蓄厚合茫混  
神祕未許竅雕鑄我來衝雨青冥上攀援綫道空茫然  
行行眾山陷無底雄燾始見中峯懸昭明寺藏飛瀑杪  
山門松樾知何年經臺片席分寶誌千劫永度金剛禪  
乃公布金半寰宇天人漏果眞唐捐東峯三宿氣森穆  
夢魂還躡西峯巔縹緲幽出奧轉平曠時見如火霜林妍  
蓮花峯底壯壇宇微惜混雜同市廛臨濟宗風久衰歇

巖棲支竈餘唐瓢飽聽僧堂一夜雨空仰絕壁千重泉  
黑入太陰動鱗甲何由致我神松前還辭清都入塵世  
送客起伏千蜿蜒勞生九死肆游覽暫獲已幸遑流連  
扶輿百里一回首九天尙蒸香爐煙

慈勝庵同人步月

散步晴秋夜荒庵喜再過草寒蟲語細殿圯月明多懸  
瀑存殘夢聞經斷苦哦看山茲發軔事業豈蹉跎

題孫隘堪南窗寄傲圖卷

南窗容膝安北窗卧風涼棟宇自魏晉斯人自羲皇一  
世沒滄海微木墮渺茫嘯傲復何心有寄乃非狂誰歟

同此趣今見孫平陽所未似淵明讀書精且詳龍鱗積  
歲月三徑猶未荒圖中義熙人顧影何堂堂惜無冬心  
翁爲圖辨髮長

蘇广以予詩稿付刊感賦

捲地秋風沸砌蟲煎愁那復計窮工還留一集鳴殘世  
何異微雲滓八空彈遇知音原可廢恨當銷骨尙難窮  
飽蟬覆瓿渾閒事負國餘生罪已叢



蒼虬閣詩卷四 壬戌至癸亥

蘄水陳曾壽仁先

題圯下授書圖

小試他年帝者師重輕舉足莫相疑一君萬祀秦皇帝  
氣盡先生墮履時

忍辱爭先卽素書不須傳會到陰符他時囊底二三策  
蓋世重瞳一匹雛

張忠武公挽詩

慘澹留臣鵠英靈殿本朝心同狄梁苦氣奪本初驕屢  
蹶存初志孤擎撼眾搖表忠勞 聖主遺恨滿重霄

蹄跡交中國威祥見 帝畿歡騰萬黎首天靳一戎衣  
夢入龍霄迥防疏蟻穴微堂堂照千古甯抵寸心違  
進退能無據危疑有至難本非孤注擲俄已眾盟寒狂  
獬音何擇黃駘罪可寬百年蒙 帝澤一代愧儒冠  
事急公難待形癯氣尙盈受言無縮滯同難見平生躑  
躅西州騎淒涼北府兵乾坤日欹側真覺腐儒輕  
過沈乙庵師故宅

殘雪瑩然天慙遺淒風門館再來時十年噩夢何曾寤  
一往幽憂欲付誰道廣可知心獨苦意多翻促病難爲  
博通奇字惟忠孝莫漫悠悠費誅辭



落葉和聞賓門

瑟瑟西風獨閉關  
平林一夕損霜顏  
秋魂未冷冬青樹  
畫筆空存淺絳山  
楚澤芳心紛自警  
燕臺倦客幾時還  
退之驚起沈瀾夜  
飛轍青冥未許攀

碧怨無情尙有情  
哀蟬從此悟浮生  
歸根轉綠非身待  
託命題紅抵目成  
曾見蔥蘢原不悔  
相逢搖落亦堪驚  
歸來背枕寒燈夢  
猶誤巴山夜雨聲

白秋海棠

通明玉殿望沈沈  
猶有孤花照夕陰  
風露可添惟素淚  
胭脂難畫是秋心  
雲羅重疊衣成綺  
月地淒迷院更深

春睡幾時驚夢斷不堪還續斷腸吟

題徐湘蘋女史花卉冊

法喜迴天出玉閨暮年翰墨寶桐溪妾臣力薄君恩重  
不數陳留董祀妻

潑墨猶疑淚未乾一花見佛事辛酸名園拙政珍遺印  
漫作吾邱倒好看

鬢雪驚教少婦知傷心一例警霜幃絕憐並蒂山茶句  
作記微同李格非

題王景略貨畚圖

少賤多能只自供風塵作苦異疏慵卿才豈與姦雄並

貴值還驚老父逢  
漫笑耕田興白水  
從來織席有真龍  
天人一例悲屯晦  
出手猶堪貫蝨胸

題五月騎驢入華山圖

華山之高孰可攀  
青崖白谷非人間  
天生芳臭不並世  
待時斂翼歸名山  
山中師友足磋礪  
讀書被褐方悠然  
大雲舒卷一千里  
三峯屹立凝蒼顏  
僭竊當塗迄典午  
避秦見志淵明賢  
草付風雲偶會合  
猶可牽連三十年  
千年一清聖人在  
河流到海何時還  
六朝五季並亂世  
持校今日猶非艱  
五嶽崢嶸在天地  
渺然人物空雲煙  
漁洋山人際盛世  
賦詩送遠摹高騫  
戴生務旃畫筆好

奇氣還仗詩人傳我事丹青易升斗日儲月斂惟憂煎  
聊圖故事寄愧慕嵯峨寤寐長周旋何時真人定六合  
墜驢絕倒希夷仙

幽居

運水搬柴自給供山中樂事少人逢偶先睡起鳥聲靜  
獨見開時花意濃雲氣難消當戶嶂龍姿最愛倚廊松  
年來真識幽居味洗盡凡心夜半鐘

殘梅

窺牆綽約照浮卮添入傷春鬢幾絲絕代何心怨零落  
誰教偏作最繁枝

挽曹君直

君遺言以朝服殮示不忘君以衰麻入棺恨未得終  
事太夫人始予與君校錄內閣書籍多共朝夕以君  
方從某爲校勘之學未深談也國變後君大節不苟  
志氣彌厲始愧相知不盡而某美新勸進名節掃地  
師固不必賢於弟子嗚呼豈僅不賢而已哉

校書東觀共昏晨謂是駒駘一輩人豈意波流沈一世  
始知抗激有孤臣失君交臂吾何闍嘆血呼天迹已陳  
未了男兒忠孝事蓋棺遺語劇酸辛

寄高穎生

北征何叟渺雙魚歲晚君還反舊居多難故應聲一概  
傷離且願立斯須亦知咫尺慳相見猶勝迢遙苦寄書  
凍入湘絃燈影爇半窗殘月渺愁予

入世

細寫溪山目未昏一檠明滅與溫存男兒入世終何有  
只有平生未報恩

人日

可憐明日逢人日誰說今年勝去年聞道梅花滿山寺  
只親爐火怯吳棉春盤強酒知衰近倦榻拋書與恨牽  
惟有庭前數叢竹不關晴雪故依然

美德孰如羊

美德孰如羊  
跪乳異羣畜  
嚼噉只草卉  
曾不甘血肉  
臠既已肥捨  
身飽眾腹告  
朔存禮意獻  
公稱旨蓄留  
皮亦宏濟禦  
寒生煖燠嗟  
予蝨世間賴  
此免瑟縮陽  
春大地回質  
袍仍易粟維  
羊實無罪於  
人惠已足奈  
何言仁者乃  
易牛穀棘佛  
言人爲羊羊  
人遞相續吾  
儻司轉輪平  
反首此獄

秋露

秋露白團團  
秋花繞石闌  
到根滋嫩菊  
附蒂潤修蘭  
叢濕香難隱  
宵長淚不乾  
恩膏沁芳髓  
只是帶清寒

題杜茶村先生遺像

乾坤納納獨窮處五字彌天真杜語三百年來歇楚芳  
猶幸披圖展眉宇學詩入室愧未能學餓升堂公儻許  
題畫

閒居兀兀自堪驚還屨溪山縹渺情樹石一庭皆可友  
世人休問作麼生

題節庵師與某人書後

道廣能周古所難重披遺札劇辛酸不須更說人亡恨  
足慰平生是蓋棺

大雷雨坐湖廬同愔仲作



鬱鬱重雲挾海鋪驚風不斷感跳珠橫空盡化魚龍氣  
咫尺堆成滯瀕圖心事百年勞洗滌乾坤何處有焦枯  
濕廊茗坐延餘爽初識神功有若無

同惜仲夜話

白日能知悄悄心萬端一淚去來今廊通荷氣驚涼早  
樹掩池光受影深小語可禁迴斷夢忘機聊得繼孤吟  
沸階蟲響繁如雨采露秋園迹已沈  
將游雁蕩不遂改游天童舟中口占

懸夢大龍湫攜朋快此游卻循甌海曲忽過天童留風  
葉喧欹枕蒲帆下急流朝光松破碎迎入萬山秋

阿育王寺舍利殿

我昔諷經大涅槃悲涕震動驚人天津梁欲倦不得倦  
說法示寂真能賢金剛體碎舍利出化身爲塔周大千  
惜哉爭寶八國主貪嗔一念森戈鋌滔天業力極阿育  
懺悔迴向終洗滌役神渡海福震旦光芒湧地生青蓮  
我今來游育王寺重逢龍藏驚前緣予癸卯歲七月二  
十三夜渡海忽放  
光數百里船上有藏經一部  
今詢之晦谷方丈卽此部也塗金構架皮舍利殿中一  
塔光巍然後方橫卧涅槃佛廣榻大被凝香煙支頤曲  
肘示安隱眼光欲墜仍依連龕燈夜寂暫趺坐靜中至  
聽奔雷泉塵勞八萬四千劫深恐擾佛清淨眠山僧精

誠貫智勇開徑營造空後前莊嚴華美相具足孰云漏  
果成唐捐頂禮百拜者誰子欲以肉眼窺牢堅非真非  
幻漫參想誰知舍利在汝邊

### 天童寺

昨遇天童僧遂至天童寺

淨慈寺僧開  
治戒行高潔

天風塔鈴語行

行度嶺次有松萬株竹萬竿到眼先識天童山蒼龍起

立高秉笏翠鳳繞護飛鳴環寺前潭蛟睡不醒千年忽

改山門影古衲強被蕪林裝設教誰能分象景

方丈某  
改寺門

爲奉  
西式

高殿廣廡爲稻場戶牖處處開蜂房枯眉時遇駱

駝坐小几獨焚知見香見佛良易見僧難永嘉難參一

宿禪諸天龍象不可致邂逅勝地空流連滄流浩浩無  
歸處維提絕紐誰龍樹未暇盛衰論佛門早驚潰決摧  
天柱淵明黃唐喟世更康樂湖海憐平生殘年欲遇寒  
山語一枕松風夢國清

余曾夢至一寺寺旁有塘甚廣青山迴繞不見一人風  
境淒冷今至育王寺宛然夢境也

丹垣一角背寒塘日落青山迤邐長到此分明徵夢境  
只應夢境更蕭涼

育王寺豆粥甚美與西山戒壇寺稷粥可稱雙絕

育王寺裏分豆粥何似戒壇風味新儻入山中徑披薙

真能康濟自家身

憶舍利殿

天人供養妙香凝寶殿莊嚴得未曾拜起清晨圍衲子  
跌跏深夜影龕燈此間真得安心法世外初逢解事僧  
別後神魂時一到暫能藥我思騰騰

春日早起

曉日朦朧聞竹雞雜花寫影石欄西竹苞纔吐青青節  
穿徑楊花踏作泥

題陶齋三公鼎拓本爲楊誦清作

忠敏好古天下絕晚得毛鼎尤瑰奇編書孔叟缺收入

君牙罔命同一辭我昔戲言富大萬力儻能致甘傾資  
重器第一餘可屏足誇萬世雄四夷煙雲聚散理常有  
眼見興廢能勿悲陶齋寶藏一朝盡此復見奪波斯兒  
楊侯聲嘶救不得頓足語我干歔欷空持拓本足感激  
區區寶此師門遺藏舟大壑山可移竊國大盜誅猶稽  
天家球圖尙不保一物重惜甯非癡我知楊侯意有在  
國士遇我摧肝脾君不見平原堂上三千客明日報恩  
知是誰

哭姪女嵐

哭汝惟殘淚吾生有已微沈疴天獨酷純美世原稀苦

羨西方樂魂應大母依至言吾詔汝須悟再來非

舟中

未了君親事甯辭行役勞一身多異域孤枕捍江濤肅肅聞哀雁悠悠付濁醪無心取相樂相泣慕荆高

歲除返湖廬

播蕩甯知歲歸來尙及春竹扶高石瘦花救小園貧巡視周三徑情親見四鄰起衰詩力薄慚愧草堂人

四月返湖廬

平生幽夢尙依依不待他年事已非繞砌猶爭新竹長辭枝空對落花飛湖山信美宜爲薦鷗鳥寥翔可有機

從此飄蓬任天地小人無母尙何歸

送何庚生老人之葬路經安巢花盛開望見五峯草堂

感賦寄惜仲天津

行近青山憶故人五峯雲外舊嶙峋我來已似辭枝絮  
君去仍淹故國春無主花開偏爛漫多愁酒次易逡巡  
此生不到人間世豈少他年一聚塵

蔣蘇盦新刊簡齋集見贈

開卷久逾親晚交惟二陳待分一滴水已負百年身諫  
果存迴味寒花發古春還憑蔣山蔣拂拭起光新

憶舍利殿



圓月有情夜松風無盡年  
暗涼生殿石微熱上鑪煙  
結像長如在龕燈共不眠  
諸天有成毀悲淚自成天

和強志

友愛溫公及二方暮年兄弟意彌長  
待完身外無窮事要惜當前一日光  
學易端推正則遂說詩深覺子由強  
同心同苦還同瘦聊可相酬晚菊觴

題周子潔葬徐侯齋啟

窮儒溝壑渾常事  
古人傳葬侯齋子  
潔書增吾黨重  
南枝字抵一錢佳  
須知宇宙斯人責  
何況平生生死友  
埋分內都忘風義重  
眼前孰與證孤懷

題冒巢民先生小像爲其十二世孫鶴亭作

早識公孫廿載前，今披遺像一潛然。  
微知憂瘁侵高致，猶有林泉度厄年。  
鉤黨玉瑛偏並世，生祠委鬼欲彌天。  
稜氛不隕秋霜烈，皜皜風期若可傳。

湖廬聽雨

四圍簷瀑瀉淋漓，浪萬偈瀾翻作道場。  
省識勞生滋味了，湖齋聽雨最清涼。

壽甘翰臣七十

江海閱萬流，人物渺然歎夏蟲。  
苦拘墟鳥睹大庭館，卓哉非園翁。  
放懷無畔岸，忘機馴海鷗。  
大信埽約券，交游

道雖廣淄澠微可辨晚與諸老翁世外結婉變刻意營  
小園日涉未曾厭有客洗尊罍獨來數花片書畫夙所  
耽黃金易珍玩寓物不留物只供一笑粲出門乘小車  
迎繞多鵠面破囊爲布施行意非強善識翁二十年無  
改若初見珍果必毋遺回念臉輒泣去年寒食節我歸  
指江漢還分陳家紫與充先壠薦今翁屆七十康強喜  
加飯雖缺陶翟歡猶幸坡穎健聞作名山游一洗塵網  
絆陳詩盡實錄聊補先生傳

十月返湖廬

畏歸今復歸舉目淒舊影呼朋與周旋深夜燭猶秉添

蘇東坡詩集卷四  
鑪挫寒冽圍話剪悽哽庭前一叢竹新籜出翠粉縱橫  
亂作行似走無人境獨惜老梅樹我去遂枯殞草木尙  
有知予心胡已冷

擬孟郊

世味有酸辛酸辛殊昔今有母酸在口無母酸在心我  
於失母年無語已成瘖

與青虬子話山游之樂

閒話清游意氣濃隨身一劍識孤蹤霞邊秋色江村柳  
雨後晨光嶽寺松良友寄書兼茗至古碑捫字忽雲封  
歸來偃卧城笳夕猶誤僧樓夜半鐘

蒼虬閣詩卷五

甲子至戊辰十一月

蘄水陳曾壽仁先

紀夢

仲冬廿三夜霜重氣慘悽小極擁衾卧入夢初不知手  
畫寒菊卷枝葉紛離披攬之不可盡俄化龍躩踉迴旋  
呢我旁意若相護持是時寒嗽作痰汨汨若糜時時唾  
之盂若以印印泥泥印滿圖卷攜之踏荒蹊忽過海日  
樓斗室闖虛帷書帙縱橫落香煙出金猊悽惶過旁舍  
金老句丞晒而唏對立復一叟側弁掩其眉微具虎賁  
似未晰何人斯金老前致言願假御製詩標眉錄所

聞光耀發 皇義彼叟意不然謂此敬有虧但注於下  
方攷證或有資漫然施丹黃老人謂乙師終弗怡春然動  
吾念久矣吾師違何時適京邑奄忽歲月非欲往因出  
門仄巷如竇圭草煙擁踏跼非死非生離皇天有酸窟  
人者爲醢雞師豈在世間京邑豈有師荒荒十年來百  
見百涕洟師學無際涯浩浩萬派馳鈍根未嘗學寸隙  
何由窺占在地雷復萬端惟一辭我每有北行密語恆  
移時語罷拜別去絮絮當危梯梯盡意不盡睫淚承頰  
頤樓居深甯叟送客惟及扉一朝爲我下欲語情若迷  
思之肝膽裂身首留何爲仁者不復存存者晨星微近

感散原翁神傷喪厥妃胡子惜仲難同邁久病成老羸  
丈夫有腰腹但貯藥千匙淚兮悲所積淚出知何悲性  
命一蟻賤志事邱山垂儻有酬恩時甘作醢與齧

焚香

繞佛痕三匝彌天恨一絲炷殘身不去癡絕九峯師

秋夜對瓶荷一枝雨聲淙淙偶題冬郎小像二首

爲愛冬郎絕妙詞平生不薄晚唐詩一枝一影燈前看  
正是秋花秋露時

可憐陸九同文筆卻與朱三共歲年憔悴如斯終不死  
書生留命亦符天

淚

山擬義

萬幻猶餘淚是真輕彈能濕大千塵不辭見骨酬天地  
信有吞聲到鬼神文叔同仇惟素枕冬郎知己賸紅巾  
桃花如血春如海夢裏西臺不見人

乙丑二月赴

行在所寓浪公齋中海棠二盆盛開

絕豔相逢感鬢華小窗低幔護風沙晚妝倭墮驚奇夜  
曉夢紛紜散綺霞正使滔滔移節序何妨定定仕天涯  
歌脣銜雨平生恨影靜心蘇倚此花

春盡日薔薇花下作

碧樹人家往往深殘紅一架恨難在單衣時節寒仍戀



絕世芳菲夢一尋  
浩渺波流沈素鯉  
氤氳朝夕換鳴禽  
不須極目愁煙雨  
占斷江南是綠陰

寄懷君適頃波

伴愁絡緯一秋啼  
老徑寒蕪望欲迷  
敗紙鳴窗風獵獵  
濕螢綠竹雨淒淒  
勞生留味餘燈幌  
涼訊牽懷賸菊畦  
剪燭論詩沈舊夢  
何時二妙手重攜

宿河坪丙舍

眼冷家山合斷魂  
遺黎未盡是天恩  
蓬窗影與寒燈靜  
雪夜心同濁酒溫  
訪舊殘僧驚已化  
破愁故侶肯相存  
歸來慟哭松楸下  
猶作人生幸事論

聞雞

一枕冰霜夜氣侵  
荒棲歲月苦駸駸  
縱然義肉充庖宰  
未死終存報曉心

一日

一日應知百歲情  
睡前茶味不勝清  
心寒未滅餘燈影  
愁斷仍迴挾雨聲  
江漢零丁終不死  
文山忠孝太勞生  
才非往哲時加蹇  
恂惘蹉跎只自驚

小樓十首

孤月仍圓夜憑欄  
雨暫休車喧入雷  
部屋小似神樓客  
至蔬同飽兵多市  
早收驅愁生事在  
端不廢吟謳

寥落從龍侶迴翔各有羣腐儒能一死聊復壯吾軍擇  
地身何潔滔天訴豈聞但期威鳳見梟獍任紛紛  
識字叢憂患真言在簡編見知無有爾未濟竟終焉齒  
豁空諸味心枯泯眾緣儻稍留四大還欲補諸天  
小極忘經課多眠損道心暫清塵漠漠偏駐雨淫淫蟻  
大時緣几蝸肥每上琴開眉故人至濁酒與同斟  
居近青蓮社莊嚴百堵興閒蹤忘拜佛冷眼偶看僧微  
覺津梁倦長悲罪業增安能淡無事茶煮一枝藤  
最憶江邊寺常應夢裏游再過僧漸老獨坐室如秋梵  
響喧如寂松聲去復留百年塵土質何日復歸休

萋楚樂無知人天豈兩歧願伸無鬼論一斷有情癡書  
潤心苗後茶甘舌本時些微足資老歸盡更何疑

室小還容膝時艱豈負人盜驅佳客至悶與故書親未  
假龜山斧長朽相柳塵滄田留眼在堅坐且逡巡

狼狽愁江漢沈緜耐友知丸搏蟻不厭火活鼠能竒往  
往南風競人人祭酒師蒼天豈終死儒效至今疑

晚學吾何及長吟獨未灰惜陰憐雪竇求道勇黃梅  
目餘寒霧填胸隱鬱雷終輪步兵曠荒酒替沈哀

秋間予病幾殆陟甫九兄夷希同年邀游鄒山時爲八  
月十一日爲予五十初度兩兄齋僧普佛爲先母周

太夫人資冥福歸後病良已追念感賦四首

百年本須與五十亦非天但惜虛歲月志事付潦草樹  
木失本根枝葉分萎槁自我違雙親寸蕪生意了勞生  
悲慘積懈學衰病早濡响仗友生發興佛地好一笑天  
海空倏見輕鷗矯

我生未終昏入寺必歡喜落帆寶幢鎮如客見故里肩  
輿轉寒塘曲徑丹垣迤鳥聲含極樂松竹淨若洗眼明  
放生池修鱗逝瀾瀾禪房尋舊夢談笑猶在耳

前歲同  
徐適

孫頃波來今適 赴 頤然晦谷師出迎足不履山中寒

京師頃波適美利堅 暑再塵世千劫裏高僧故依然倦客真老矣

古人五十慕我今嗒已孤劬勞念生我欲報時則無推  
恩謝良友爲我齋僧徒前後眾三三屏息趨鐘魚一飯  
萬莊嚴天香飶伊蒲夜殿普參佛香煙發洪鑪咫尺踐  
初地龍象彌空虛慈雲垂我前其上蓮跏趺母佛見非  
二人我同一如拯予罔極哀躋彼極樂都信友乃順親  
甯異釋與儒喜心涕泗漣緘髓徒區區

沈沈妙勝殿

宋孝宗題舍利殿爲妙勝之殿

牽夢今三年深簾闔香界

六時凝紫煙清晨淨埽地禮塔來行纏鶴瘦盡古德目  
注西方蓮惟聞窸率聲拜起衣拂瓢廣榻儼卧佛明滅  
龕燈懸更深萬籟絕敷坐同夜禪寂光攝幻軀度入清

涼天緬懷至德人常樂非境遷一空相往來兼斷際後  
前勝境一瞥逢說寶吾滋慚

書憤

輕易前賢說陸沈向來憂患豈爲深孔無尤怨真強項  
佛出人天是苦心欲語無騶端可啞得書遮眼未妨淫  
淪胥坐視稽天浸何用偷生更惜陰

寥志弟遺水蜜桃夜起食之感賦

觸熱中夜起移簟臨風軒渴食水蜜桃肺腑徹甘鮮王  
君昨遺我含笑出袖邊肫然讓梨意猶似兒童年憶昔  
母在時壯大承偏憐愍其終日勞篝燈復丹鉛僕媪每

傳賜小孟棗栗蓮當時昧不覺此境俄已遷人生所至  
樂隨之入沈泉沈沈復沈沈萬劫不再緣母去子安存  
餘骸何有焉翻恃哀暫忘惛茫命苟延一桃味深回悲  
起遂不眠

問散原先生疾

違天忍事百堪死一笑仍回冰雪容共語言緣無片石  
與天地畢有孤松出門儻羨彌明逝危坐應悲叔夜慵  
禦鬼南山終戰勝靈禽枝上夢曾逢

九日海西庵訪梁節厂師讀書處

孤臣淚蝕一方苔堦下海棠今不開映日窗光穿几榻



藏山詩筆拂塵埃讀書肯負當年意換世餘供後死哀  
出倚天風接洶湧還容片石作西臺

自題焦山畫冊

我昔數夢行江潭青峰轉處逢精藍洪濤撼壁石徑冷  
欲至未至心醺醺寺門碧雲是常住花木淨好香微參  
天風鈴語坐小閣最愛倚檻松鬢鬢我生捨此無極樂  
偶一味及中邊甜前生杳冥孰真幻人境彷彿惟焦巖  
江山信美惜蒙垢漸化淨域爲塵函我亦流轉昧初地  
故鄉漸遠無歸驂清空妙勝了無分零丁惶恐差能諳  
山樓夜枕輓轡轉暗覺石級潮痕添

景文誠公挽詩

帝座孤危極何堪奪股肱鑑亡思懇切鬚磔憶風棱辛  
苦從蓮勺艱難辦葛燈一誠泣真宰無忝後人稱

不盡相逢淚還餘到死絲心寒温室話情燭太行巖汲

黯茶常挈誠懸筆暫持公入直必攜茶囊時臨池自遣刳肝聲一吐已

是蓋棺時遺疏極切直

毀庵太傅以先世誥封屬題

我朝 聖相承羣生浴重熙世臣近日月稠疊雨露滋  
故事重翰林清貴殊曹司封贈皆極榮匪計秩高卑太  
傅紹明德生及中興時早抒大手筆晚爲 帝者師感

茲陵谷遷彌深追遠思紫誥炳鸞迴卷尾徵題詞肅肅  
忠孝質凜凜萬代規世有受恩重美新壽期頤舊雨附  
昌奴自詭羊裘披公然肆謗誹披猖無不爲吠堯卽堯  
犬媚桀桀豈知視此等薰蕕相背萬里馳分當烏雀逐  
義正春秋辭人皆有所生令名儻思貽



蒼虬閣詩卷六

戊辰十二月至己巳

靳水陳會壽仁先

感憤

今日猶爲國有儒奄奄氣息李曹無薰天時見苓通帝  
抱義真傷咫尺孤孟博探湯甯顧族偉卿入鑊早忘軀  
欲奢持狹由來事空奉彊華赤伏符

謝陟甫饋蒸鴨

山谷學道持戒律晚苦頭眩初破葷我生偷妄百不逮  
一事差勝惟憂勤橫機修羅劇刀箭始知脆弱芭蕉身  
廿年蔬園牛踐履多生負債潛悲辛晨秋居士濡吻我

肥甘數致沾枯脣區區甯非口腹累妄託滋益饕羞珍  
時來卽行逢便喫緋衣造詣非等倫生天成佛豈子分  
一身爲薦差無嗔宛轉君勿薄雞鶩見用於世皆深仁  
我願將身化千億往飫來世幽憂民

梅泉五十初度有詩及后山簡齋自抒身世之感屬和  
深吸西江得我師二陳鬱鬱各嶽崎玉成古有寒無價  
行意今餘筆可持亂世崢嶸元不負多才潦倒便能奇  
男兒窮厄誰輕料正及前賢寢盛時

用伊  
川語

冬夜雜述

生事寒燈在孤明悄悄心耽書知老至愛夜得秋深願

滅香仍炷聲乾葉尙吟百年拚寂寞一念自蕭森  
心遠羃塵隔天游斗室寬學書參靜理作畫避憂端排  
遣非無術沈冥有未安戎戎溷夷市差勝墮虺壇  
倦惜看書少愁餘著句能去憎蠅暫遠多可鵲無憑志  
屈甯甘隱心寒每入僧未須商去住聊得耐曹騰  
未覺艱虞極常悲氣類孤空存影酬贈安得色敷腴曠  
宇寒能滿秋芳淡欲無方知楚纍恨勇決訪彭居  
眼倦燈初炷窗虛雪乍明微知花氣息獨與視平生瀉  
竹侵幃濕冰泉入茗清猶慚僧課密澀殷曙鐘聲  
香發深煨芋醪醇偶滿樽堅冰區宙合宿火此心存低

雁知雲重馨梅破雪溫鄰雞不辭凍猶自警昏昏  
落木已云暮朔風何怒號瘴深挾海隱霜勁逼辰高擊  
筑同心隔排闥昔夢勞驅除何日盡殺氣動邊旄  
慘黷江連海風霾日至昏人情思壅塞天意縱摧掀未  
缺胡鹽醬仍羞鬼壁垣安心移世界寂寞與誰論  
予季嗟行役飢驅歲盡時無親身始賤急難聚堪悲薄  
酒猶成醉秋茶自可飮凋年兼雨雪滄海一帆遲  
混沌成今日黃唐憶昔年禍樞應有屬疏網久疑天月  
墮躔光在樓孤夜氣專無行更何待几榻與迴旋

後劇



後劇增前劇相尋且未休固知窮有變未省發能收患  
氣看全伏遺黎可盡劉卅年念終始一著覆神州

題馮君木逃空圖

一笑人間萬劫忙虛空能住更無鄉神焦鬼爛無逃處  
虎倒龍顛亦道場觀世未妨千睥睨安心不斷百思量  
畫師能會忘言意足底山河入混茫

題曹靖陶看雲樓覓句圖

東坡追亡逋山谷去琴軫佳句無定在取攜在俄頃靄  
靄空中暉目注若有領變滅無端倪一字天地準曹侯  
大雅姿聖處闢疆境彈指妙明花一笑出枯穎

吳寬仲先生挽詩

故國尋耆舊同心獨此君  
早輕南郡士憤著北山文  
高節甘僧服剛腸絕世氛  
晨星苦相數鄰笛豈堪聞

師執餘公在交期劉宋間  
九原終不負卅載邈難攀  
賤子蒙前被凋晨慰往還  
獨慚虛一諾欠寫鹿門山

救國違初志懷賢紉楚芳  
事功一太岳翰墨兩襄陽  
終鬱青霞氣愁霾白日光  
示兒傳絕筆遺恨薄天閭

忠樟行

法相寺在南高峯之趾門前枯木屹立突出如夜叉  
臂未之奇也寺後據崖有樟大數十圍雙幹擎雲如

大鵬之張翮古藤纏之陰森可數十畝未測何代物  
予同散原先生來游見之散原謂予曰廬山五爪樟  
名震寰宇視此斯在下矣約同人賦詩張之築亭其  
下刻記於石一日老僧送客指門前枯木謂君亦知  
此乎是忠樟也辛亥歲十一月 遜位詔下之前一  
日天氣晴明忽大風起於殿後門戶砉然洞開次日  
起視則此樹禿然無一葉槁矣當 純皇南巡幸此  
寺山中老樹皆賜 御牌挂之洪楊之役毀伐皆盡  
此樹巍然獨存今殉國也予愧前賞後樟之奇而失  
此交臂亟爲作詩以表其忠昔 純皇幸無錫秦氏

有虫月言卷之  
園有老樟亦賜 御牌歸朝會問樹平安否後 純  
皇賓天樹枯死與此正同

法相寺前枯死樹十年百過初未識臣節一髮繫孤根  
老僧告予三太息向來此樟護山門鬱鬱蒼雲歲月積  
無風石壇夏嚴冷不雨軒廊晝昏黑時維元冬亥年尾  
大風一夕摧殿壁晨起驚看一葉無鵬鍛龍僵神鬼泣  
詰朝傳聞哀痛詔巨猾移天 帝遜國乃知貞柯殉奇  
變神物義不污盜賊 純皇當年幸六龍山中草木生  
顏色嘉樹一一賜 御牌百年長養蒙恩澤亂經洪楊  
毀略盡遺此崢嶸戰冰雪氣排逆刃可辟易心蝕沈哀

竟摧絕我聞此言羞至髓反顏豈暇干官責偷生忍垢  
竟何補蹉跎一念錯鑄鐵昔吟老樟窮贊歎築亭作記  
兼刻石突兀靈竒失交臂使我魂傷血霑臆兩樟生死  
各千古作詩豈獨慚筆力

戊辰除夕

春聲比戶隱闐闐猶有殘黎共歲年寥落心情疑我喪  
崢嶸憂患付唐捐寒花對酒愁孤絕斷雁呼雲路幾干  
廿載涕痕滿不去縞窗曙色若爲憐

以近詩請散原先生評定附呈一詩

窅然於世何疏親我心寥忽如孤雲獨迴一念依古德

寒灰微爇存鑪薰天寒往叩寂寞宅年來止酒將何欣  
旁無給侍有壁立殘書擁几移朝曛至人神凝莫疵癘  
狂風魍罔徒紛紛等心初不辨孔跖牀下蟻鬪甯知聞  
夢懸孤光表冥晦道在屯剝非華勛持世豈在郭李輩  
聊許文謝張孤軍我來區區獻文字願挹灑氣澄冤芬  
苦心證慰快一吐安問異世悠悠云敝裘欠伸忽改歲  
鄰園花事天機勤行擷春柔渙心結侍坐還睨高天雲

寄治薌

奮翮猶當惜此才蕭然行鉢晚堪哀已拚舊事浮雲散  
眞覺中年萬恨來子影攜依憐小德斷腸傳寫欠阿灰

尋山舊約休頻誤，準擬相逢花正開。

去春約游上房山，未果。山中海棠吐。

丹最勝

### 河坪上塚

獨來雲氣益淒其，孤憤惟應地下知。  
跬步灰心猶忍事，殘生求志恐無期。  
霜乾野草回榮易，風蓄寒松欲靜遲。  
水遠山重更回首，魂傷眼冷不多時。

### 黃州江干旅夜

崩岸村移感舊經，荒江獨夜酒微醒。  
萬端空後觀憂患，結念孤時贅影形。  
霜氣穿茅燈颭颭，角聲挾浪月冥冥。  
天親回首餘抔土，陌路逢人淚自零。

朱用和招飲因憶其尊人曉嵐先生飲酒之樂愴然出  
涕送贈一首

美酒易盡悲難空平生風義懷朱翁翁昔釀酒鑑湖側  
百二十甕堆醇醲酒成跌宕走京國意輕萬戶豪千鍾  
歸來經年卧酒病百藥嘗盡如神農佐軍粵西鏖積寇  
偶探囊底收奇功長才老謀時不遇晚經桑海悲哀慵  
朝晞暮暗減食寐國之舒慘如在躬卻尋故居武林市  
十年久據狐兔叢發藏多供兵子醉急呼朋好開泥封  
傾寫瀲灩照益益朋比公瑾秋歷冬小車載來湖上宅  
香流茵墊涎溪童夜歸踏艇誤踏浪淋漓襪履勞燂烘



深情極意那可道倏忽宿草埋幽宮海隅張飲踵公子  
感舊涕出知何從時移志事去日遠尊俎猶昔心誰同  
偷生羞塵國士遇念亂誰及君山忠酒人向來少成事  
荆高遺恨迴悲風

爲蘇堪作夜起圖卽祝其七十初度

任重吾道遠才老天心奇沈吟鬢未霜忽已七十時  
主憂臣分辱 錫嘏惟遜辭愧彼惜涓埃妄徼非分施  
竭來慰朋舊婉變花前后雲天需宴樂貞吉符爻詞嚴  
整性所耽雞鳴日孳孳屬作夜起圖此意誰能知精金  
淬百鍊事會無窮期夜衣不遑寢逆旅眞吾師

爲鶴亭作寫經圖題句

鶴亭在京師見查聲山學士居母憂時寫經圖卷以  
有母在未購奉諱後求之則已歸南海譚氏屬予補  
作予與鶴亭皆以四十九年失母往日子作畫時予  
母恆坐視終日今無復此樂矣

觀畫慈顏得暫怡小園花發晝長時東方日出人間世  
會影南窗母與兒

甘爲人役豈終窮羞共時人論拙工初志曾輕閻右相  
誰知老作石田翁

風葉飄蕭秋氣深寒柯瘦石墨如金雖然未得營邱筆

亦是山林獨往心

挽陳宜仲同年

寥落功臣後三湘賸子賢苦心容螻蟻微恨託蘭荃忍  
絕逢辰望俄驚在巳年節終存至慎何日表緜田

危局歧尤甚閔居念每深匪躬惟獨喻共命失同心著  
述看荀老焦勞擬墨任痛無房杜遇空感迹難尋  
志事餘孤疾崢嶸付逝波蓋棺知不瞑留命更如何擾  
攘輕龍戰衰遲感鳳歌同災不同盡疏遠負恩多

高樓

高樓長夜破淒迷風偃長林一向低動海霞光侵落月

連天蝸嘒亂鳴雞流金氣候今日昨隱几生涯東院西  
康濟自家身亦可何緣洗耳萬方啼

擬孟郊

非故春夜曙非昨晨水流無迴波落葉不及根但  
有孝子傳曾無頌慈親親慈爲固然子孝爲鳳麟生養  
只半菽死祭列八珍人事每顛倒豈屬傷哉貧始知天  
壤間有恩無報恩自稱報恩者斯人真妄人

殘暑

殘暑稽留忘主賓追涼永夜坐逡巡風悲微覺天地肅  
月白孤餘肝膽新漠漠殘香迴細篆沈沈暗水起微鱗

此身那得同溝斷任轉陵遷谷變辰

題戴文節公湖天清曉圖

畫家正宗稱四王導源董巨承倪黃從風蔚起紛百輩  
誰歟殿者戴侍郎侍郎觥觥表節義託興丹青特餘事

雲龍上下邵

位西

許

演生

曾

滌生

鎖院風流後難繼家

住錢塘山水絕盡化煙雲爲筆墨幽人懷抱非世間愛  
摹清曉湖天色南北沈沈橫兩峯落月未落聞疏鐘雲  
鬟不動睡初起愁絕西子難爲容古來能手各爭席秀  
韻天成公第一沈瀼吸取黃鶴仙

叔明有湖山清曉圖  
王世貞題詩有吸將

三斛碧沈  
瀼之句

山林獨往營邱筆卷中雲物皆依舊可惜靈

區蒙海臭忠魂應自戀清暉華表堪悲朱鳥味故家喬  
木迹未蕪清冷有硯今在無入公殉難攜畫但應模糊滅  
聞見夜山繼繪高尙書

秋懷三首

微竅沸天地百蟲爲一吟喧奪萬籟寂氣噤龍象瘖長  
夜何怨詛切切終古深意欲駐冥晦日月不照臨露氣  
裏重繭九幽載俱沈天旣非昔秋子亦違夙心殘釭對  
淒警橫臆峨蕭森

亭亭碧梧樹一夕秋風吹書來問我瘦有弟天一涯氣  
弱畏熱候形貌倏支離鏡顏朝暮異遞變子爲誰肥瘠

兩非我剛餒要自知澄潭映孤月前路了不疑願同保  
歲寒過駟猶可追

秀夫沈海中擴廓竄塞外志事雖不成生氣千古在凜  
凜天澤義一息持顛沛君臣二爲多孤舟地非隘但得  
肝腦塗足抵風雲會屯運與昌期同扶天紀墜時乎不  
驥得誰識我心痲

湖夜

水擊微風露洗林閒廊舊夢已銷沈重經踏月陰陰地  
幾損扶天悄悄心扣石拚同如意碎瘞書未信井函深  
畸零蟣蝨猶難儗愁影朝朝費照臨

有虫閣言卷六  
八月初九夜夢至一處案上書裝冊甚古繙視爲魏晉  
六朝人詩梁詩標曰梁言齊曰齊言妙趣紛綸益有  
餘味醒後追憶不得遂擬二首彷彿所見云

迴薄萬古松掩抑朱絲桐相依北窗下合奏生悲風霏  
霏香爇鑪疏疏燈映櫺一彈清我心再鼓還我容

聲出幽澗泉始知山雨歇濕香入庭戶薜萄花初發一  
絲收鉢雲半壁吐巖月道人方不眠清詠自怡悅

九日焦山登高同公渚作寄君適廬山

穿上煙蘿拾墮樵連江寒籟起蕭蕭已先霜木驚搖落  
暫狎風鷹共次寥寄遠恨無書付雁澆愁難倚酒盈瓢



斷崖何與人間世  
濺蝕潮痕永不銷

同陟甫印樓厚先公渚至別峯庵觀落日歸坐定慧寺

山門

削崖龍從俯浩蕩  
盤鶻風高身欲傍  
人間塵憂不到處  
心在塔鈴相輪上  
淮南煙樹澗千里  
江左羣巒疊高浪  
瘴合海門深復深  
穿射紅鱗獻奇狀  
暝鐘初發起江聲  
洄激噌吰作悲壯  
獨抱琴心忍終古  
山門孤桐爲惆悵  
書諸暨蔣觀雲詩集後

不會相見廿年後  
同異紛紛俱劫塵  
初意全違應有悔  
苦心難閉尙餘呻  
榮枯迹已殊華管  
功罪今猶混李荀

未暇相哀各沈恨遺詩得失付閒人聞國變後蔣氏杜門不出其子作都督乃拒之不使見詩有西山薇蕨之語然其初海外論著抗厲潰決有過於梁氏者豈有所深悔耶子未見其人其弟子某堅以遺詩屬題故勉應之

十月率室人及兒子邦直女荃視長女疾於廬山之蘆

林適散原先生先來牯嶺過訪先生有詩奉和

急難來山中意外與翁會驚魂親紫眉暫分窗日曬淵  
明去何之位置天心怪雲嵐媚老眼稍喜聞見隘返廬  
調藥鼎顛風鳴萬籟平生安心方臨事忽破碎曉窗隔  
霧雪一室乃無外似將入混沌彌縫大宙壞身落五蘊  
中安能正災害累劫兒女恩鐫刻木石界何時世械輕

憂端釋華岱爐灰撥法何靜與希夷對

次韻散原先生大雪後過訪

入山寒拾真伴侶躡雲間復相聚我視女疾討靈藥  
翁就子養棲巖堵萬峯晴雪光眩亂風帽籃輿聞打戶  
問知有瘳一開顏益然春氣迴吾所造化控搏豈窮極  
顛倒殃祥遞戚舞一身煎熬不自克乾坤瘡痍誰爲主  
大哉死息吾未竟賸補謳吟償肺腑吐噓冤氛滿巖谷  
浪使山靈驚苦語瀟愁吮墨還作圖防損匡君貌奇古

來詩屬作  
幽棲圖

同君穎至黃龍寺

黃龍寺前娑羅樹直幹斑文屹天柱我坐其下誦金經  
蒼翠婆娑開古庭苔地陰冷擁黃葉四山龍氣交冥冥  
石上猶刻曇詵字手種已是千年事高僧有情何處逢  
遺蹤獨起寒山意

奉和散原先生二首

狼狽沈緜二十秋忽驚傅翮落巖幽温燭積雪千峯底  
刻畫窮山二鳥囚黑夜熊啼通磬欬晴天木甲散鋌矛  
此身何得同溝斷化石當前恨卽休

萬竅呼號聲合時孤懷起滅入支頤苦言世械深妨道  
未絕天黥尙有詩挾刃風威疑割席翳燈嵐氣巧通帷

冰霜剝盡求真面正要先師作導師

來山中不得往游諸勝悶坐簡散原先生

殘生萬兀愁相見未合寒山照獨吁  
敢望乖崖分洞壑聊殊絳縣在泥塗  
雲封獅口樵初斷冰薄龍潭澗欲枯  
賸得微吟安樂法多時雪檜已模糊

誦普賢行願品

昔聞有士黃山巔諷經報母多歲年  
板閣有客夜投止聲徹三界悲人天  
有時狂風越嶺至咻若有物伏戶邊  
黑雲蜿蜒迸入室經字俄翳燈難然  
精誠向母願無盡雖有異感心不遷  
我今誦經廬山裏冀瘳女疾中懸懸

天傘蓋雲衣服雲忽若飄拂周大千塵根悠忽少精進  
遠隔淨域猶天泉安得諸根箭脫弦我亦身坐西方蓮  
但求漏果世緣重寸心遙爇香鑪煙

同君穎宿聖華精舍

忽誤泉聲是雨聲夜燈小閣不勝清暗滋淨几流雲氣  
微白遙峯漏月明好夢直疑身再至勞心澀與靜相迎  
人心苦相良多負閒話前蹤感易成

夜坐二首

雪閉巉巖石屋深荒山歲月益駸駸枉旋蟻磨人間世  
難淬龍場死後心洩霧飛雲輕變滅寒莎衰笛共銷沈

易堂一去焦團老愁絕崑山老鶴吟

亭林有老鶴  
萬里心詩

此身何分萬峯藏飽飯藜羹傲子桑眼淨煙霏山寂定  
心降泉滴夜清涼果堪空谷了身世願就非人爲道場  
落月寒躔低欲盡海天回首恨茫茫

爲散原先生作幽棲圖次韻

曉夢兼雪清寒光擁卧榻峯峯沈睡容幾日斷行跋凍  
筆寫幽棲窮途天使合儻作先天圖漁樵演問答空寥  
宣故吐清冷味新納難言託枯穎二石石濤豈真衲留  
遺好事人把卷幾開闔

晚霽

天籟疏慵不世情，忽辭漫誕入崢嶸。  
居然許椽全家住，欲學龐公採藥行。  
煮茗偶參高士座，開雲晚霽女兒城。  
我無住嶽珪師力，但籲神君轉死生。

聞近事偶作

狐搢狐埋亦苦辛，濡須何異共成塵。  
長看野戰龍無首，信有天驕恙噬人。  
縞夜霾晨移寤寐，冰天雪窟作清新。  
此中公道殊人世，終鬱前頭萬木春。

石滑

石滑行綦熟，風狂很谷磨。  
窗光明宿雪，經課對寒燈。  
芋火偏宜夜，生涯漸近僧。  
乘除百思想，何以證南能。



幽憂二首

短睡苦未安長睡不卽來顛倒怖喜間寸隙腸九迴中  
峯富蘊蓄呼吸殷風雷終然落無悶天外雄崔嵬

皇天錫幽憂往復安若命將身入弄鼓或以不戰勝眾  
峯圍夜禪一月提祖令未能逍遙游且入駱駝定

擬游白鹿洞未果

東林香火散秋煙淡薄儒門更可憐問道不曾逢摠老  
結廬何處訪窮禪山空疏把文公蓋潮落都無子靜船  
欲掃齋壇尋舊約洞門雲鎖已千年

山中卽事二十四韻

驟暄迫窮陰蒸霧起寒凌峯峯輝玉屏谿谿宵水鏡冰  
柱撐突崖瓊屑齒裂壘朽枯被鱗甲搖曳響鐘磬高攀  
羅萬纓梢壁滑千磴搶地叢篠低冠巖一松勁救渴細  
竇鳴裏脆寒菜膾枝參陳雀癡尾曳竈犬佞粉飾到茅  
屋低昂失舊徑俄頃騰濛濛迷翥跬步近練斷豁腰腹  
裳褰露股脛焚鼎香煙肥披天絮襖稱混茫萬象冥寂  
滅四禪定中宵星斗爛纖翳掃忽盡聳峙入莊嚴樓閣  
浸寒韻一白周九天廓然見無聖嗟予况瘁餘得睹巖  
壑勝絕境生淨觀神籟發衰聽誇麗祕陽施刻露見陰  
凝強剖冰雪心未得憂患正崎嶇厯千盤向上難一寸

酷寒天所縱僵卧我爲政方丈獅座空維摩本無病冰  
硯炙微澌貽我以無悶

十一月廿四日攜女下山治疾走別散原先生

入山抱憂刃出山剗冰眸纏性萬古哀挈去半若留叩

門與翁別恂恍何言酬示我哀曾篇

曾重伯

涕沈湘水舟

跡弛微惜才攢念與心讎結鄰梁居上

璧元

瞽目傳詩

郵經旬不相見倏忽殊明幽屏居雖人外死喪攫天游  
烈風夔罔兩鬣雪無時休埋影子一老上徹商聲謳帝  
饗歌哭尊孤噫專靈邱難容一榻安偈仄悲神州天譴  
子小子殃及千悔尤微聲示大戒飲戈復以予小心謹

奉受冀以迴神麻凜茲一髮傳絲延義孔憂肩輿下危  
梯兢凌滑不收直引霄漢魂下落萬丈湫陽崖磔慘澹  
陰壑森颺颺屑瓊絡磊磊渾璞表修修有松僅自救有  
竹連偃僂枝條盡臃腫張網紛蛛蝥朽枯幻大壯照耀  
驚雄彪伊疑堅冰終永永無春柔沈睡寂中峯天半餘  
贅旒連岡轉俄斷窺罅吐亂洲蜿蜒白浩浩荒江背天  
流還想面壁翁欠伸迴白頭巉巖萬遮眼聊障江海愁  
棲神一峯定飄宇孤雲浮我心萬金藥終致瞑眩瘳

下好漢坡

千步心隨滑磴移應憐赤足踐冰澌人生健者無壯老

但恨今無張柬之

三ノ目

蒼虬閣詩卷七

庚午至辛未

蘄水陳會壽仁先

挽馬通伯

世亂贅腐儒斯文極天椽厄年逢在巳碩果仍見奪京  
曹昔共居滄海氛已惡果然大軸翻含生化毛角決去  
我何成強留翁豈樂舊京再相見溫偉驚索寞逃禪鬱  
苦悲精氣遂銷鑠區區整齊志片紙重山嶽向來桐城  
宗所尙義理學乾隆四庫開紀戴侈通博抑揚漢宋間  
持世失肩鑰惜抱示異同百鷲見一鶚湘鄉用緒餘乾  
坤再清廓飲鳩雖羣甘救死豈無藥惟翁潔不食辛勤

卷之四  
守衣鉢驗方信昭昭後起誰寄託

奉召赴天津 行在所余倦知先生贈別次韻

深愧麻鞋杜拾遺  
逡巡赴召屢愆期  
緝熙始荷維新命  
辛螯誰陳小恙詩  
居洛望尊甯獨樂  
渡江矢志欲何之  
重來影靜心蘇處  
儻柱天穿地朽時

題海日樓圖

侍坐樓中每泣然  
彌天孤歎渺秋煙  
猶聞大滿圍裳語  
忽隔威音億劫前  
莽蕩橫流真到海  
淒迷殘夜尙如年  
北征今後從誰別  
少主慚牽數世緣

題陸文節父子手札卷子



嗚呼辛亥秋亡國古未有  
列聖磐石基毀壞翻覆手  
堅冰固有漸繩絕值其紐  
戊戌傷天倫庚子困黔首  
巨猾乘其間國柄竊已久  
行賄亂官常輿臺被章綬  
封疆無重臣變起誰爲守  
邪說煽庠序嘉苗化稂莠  
國防易新軍隱患伏腋肘  
梟狐羽翼成雖智莫善後  
到官猝出柙舍死惟降走  
堂堂文烈公罵賊血濡口  
一門殉忠孝大節同不朽  
觸憤視遺墨哀今往誰咎  
一死存三綱寸心良不負  
偷生竟何成泚筆餘愧忸

舟中寄高雲麓同年

嗟子親藥爐正坐甚疾惡  
槎枒塞胸臆觸事森然作  
熱

血吐向壁煩冤自煎灼漢鼎繫一絲孤臣天所活經旬  
不相見執手驚瘦削述病語滔滔真氣猶噴薄赴 召  
予北征欲行足若縛知君貧似我裹飯獨君託琨遜心  
則同張范風已邈何時地雷復乾坤洗渾濁中興拜我

皇功勝萬金藥

舟過青島訪潛樓四首

浩浩東海濱清暉靄一廬主人手種樹參天仰扶疏當  
堦芍藥花娟娟表春餘有樓書插架十萬琳瑯如主人  
朝盥罷竟日何爲娛掩書卽作字輟筆還讀書黽勉日  
不暇歲月忘居諸庭蕪日夜深足不至門閭獨樂豈真

樂乾坤極瘡痛斯人著此間天意終何如

清晨聞伊唔花木靜書齋二子出揖我循牆謹趨陪  
溫子弟色真疑麟鳳來先生偉衣冠恐是石徂徠神州  
化相柳童非爲梟豺種子儻不絕會挽狂瀾迴儒門今  
淡薄誰爲好秀才

應門老臧獲樸野故不俗驚喜見我來致詞容有感昨  
爲月十三丁巳事在目隨主在舊京親見宸位復荒  
荒十四載往事堪痛哭出紙索我書流品嚴清濁書中  
無多人胡瘦唐陳詒重已鬼錄主人深閉門長歲少剝  
啄料無東坡客教壞君實僕

經年不相見既見終何言  
千鈞蝕一髮欲語聲復吞  
履霜至堅冰倏見大軸翻  
持世上無學虛陋真亂源  
二三浮華士見貴宰相門  
肆毒遂滔天遺孽今猶存  
噬臍悔何及天道甯足論  
倉卒飫一飯有淚盈清尊  
駛帆丁字沽潮流正渾渾

早起

窗曙如日佛俄然幽黯空  
名花一宿覺好鳥他心通  
寶鼎溫馨在湘簾罨靄中  
不隨羣動起安隱主人翁

寄散原先生

傳聞羣盜近匡山一老棲  
遲久未還噩夢千端拚歷試

寥天一念獨相關居深雲窟徑中徑睡起晴窗閒復閒  
促駕何時返溟渤暖尊京酒得開顏

題陳向元泰甯鎮去思圖

摸金遺孽尙縱橫惆悵偏師捲旆旌回馬 山陵猶在  
望緣邊鼓角亦多情冬青留恨天心醉楊柳爲官佛劫  
輕末世最難明大義贊揚非是重時英

景文誠公入直 行園常以茶囊自隨公逝後三年予  
於公所治事之案得所臨晉人行楷一束遂與惛仲  
分存之又遺烏龍茶二瓶試啜之餘感歎不已與弢  
庵年丈惛仲作詩紀其事並爲之圖

春明殘夢官焙香廿年江海真淡忘淚銷鳳燭滴不盡  
復此蓮勺霑恩光從龍帷幄幾人在零落走散殊可傷  
與君對直歲月久惟有景老同迴翔眉龐鬚磔語言直  
入直常自攜茶囊當年草牘連案几卽今不忍窺遺藏  
我來拂塵辨手跡爭寶片紙如琳琅篋留雙瓶貯佳茗  
海南風味烏龍強試煎小啜遣長晝洗滌煩濁生微涼  
清嚴如見故人面致身晚節真堂堂逍遙坐食愧何補  
賸癖文字沈膏肓苦吟漫追雙井黃正坐車聲繞羊腸  
八月十三日渡海

飄飄江海身南北隨所緣胡今盡室行別恨翻牽連故

人重我行置酒酬詩篇雜杏集旅舍伴我共不眠侵晨  
犯宿霧衝雨寒江孺登舟不忍去惜此俄頃延最念弱  
小弟餬口委吏間分寸不失步世好無一纏寒暑不假  
息後罷往必先自爲無母兒萬劫無人憐顧彼下船影  
使我淚迸泉四海復四海行李疊股肩童稚恣歡呼岸  
景移當前申江百萬戶倏忽迷空煙長風動地至大波  
起軒然房房深閉置牀牀困拘攣排盪羣足跛轟輻眾  
器掀披衣起中夜堅立據船舷如山度黑影猛濺蛟龍  
涎高桅插象緯森若寶網懸三星及北斗左右相周旋  
扶搖挾噫氣肅殺盈大千萬靈訴冤痛帝所驚喧闐東

方漏微白晃漾日影穿黝鐵噴干花金銀忽相宣鑪鎔  
不祥冷騰蹕顛坤乾荒荒忍終古冥冥人世遷記我初  
北征奉母蝨朝官袖手視陸沈未銜寸木填辛亥出國  
門夢落西冷邊晨昏不努力遺恨存高阡 君親已兩  
負性命仍苟全安知二十載孤光迴故躔臣精實銷亡  
志事何有焉豈有尺寸報酬茲溝壑年贈行慰好語予  
友情邈綿恐無南歸意諸弟語尤酸起伏亂方寸眼底  
輕波瀾海水不盡地我意真彌天

重九邀叟庵太傅定園少保蘇堪情仲子申君任及強

志弟集蒼虬閣



羈縲相從一舉觴風天淒黯作重陽飄蕭寒氣爭搖落  
冷澹秋容有故常江寺尋僧驚舊夢

前兩歲重九皆在焦山

天涯

有弟卽吾鄉尊前諸老看猶健還起疏慵引興長

蔣母馬太夫人七十壽

我識蔣君二十年謹厚載物今所少春暉滿庭事親樂  
浮雲萬事讀書好中程天驥空勒韁名節挺立松柏長  
西冷佳處著蘭墅時奉慈顏嬉野航竭來杜門遠賓客  
開徑瑯嬛與世隔錦機自織分淹遲借書千里真一癡  
溫溫降心敬師友吸納萬派無町畦醉經根矩斷豪飲  
介祉惟獻南山卮重階蘭玉遍栽植一洗茹蘗冰霜淒

左右晨昏有道韞不數戒且雞鳴詩況聞慈祥潤及物  
仁風噓枯政一律鍊顏不知東海塵種萱北堂多歲月  
我亦南湖奉母人至今花開非我春南湖風月獨君有  
更喜康強進於舊我有新詩比春酒爲太夫人千萬壽  
題春明感舊圖

春秋誅亂賊其始萌一敢改官先去禮國本實已斬含  
生化毛角觶觶供獵獮是關族興亡豈直祚修短根鏡  
飾微末張皇開禮館諸老信辛勤彌縫嗟已晚舊事忍  
重論有責誰可追慘酷人禽哀漫託興廢感後死竟何  
樂熟視餘憤漉圖中話舊人隔世空懷緬

寄懷君任

燕市衣單遂卻回蒼涼孤抱與誰開未應不遇傷茲世  
轉爲能閒惜此才歲月滔滔雙鬢影神州莽莽一堆灰  
江東有筆今誰妒一例飄零更可哀

袁行南中丞八十 賜壽

雄姿鬱鬱見人豪萬里歸來秘六韜兩戒蟠胸恢地志  
三明儷績荷 天褒已躋呂尙投竿歲未改陶公運甓  
勢從古者英關運會開筵猶傍日華高

辛未二月李氏園看桃花同嘯麓作

煙染寒柯氣已新廢垣高下接田疇半篙初動鱗鱗水

一簇遙看淡淡春，曾悔流連償永憶。難移寥泬現前塵，俗緣重後違仙隱。漫效漁人更問津。

歲暮

世味殘生盡沈醺，尙可尋夢中慈母面。歲晚故人心一往，悲長負難言贖苦吟。應輸早梅候紅萼，占春深。

公渚悼亡索詩

感逝堯臣酷傷離，師道工君兼天下。好還得古人窮客，枕燈歿後春窗鳥語中。清尊斷根矩何法，百分空。

二月二十三日同惜仲嘯麓出西直門至西山大覺寺看杏花立之前二日候寺中

景物西郊併恨新綠楊曾拂屬車塵蕭晨古寺喧游屐  
衰鬢寒山及鬧春風色微添空黯澹粉光遙擁碧岫嶙  
勞馳半日酬芳節甘愧雲棲獨往人

傅松亭

誰築一亭當削峯全收境勝引游蹤能如我意松八九  
不斷花光山萬重佳處留庵餘夢想良辰蠟屐苦疏慵  
翻然落翼羨飛鳥回首雲濤沈暮鐘

舊京

擇棲何處覓千官無語西山故屈盤獨客來時惟偃卧  
杏花殘後更春寒烏衣門巷斜陽滿白髮梨園舊雨看

振旅收京餘憤慨始悲才似寄奴難

落花簡白玉

風信番番付謬悠閒庭開謝只供愁亦知輕命難酬願  
可奈同心不自由夢裏樓臺存息壤尊前涕笑此鴻溝  
落紅一片猶難惜才盡蓬山第一流

五月十三日同弢庵年丈蘇堪愔仲酒集

因循果決失原齊慚愧鈞天夢未迷萬有一疏誠死罪  
本難自信況天憐貫輪終欲師飛衛守樹何曾負跛奚  
歲月驚心三五過銜盃安得醉如泥

挽李子申

危世龍鍾百祟侵，清霞奇意竟銷沈。不妨迂謬殘生累，  
爲有芳菲一往心。劫後相逢翻似贅，灰餘傷逝更難任。  
草衣遺橐須珍重，免污嗟來俗子金。

靜園直廬前有向日葵一株孤秀可愛，旣爲之圖，並約  
惺仲作詩紀之。

清晨趨園直，草木呈芳妍。憔悴三冬枝，忽復青蓋圓。娟  
然萬綠底，見此黃金盤。亭亭一丈身，初日顏色鮮。徘徊  
自顧影，風露疑可餐。未施灌溉勤，遺種自昔年。但使本  
根在，長養天機全。何心附氣類，傾陽希甫賢。一見移我  
情，臭味如相牽。見同感則異，自媚誰爲傳。萬化存孤根。

弱毫安所宜

題李木公肥遯廬圖

臬鸞無並棲温猛不並世  
偃虎勢已成投鼠有深忌  
事仇難苟同銜恩敢獨異  
坐視良不忍輕去慚大義  
茫茫天壤寬我行獨無地  
卻瞻先幾者冥鴻恣高寄  
遯遠而處裕學易符深契  
洪鏞祕近響沈略斂雄志  
愧此圖中人看天還忍淚



蒼虬閣詩卷八

壬申至甲戌六月

蘄水陳曾壽仁先

將之大連留別弢庵年丈

貪天已罪況居奇  
辛苦彌縫敢息機  
肝膽何緣分楚越  
雲龍從古賴憑依  
食邊卧席從捐棄  
奇計常談誰是非  
傅德保身廿年事  
臨歧鄭重更沾衣

舟中

冷月淒煙籠海津  
絳雲飛擁下天人  
夷猶正則神靈接  
際遇冬郎涕淚新  
坐近椒堂真似夢  
恩涵滄海欲無身  
仙凡榮苑都無擇  
斷斷惟思一个臣

假翮

強鄰假翮盛文公何恤胼勞與後中志決艱辛原不悔  
居深情僞故難窮貪天功有之推恥投壁心能咎犯同  
自古君難臣不易漫誇返國倚西戎

雪夜寄潛樓

相思徒抱千迴意契闊曾無一紙書深語恐妨憂國病  
漫言還苦致情疏顛風挾海爲呼嘯密雪穿帷廢掃除  
此際忍寒愁不寐知君北望更躊躇

和惜仲雪詩

垂天雲盪北溟寬際海瓊瑤許並看大樹飄零銀雁失

明珠破碎玉龍寒未懸曉鏡啼頤誤徒損春心去住難  
葵藿傾陽甯忍訣還憑頰洞寫憂端

誦惜仲雪詩漫成

夢穩蒲團忘歲年無端寶燄玉爐然儘將心地填愁地  
直破禪天入帝天怨訴湘絃聞鳳語香留密札篆龍涎  
如何珥筆瀛洲客寒甚惟將雪命篇

舟過葛沽阻冰不進

堅冰擁葛沽來往滯艫艫陰氣凌寒日歸心折半途疑  
兵驚草木憎主迫萑苻回首蒙塵地何由惜賤軀

重至大連寄惜仲

際海飛英昔共看今來無雪更奇寒燈迴榻掃前塵在  
歲晚樓空客思單遠去孤臣傷麩豆資行豪紀辱盤餐  
雲波詭譎歧途裏誰識千鈞弩發難

除夕同君適至旅順 行在所燈下檢上海友人所贈

詩詞感賦

重溟鼓柁躡年尾風務箭激開冰隘落帆易車突百里  
峰垤起伏隨趁趨時瀕荒濱掠浩渺極目絕島餘兩三  
蛟螭凍死飛鳥絕吞天一色堆黯藍海隅蒼生幾遺子  
猶遵漢臘桃符黏穿崖出穴豁重鎮樓臺高下橫煙嵐  
雄殤十萬表一塔斜陽如血銜孤尖獨尋故邸啟扃鑰

紀綱之僕司森嚴相失深慚左右手間關一面傷遲淹  
君臣相對更何語肺腑縱剖舌若鉗一名所繫重山  
嶽有爭觸刃真飴甘堅冰峨峨閉天地迫塞生氣無洪  
纖故人詩篇出袖底使我凍抱迴溫炎但恐臨濟失隻  
眼籠驅日馭非愚擔宵深爆竹動年事爭忍迴睇天東  
南

小樓

小樓容膝亦云安凍硯溫茶伴歲闌燈火萬家天尺咫  
不知窮海有荒寒

朝烏

朝烏隨日至天涯屋小真疑斗犯槎黃道紫宸韓偓夢  
青峯野水疊山家蒼涼獨起看殘月爛漫何心賦晚霞  
惆悵寒梅窸益益隔年猶有未開花

雪霽夜入直

夜夜月明雪蕭蕭風偃裘曠寥宜獨往皎潔奪塵憂斗  
揭天容近燈青海氣浮驚心歸去願真箇到瓊樓

元夕

不記東華火樹然瓊樓出人自疑仙明燈海上無雙夜  
皓月人間第一圓報國投艱知力薄離家 賜食感  
恩偏高寒風味殊塵世但少梅花伴不眠

溫語

主憂臣辱分何辭  
溫語真成入骨悲  
敢向天恩論去就  
難從拜轂較安危  
千窮更作千年調  
五十仍餘五歲衰  
海碧峯青獨立處  
此生冷煖自應知

金州道中

殘雪明松徑  
寒波盪夕陽  
眼經塵驛倦  
心與海鷗涼  
搖落耕期晚  
艱難戰迹荒  
攀鱗違素願  
誰可語行藏  
路歧

得駕仍蓬累  
沈吟感路歧  
回容勞制御  
失仗易傾危  
降辱心誰諒  
天田象有疑  
食桃長白近  
信宿莫淹遲

隨 駕至湯岡子對翠閣

寒解劉文叔溫泉此濯龍流丹建高閣聳翠對遙峯嚴  
衛窺觀絕宵征逆旅逢他年思 駐蹕銘刻繼唐宗

賦得蓮實

風露一囊多房房肖蜜窠最能清夏暑終不委秋波可  
愛纖纖剝遙聞采采歌蓮臺大千界心苦祕么荷

二月二日

彩殿崇隆曙色侵全將暉麗壓蕭森遷鶯賀燕紛時棟  
喝道籠街簇羽林入幕客卿翻濟濟布金供帳夥沈沈  
地衣堆錦花含笑辛螯誰知 聖主心



曙色

拚將忽忽送駸駸愁見紗窗曙色侵孤念欲窮天地憾  
勞生猶炯旦明心殘釭半燄容飄瞥瘁竹寒花有照臨  
欲變危機須果決誰將感激易沈吟

賦正紅芍藥

便欲人間第一誇最難正色似丹砂豐容宜作平章瑞  
奇麗偏歸穩重花窗几有情留晚照丹青難寫是朝霞  
一春風雨銷除盡寂寞東陽帶眼差

芍藥謝後作

萬紅飄盡出嚴妝一瓊悲春作道場猶有風神掩姚魏

可堪憔悴是姬姜全拋花信酬深色乍滿穠思得斷腸  
羸我相看自初好不辭銷骨送年芳

題宣和御筆鞞紅牡丹

明皇酣醉沈香亭夜雨蜀道愁淋鈴道君繪事更奇絕  
五國城中窟冰雪遊戲豈是天子事後身重光今再至  
一枝帶露寫鞞紅香國胡然見天帝當年宴坐瓊津堂  
赭衣弄翰圍羣芳素絹染成天水碧正色不數姚家黃  
一朝圍城迫烽火誰捧玉皇紅一朶六宮粉黛載明駝  
山色燕支真奪我宴山亭畔見杏花故宮何處悲龍沙  
披圖題署詞皇閣付與萬古長咨嗟

疆村侍郎題  
曰詞皇閣

與嘯林

更印

勞生人

飯餘無

無用茶

重至工

蠻觸地

可羨隨

艱百年

來長春

弟君適表侄兒子邦直

故人兄弟得連牀，強半征鴻聚作行。  
分得開顏忘戚戚，因何矢志轉佺佺。  
閒行不礙荒園小，旅食惟知白日長。  
學道無成世緣減，欲憑何事掩悲涼。

嘯麓園中桐花正開，久坐其下，以詩寄懷，因和。

香中有至清，桐花最爲佳。世人不知賞，但數榆與槐。  
微之昔獨夜清陰，倚高齋幽然妙香，至萬玉飄苔，皆因之。  
懷故人微吟寄詩，脾迢迢商應宮清，若雙鳳啣朋友，有  
至契義等君臣諧。兩人一夕感淒我，千春懷樂天。本熱  
士一蹶甘照埋，微之並高才，枉尋肆擠排，薰蕕理何常。

一念成歧乖儻保清淨退豈非賢哲儕嗟君與我別情  
與元白偕山川雖悠阻徒能隔形骸偶感桐花落身世  
淚莫揩芳馨入秀句相贈逾瓊瑰我今苦離索作惡句  
日皆妄冀荃察情幸未橘化淮何時遂幽討與子投林  
厓高館憩層峯連牀對若鞵生心水精域回首空塵纒  
絲桐奏良夜和露吟松釵

挽劉潛廬議政

違天復明辟功罪兩何辭執隘難酬志當仁更屬誰  
睽孤傷氣類軒豁出肝脾待合張劉傳千秋史有詞  
早著人倫鑒神州誤甯馨多言臣不幸至死目難瞑歲

月淹牀蓐精誠繞 帝庭滔天方未已何以慰英靈

夢斷

夢斷殘宵宿雨收閒懷清冷恰無愁林通月色微疑曙  
院絕蟲聲自覺秋不競溫涼吟羽扇解危腰領憶羊裘  
屏除聞見齊喧寂誰識滄波不繫舟

夜起

往來思想任騰騰已證禪天第一乘康濟自家餘瀟茗  
照明一室且迴燈晨趨卻曲門多客夜入蕭寥院似僧  
咫尺不殊心境異懶將公案問南能

孤明

孤明先夜曙萬象入心寒未竟百年事甯能一榻安乖  
崖應救火新建不忘官心在形神瘁空悲嶽降難

書玉谿詩集後

幾多惆悵負華年恩怨紛紜只惘然儘託門庭誇彩筆  
終迷闖闖誤鈞天私書約後忘機否好夢成時枕手眠  
能使柳枝驚問訊不妨幽憶寫黃泉

九逝

寒拾長廊開口笑璧琳古寺倚松吟八風凌碎不到處  
九逝蹉跎餘此心同難故人皆喪逝積年蓄念費消沈  
夜來月色清如水照我繩牀百感侵

慣聽

慣聽烹微鳥語喧百年心事幾涼溫強知家國疑無賴  
能外身名儻有存蹇習逡巡聊半數冬郎慘戚爲深恩  
愁聞消息如雲幻蒼狗難期變滅痕  
大覺寺遲立之不至

當門樹色非前度繞砌泉聲似舊時一笑僧房那易得  
故人期會莫教遲

風泉聲裏殘蛩語松栝陰中碎月明永夜不眠清欲絕  
何人與會此時情

過頤和園宿香山旅館



當年絢爛極西郊咫尺宸居雨露饒供帳曹司紛百  
局傳呼燈火接三霄何時秋夢驚銅輦賸有春風到柳  
條承直小臣今白首聊堪閒客此閒謠

妙峯山娘娘殿進香

秀絕中天第一峯鳳冠高簇翠芙蓉潛心迥出孤雲表  
善眼仙留滿月容石作圍屏張錦幄道排嚴衛肅虬松  
青山獨往容閒逸神儻愁予正直胸

香山作登高之會  
九日同季馥鞏庵勉甫桐君及強志貽先弟約立之至

秋光全爲一山濃磊落欹崿十萬松未遠雍乾明聖世

猶餘林壑帝王容時危強興成佳會地勝逢辰起舊慵  
斷雁分飛天萬里何當放眼最高峯

立之山居養疴寄贈

二邱一壑養生主聽松聽水逍遙游本來無病維摩詰  
長慣單棲許散愁世上榮名仇晚節山中風物媚清秋  
高寒夜夜月明好與子相期最上頭

寒宵深坐對龕燈信是前生粥飯僧山水清緣幾兩屐  
乾坤長物一枝藤龍鍾忍事真人傑獼獠參禪沒技能  
無用扶衰資大藥半空鸞嘯訪孫登

壽散原先生八十生日

每念散原叟奮飛無羽翰  
名山留客久曠宇見人難  
天閉孤光在塵空老淚乾  
依趨賸袁子問道破煙巒

能爲詩人重藏深世隱  
持身眞老寂寞壽不負  
期頤一念殊霄壤分歧  
邈友知當無豈無用九鼎  
繫風絲

萬彙幾榮落春秋獨老翁  
息機四天下畜德一山中  
孤格無心見醇懷異趣融  
沈冥空轍迹藏密入鴻濛

雲窟曾相見冰霜慘澹辰  
倚翁正憂懼酬我別酸辛  
菟枉攀天夢仍羈報主身  
直辭祝難老幸未愧依仁

辛未十二月至旅順 行在所 上爲僦小樓三椽並

購鐵牀一長方桌二椅四飯碗菜碗小碟羹匙竹筍

各四茶壺一茶杯四水壺二白鐵鑊二炒勺一小鐵  
勺二乃至盥漱之具罔弗備皆 上親過目次日入  
謝 諭曰患難君臣猶兄弟也其無謝此千古臣子  
受恩所未有者敬謹陳之一室以示子孫勿忘報稱  
今歲壬申秋八月立之君任勉甫聚晤室中每至夜  
分因爲之圖並紀以詩

傷心趨走地沒齒 解推恩羈旅資生具纖微 聖慮  
煩自驚殊賚溢頓覺小樓尊未有涓埃報應慚示子孫  
才拙 天容養 恩偏地轉幽獨爲 明主諒深喜故  
人留多難身經切無心物競休燈窗辛苦語前路若爲

酬

書廣雅詩集後

吾生猶及范希文畫牘憂時每夜分晚節艱難詩愈好  
遺音哀惋世甯聞長沙久鎮人誰替元祐重來日已曛  
辛苦與人家國事調停術盡欲何云

永叔窮工語不刊達官容易廢雕鐫曲江感遇微言絕  
綠野灰心五字傳老去恩深前席對夢迴愁絕帝京篇  
憂傷小雅繁霜後此卷千秋合讓專

荆公

荆公六藝冠羣倫鼎足清風如賤貧直以仔肩付天地

最難遇合極君臣論評世遠猶難定宗社根披遂不振  
間氣高文容可遇從來曉事幾何人

次韻立之夜話

等閒名節易輕肥擾擾誰參第一機  
薪膽同仇歧路隔  
輩流洗眼廿年非空經喪亂丹心破  
未有江湖白髮歸  
接膝寒窗燈影畔  
久要殘菊尙成圍

殘菊次韻立之

小樓殘菊伴淹留  
卧起都忘歲月遒  
自笑後時容愛晚  
早成相負敢矜秋  
青霞鬱意迴餘綺  
冷月招魂淡一鉤  
解道孤芳擅天地  
騷懷端合付冥搜

次韻立之

斂手忍言天下事孤懷猶吐眼中人容還趙璧無秦政  
不賣盧龍獨子春柁浮槎真到海負恩何計可收身  
未須皂莢相料理珍重寒宵語達晨

遼陽道中見紅梅以重價購得之

來作人間第一春故應慘澹見凋晨夢投暗記青霞佩  
酒暈微頰縞袂人滄海淚乾迴一笑冰天鏡冷對孤顰  
自傷自媚空塵想未管啁啾翠羽噀

壬申除夕

去年荒海層樓夜危苦心情黯向晨坐送流光一彈指

事違初意幾由旬迎春爆竹除宵禁破萼唐花逼歲新  
冷暖分明今昔異就中知味定誰真

寄立之

山情粥味兩無厭舒卷惟君道可兼橫覽共悲人落落  
高談猶起我奄奄意中龍象神如接膜外雞蟲事已纖  
但惜自身足康濟策勳空守戒香巖

學道

學道原知萬事輕無心甯復起心兵花時啼鳥非常樂  
雨後晴窗分外明半上簾鉤懸海色小安茶鼎引松聲  
眼前已是羲皇世只要先生了死生

時室人  
病甚



王病山先生見予近詩微惜其枯實中予痼因成此作  
負負孤行不自疑悠悠輕負百年期波臣何計逝東海  
蝸甲猶然留故枝孤月此心心蝕後傾河比淚淚乾時  
寒巖枯木成滋味聊感先生聖得知

同勉甫子玉覺先吉林松花江邊晚眺

泫泫波湧玉魴流寫影雲山兩岸秋高柳城坊疑白下  
晚江鼓角似黃州氣佳勢勝無南北地轉天迴感去留  
風景不孤窮塞主經綸誰任富民侯

大連山中雨夜寄立之

小樓一別無談處鄙吝填胸不可消何日更酬高世論

我魂重得故人招功名太岳同塵刹事業姚江本寂寥  
吾見未能聞語斷空山寒雨坐秋宵

寄君任

太傅當年序贈歐桐城風義足綢繆斯文誰任中流柱  
家學重看太乙舟此事百年關喪亂瞽儒幾輩墮溝猶  
功言一手湘鄉盛莫遣蟲魚徇白頭

補作朱文直公挽詩

卓爾瞻湖學澹如正禮曹小顏非迹近大節薄名高去  
國行吟悴穿藜結集勞瓊琚緘至痛一代振風騷  
待我虛懸榻相望歲月深不成執手訣終負託孤心失

意龍邱杖傷神子敬琴百年多苦相滄海感遺音

遺疏齋行在風饕雪海邊動容褒直節流涕說庚年  
瘖口惟憂佞孤枕那勝天至今淹日馭何以慰沈泉

偶作

蒼水湖邊占一邱石齋江底有高樓始知經略乾坤者  
尙是人間第二流

書歷科狀元策後

國家養士恩潭潭臨軒詔問尤尊嚴焚香士求忠孝一  
大廷策對天人三傳臚歸去馳御道戴花擁馬傾城瞻  
雖云三年此故事風行海濊歆窮檐持世長物只論語

眾流截斷羣陰潛空山腐儒風雨夜掩卷寤寐唐虞酣  
鼓盪羣動納至靜止亂豈復勞兵戡君臣意周禮至重  
氣象如日升東巖范公先憂自襴衫何況天子門生銜  
一生喫著語至陋蒿梁砥柱視所擔君不見流芳百世  
文文山又不見萬年遺臭留夢炎

寄答強志

知心四海一立志萬年強老至惟兄弟孤根共雪霜相  
悲餘惘惘相慰亦堂堂寄語愁真宰書天字一行

獨夜

獨夜羣動息廓然何所思莫楹餘穆若

上丁隨  
扈祭孔望葛只

淒其幽草夕陽戀寒花秋露滋報恩無日短何敢惜  
衰遲

強志自天津來聚晤十日賦此並寄寥志貽先詢先上  
海

相視俱頭白堪悲亦可欣過時傷晚學多難感離羣故  
國荒松壠南天冷雁雲殘書共憂患聊可策微勳

九日和惜仲兼寄寥志強志貽先詢先

了無風雨負重陽賸有清愁染鬢霜心著遙天雲不散  
秋高窮塞氣先涼但教寄語稱無恙便抵相看對舉觴  
人事茫茫信搏控何時真似雁成行

至味

至味惟蔬食相親只苦茶温經路上口習字偶塗鴉有  
夢依蕭寺無情到菊花未能佛弟子且近僧生涯

搖落

搖落不須驚寒山有舊盟還將無限意輕徇有涯生伴  
坐琴書淨開窗雪月瑩向來知我者孤枕最分明

密之來自荊州除夕共飲感贈

十年契闊同今夕萬里間關共一卮各已形容成老醜  
尙餘臭味未差池襄陽何處尋耆舊荆楚無心記歲時  
萬事推排難自料白山邂逅豈前期

病目初愈

張玄豈遂矇真解馮信何時目卽清且喜天還讀書眼  
依然夜對短燈檠

本性

何與人間事蹉跎繫此身深恩聊忍死絕遇只傷神蘭  
是閒庭草桐餘爨下薪空教違本性何力報涓塵

苕雪治薊作諸葛武侯詩余有感於當時人才之乏亦  
擬一首

英彥乘時各有投酬知晚出佐殘劉同心儻可關張并  
替手難爲費蔣儔狼狽東行思孝直艱難上士得涼州

擎天孤柱終何濟遺恨悲涼淚不收

寄伯夔君任

吞聲不復憶江南渺渺余懷餘二三  
蝓志何人分奄忽方姚而後此沈酣  
感君契闊輕千里於世畸零暖一函  
冰雪千山萬山阻夢魂無著卧荒庵

春色

春色乍逢三月盡柳眉纔吐杏微嫣  
漸離冰雪侵凌候又入風沙莽蕩天  
誰使託根高的的可知含怨一年年  
我來暫賞旋惆悵小逗芳情已化煙

予詩學山谷畫師子久兩事皆不成戲成此作



人間第一一峯畫天下無雙雙井詩顧我蹉跎衰白候  
強希衣鉢二黃師筆枯水賸山殘裏思絕天荒地老時  
百慮相攻才力盡不躋聖處坐非癡

春盡後又二十日見海棠一株妍媚絕世約治薊同賦  
歷盡冰霜慘澹晨眼明初見內妝新三年刻畫寒林影  
一笑平反故國春獨薦東皇誰分妒乍迴宮體已含顰  
按歌一世空銜雨珍重今番點絳脣

### 明妃

蒼雪作明妃詩古人詠者多矣不能復著筆予有感  
於女有色而不見知猶士懷忠而不見信明妃能使

元帝悔悟猶未爲不幸也亦擬一首

光影徘徊別漢宮胡沙萬里入春風  
豐容絕世身難贖一顧驚天遇未窮  
瀝血長宏空化碧蔽護正則枉懷忠  
貞臣正色蒙知少欺隱何須怨畫工

戴文節公遺硯刻梅花一樹縈繞四周  
左側鐫鹿牀居士製五字微有損文  
予以廉價得之銘其背曰質損而神  
完猶取義而仁全世皆棄而蒼虬所  
專昔文節以書有破體不爲宣宗所  
喜又爲穆相彰阿畫山水便面未設  
色穆以爲輕己遭讒斥退後居杭州  
殉粵匪之難予有感於公之遺事爲  
作此詩

鹿牀自製梅花硯鐵石風流宋廣平只合隨身玉堂直  
豈期淪劫錦衣城書耽破體原臣罪畫愛寒山不世情  
潤飾承平讓公等終然退斥出孤貞

雨歇

雨歇空階入薄寒舊書欹枕百回看睡魔盡遣茗功德  
曙色微侵燈涅槃林弄啁啾紛自悅壁緣跂脉可能安  
自家功課未渠了拭涕何心問懶殘

寄懷散原先生

靈光卅載返修門回首匡廬萬雪痕馬祖去因山鬼敬  
老聃居益鎬京尊決流浸軸終趨海忍死攀天餘斷魂

便欲從翁屏間見都忘物變信乾坤

次韻君任風雨見懷

老耽文字慰衰遲孤往如君夙所期  
永叔深濡馬遷筆簡齋輕了少陵詩  
世間何好能相易歲晚歸墟更不疑  
一夕秋風感離索寥懷惟有塞鴻知

和史文甫寄懷

故人萬里寄詩篇回感前踪損夜眠  
未致賢才真負主全疏人事敢貪天  
久要漸蝕平生意有醜難酬未盡年  
把酒重逢何日是只愁相見益淒然

蒼虬閣詩卷九 甲戌七月至丙子

蘄水陳曾壽仁先

少壯

少壯同心老護持與君暫別亦何悲  
拖泥帶水人間世修到天空海闊時

冷暖

冷暖憐捐外臨歧一念過同心恩不細  
回首悔偏多不作安仁悼還殊漆叟歌  
時乎翻手至用力證誰何

秋日雜興

靜院同僧宇庭蕪滿露華寒蟲親敗壁  
殘月背秋花流

轉會無我牢愁亦有涯  
占爻逢井渫吾道付匏瓜  
易遂孤行志難求獨喻安神蕪  
幽夢斷心苦願香寒秋  
宇澄煙靄高鴻勁羽翰略無塵  
世意去去海天寬

八月余送亡室柩至舊京獲見散原先生年八十有二  
別六年所矣君任北游已倦將南歸聞余來止不行  
伯夔自上海扶病來會立之亦自津來文酒過從無  
虛日數年來不易得之會合也雨夜不寐感賦一首  
呈散原先生並邀諸君子和

無成真負遠離別得見初憐有語言  
倦世殘年仍此會  
彌天一老重相存  
雨風故近重陽節  
尊酒難迴九逝魂

不學早衰虛志事沈灰猶藉瓣香温

雨中夜起時寥志二弟自上海來強志三弟詢先七弟  
自天津來同住農先六弟寓中

收身何晚悔應遲峻坂甌臾自不知無淚人間甚滋味  
夢親地下尙嬰兒苦空法喜孰真幻無著天親深護持  
不斷思量還起坐悲哉秋氣雨來時

題心畬宋墨拓本

温公有至言茶新墨惟舊半笏能返魂隱几夢元祐  
題心畬嬰兒捕蝶圖

見虎了無懼見蝶欲生擒前卻皆天機漫鼓中郎琴

蒼雪六十初度

論交端不愧陳徐萬元千搖鬢各絲化鶴何心重會合  
解牛滿志費躊躇向來活國推无咎未信鈔方老敬輿  
無負相期看晚節惟深心地念居諸

談論淵淵無盡藏龍蛇誰信道東方忠思元直能無惑  
通介徐公自有常嚴鑰迴車遲夜漏深檐弄筆映曦光  
蹉跎束縛殊臣甫雨露恩深歲月長

周孝懷六十初度

與人家國豈區區瘖口曉音旅順書四海難忘惟此老  
三年不見想高居自身物外能康濟豪氣樽前未掃除



玩易閉門忘歲月相從便擬賦歸歎

挽陳弢庵年丈

舊學資開濟深心念始終彭年供閱世漢鼎懋餘功  
跋涉忘衰暮綢繆見至忠堂堂青史在希遇古誰同

朝露傷元祐殘陽感義熙白頭天所相晚節世猶持  
元素迴天願端明大雅詩丹書陳在几望呂一淒其

世換空耆舊公希大父行虛衷逾敬禮引坐愧文昌  
京國交期遠行圍直日長從龍餘幾在回首涕浪浪

李鄴侯

事急易受言豁達稱高皇承平骨肉際何益百子房  
怒

哉李鄴侯寵榮無比方聯轡復對榻莫救建甯王苦誦  
臺瓜詞中夜起彷徨華茵伏鍼氈刻骨神慘傷隱忍復  
隱忍眾情安可量進退有大節龍蛇寓行藏一朝決然  
去冥鴻天際翔

邯鄲道

漢文車駕新豐迴慎夫人從同輦陪眼中忽見邯鄲道  
當年迎立自此來同來時遷復同過感新念舊傷心懷  
死生離別誰遣此長歌倚瑟聲悲哀人生富貴事儻忽  
恐懼安樂殊乖諧文叔鷹鷂起帷帟勤求故劍良難哉  
古往今來邯鄲道夢中擾擾千車雷誰能同來復同過

可念霧露深雲臺

甲戌除夕

雲淨風微自悄寒  
焚香無語對椒盤  
樂非君實還成獨  
詩遠梅翁卻帶酸  
早識殊途分壯罔  
晚知有味說金蘭  
神傷帷幄楓香好  
夢想扶搖萬里搏

與治菴夜話

霜風著意撼凋林  
擁褐寒窗苦語深  
賸有險巖供晚悟  
忍游寥闊洗初心  
祀輿高趣曾無與  
禽向遺蹤不可尋  
羈緒鰥鰥同此夜  
荒棲難穩等驚禽

題心畬秋圃雜卉冊子

采香徑裏日初成  
露浥霜凌各有情  
微悴未關蟲蠹事  
閒愁偏向玉階生  
淒迷舊色難爲寫  
冷冽奇芬不可名  
蓀壁蘭疏曾夢到  
靈修遺恨苦難平

相逢遲暮亦嫣然  
一晌魂消瘦蝶前  
隨意幽娟成絕代  
無名秋病老情天  
蕭蕭暮雨收殘佩  
黯黯紅燈影墜鈿  
歷劫芳踪消未盡  
舊香證取酒痕邊

天憐誤認晚晴時  
立盡斜陽欲去遲  
碧榭朱欄成永憶  
金風玉露最相知  
無心採佩援琴操  
終古芳香託楚辭  
休問中情荃察否  
向來恩怨總迷離

望中誰實百芳庭  
捲地涼風取次經  
入夢姑蘭虛服媚

迴心蘇蕙是英靈孤根託處甯辭忌沈醉聞時倘可醒  
性烈香煎終不悔起看鴻影入青冥

春盡

春盡餘寒戀敝裘焚香淪茗近清修古人不見來日遠  
小睡爲佳書味留太史周南多感憤賈生湘水悟浮休  
境遷不覺塵懷冷夢入松風萬壑秋

木公以惜抱文彙卷子屬題爲其師馬通伯故物

我昔勘書官學曹桐城一老同昏朝澹懷萬事不挂眼  
心維口誦惟方姚精誠所結好所聚閱肆妙蹟逢靈皋  
朱書平點柳州集辨析雅鄭嚴秋毫惜抱遺文舊所得

酒酣出示珍珠刀行草宕逸味雋永題品妙稱安吳包

座間鳧翁最傾倒書後博引何滔滔

義州李  
文石丈

春明燕飲

事在眼家居撞壞羣兒跳抱潤先生亦宿草長物散失  
寒煙飄醺醺至味沁肺腑墜歡隔世難重遭斯文一脈  
有冥契縱極天杯終難消沈淵連壁復照眼如水收覆  
魂相招去年舊京觀袁子摩挲柳集真久要君復徵題  
姚手跡拓本遠致千瓊瑤

君以所藏古器拓  
本見贈凡數百種

桐城後勁

兩君屬彌天風雨聞嘒嘒我落窮邊歲月久所思不見  
徒心勞何時傳觀得合併光宣舊夢迴寒宵

伯夔以所藏惜抱典試魯湘日記冊屬題

我昔戲言古人所欲見當代莫先惜抱翁行如望溪加  
蘊藉文追永叔仍淹通標宗論學本末具顯晦與世關  
污隆觥觥筭河李元禮萬派吐納皆朝宗少年相逢盛  
意氣追逐上下如雲龍袁子才陳伯思朱子穎王夢樓

並豪俊辛陳異幟歸牢籠江山跌宕照千古四時氣備  
誰能同嗟予不學空仰止蟻蛭何自希高蹤惟君懷賢  
乃過我寶貴尺札逾蒼琮輶軒所指被時雨南錢北孔  
雙鐘鏞曹溪一滴匯滄海繼起百輩成流風湘鄉表章  
炳日月梓湖持論隘未公吾子私淑深入室絕境自闢  
天難窮吁嗟古人不可見安得與子歲晚婉婉變長相從

淹留

三十冰雪此淹留未識春風已入秋  
濃笑有花多僻異高鳴無鳥只啁啾  
致身礪石誰羊鼻入夢精魂感馬周  
際遇由來關運會深恩惆悵若爲酬

夏日卽事

低簷暫歇雨淙淙喜曝衣乾語鵲雙  
小落伊威妨倦枕斜飛野馬界晴窗  
生涯曲几殘經卷食籍寒菹老瓦缸  
無用尋山參佛祖見聞滅盡我心降

松花江岸閒步同治薌

連洲芳草暗魚砧山色家家映水窗  
萬里凋顏雙禿鬢



三年明眼一澄江曾無豪興飛銀鱸暗有歸心落遠艫  
回首滔天三戶盡愁言風景似鄉邦

余喜夜坐每窗紙見微白始就枕蓋廿年以來矣感賦  
一首

攤書侵曉慣眠遲耽好妨生我一癡千載古人心可見  
百年獨夜味誰知青霞意鬱人常在金印腰懸氣已尸  
破榻寒窗燈影畔此中便了此生期

乙亥七月初八日恭謁 福陵 昭陵敬賦

干霄松柏鬱蒼蒼巍赫 神功接混茫臣甫拜趨思歷  
數道周魂夢感高皇豐碑 謨 烈天難繼如帶源泉

氣自長報國無能攀戀切餘生合署老司香

曉色

曉色矇矓紫氣新初懷高枕自爲春眼前太古深山境  
意表朱霞白鶴人年異師丹全忘事蛻留徐甲已無身  
不關參悟存公案一念清安覺最真

偃蹇

賈誼形遺委控搏退之鼻塞等猶蘭遷流任化乾餘骨  
偃蹇還容格外官大道固應多屈辱小詩何意入波瀾  
絕人公事崔丞了竟日哦松抵挂冠

夜爲嚙蟲所擾

此身自厭亦何惜還爲么麼費抑搔絮壤縫深天幾大  
跼香回臭我安逃探懷早卜初衷失捫舌空餘強聒勞  
檄討有心臣力薄分無才筆動天褒

易林探懷得蚤所原失道

新發屯夕望

寒洩頽雲漏夕陽樓臺隱現表重岡新秋已自趨嚴警  
壯構猶難掩漠荒浩浩市聲從遠至高高邊氣竟天長  
關河形勝無窮事愁絕詩心付莽蒼

歲晚

歲晚吾安託心寒分不言半生知句法一夢遇騷魂聽  
雨懷坡頽聞雞謝遜琨慨慷原強耳衰語更何存

秋園

秋園喬木對陰陰已是寒山落葉心朔吹鳴空殘角斷  
瘴雲鋪海萬鴉沈問天惜日冤魂語絕地排山梁甫吟  
廿載重驚春夢醒孤懷收拾入蕭森

違世

洪水原非一簣堙我生違世幾由旬不曾脫略小時輩  
相遠依稀陳死人卞壺區區執鄙吝紀瞻寂寂坐逡巡  
書生迂腐誠難藥妄許憂時稷契身

舊京訪散原老人立之自山中來會

相逢一笑萬金藥愛子山情眉宇間坡老游哉聊卒歲

稼軒健者也會聞兩年不負茱萸節一老常存冰雪顏  
便欲與君尋舊約松風好夢莫教還

伯夔君任題予詩卷和韻

曉歲相因依恩緣豈微細詩卷隔歲看殷勤續題字頑  
石閱頽波昨味了不異悠悠防日損汲汲恐矢志綢繆  
五交外僮僕見真意作歡未渠央已復感離思跬步爭  
滑坡遑暇顧違世瑣瑣恩怨空心光炯初地東坡別季  
常貽詩寓微詣各期檢缺失黽勉別後事端有真不滅  
文字特餘寄

乙亥秋九月至舊京視散原先生日與心畬叔明立之

伯夔君任羹梅過從寥志強志貽先詢先諸弟自津  
滬來舊藏五十餘年陳酒由杭至京連日聚飲賦詩

屬和

開眉今夕是何夕羣季故人俱眼前行歌早已覺春夢  
飲酒猶能迴少年長統埋憂甯有地淵明試酌忽逢天  
雞鳴喔喔談未了三丈日高仍醉眠

申君溫克午君豪笑我纔能受一瓢忍餓長憐予季役  
高歌還愛阿龍超俠儒狂狷各奇趣離別苦辛甘久要  
爲惜芳尊挈餘瀝塞鴻風雪慰飄飄

五弟覺先九弟  
識先在長春

友如兄弟弟如友此樂端能償百憂不逢大道三騶卒

還勝東坡一子由老圃黃花初冒雨西山紅葉正矜秋  
莫將盆沼魚千里輕負機雲屋兩頭

天慳後約敢奢望心喜故人俱昔同微醺何似眾皆醉  
妙趣尤宜時一中杜癖顧癡形自累庾肥沈瘦語徒工  
待呼遙集幾兩屐來壽茶山九十翁

散原先生游陶然亭遇某某拈韻作詩余病未往強屬  
予作

城南朝士千觴地四十年來自可驚聊爾閒蹤成故實  
黯然影事隔平生荒邱客去苔綦合老屋僧殘夕照明  
我亦逡巡餘夢到強隨題句若爲情

留別蟄雲

一雁驚寒塞雪深臨歧難住且沈吟古壘無己曾何濟  
高世元賓不可尋謂李瘦菊支秋香黯黯苦茶澆夜味  
沈沈名山絕業千秋定只是難酬惘惘心

茗雪於內苑見菊花感舊有詩予亦繼作

投老邊庭犯雪沙眼明上苑挹霜華誰教翠幙圍疏豔  
長誤紅燈影墜霞秋色重看真夢裏冷懷何處不天涯  
自憐蕭索今如許無復心情到菊花

讀史二首

晚節扶持仗友生切憇每見古人情題門一日絲猶絡



仰屋無常語可驚

林宗倫鑒蔚宗疑從古惟人不易知  
苦向鍾山辯心迹多情猶覺惠卿癡

夢與娟淨居士同移居於西山之麓  
精舍幽深紅葉滿階下醒記以詩並邀娟淨同作

修到西山共一龕階前紅葉醉霜酣  
投邊垂老心枯絕那得高人落木庵

舊約逡巡踐未能煮茶相對一枝藤  
天身衰相休辭避合署霜龕紅葉僧

聞蘇堪作東坡生日戲贈一詩

平生鄭重九還記我東坡破寂殘年興開尊令節過換  
羊書更好無竭墨常磨用意榮枯外何煩春夢婆  
乙亥除夕

焚香煮茗無餘事感舊懷人竟若何更事原知如意少  
苦心還覺負恩多故居梅訊愁相問蕭寺松風夢屢  
過甘分漸將諸妄息年衰卻恐是蹉跎

此間雉多而值賤入冬卽以侑食予齒脫他肴多不能  
決每食只此一味或益一菘而已忽忽三載未嘗生  
厭計所食不下數百矣感賦一首

服食慎尼父鄉黨記甚賅終篇及山雉微旨費疑猜自

我來長春旅食誰相陪  
決肉老無齒淡薄愁羹材惟雉  
實充塞弋取冰雪隈  
剔骨用縷切薑筍同燔煨  
朝斯復夕斯風味良已佳  
忽忽閱三冬食籍誰安排  
愧予口腹累忍致原禽災  
先事而後食顛泚養不才  
茲性特耿介未信甘囹圄  
媒殺身爲小補士執義所裁  
分當勇致身直往不可回  
一笑觀朶頤時哉豈時哉

懷人四首

後村集內方孚若介甫詩中王廣陵愧我天泉空徹淚  
千秋誰識有嘉興

後村挽方孚若詩使君神雋似龍鱗行地飛空不可馴 強甫

平生四海論交後耐久方知謝復園苦憶深談共羣季

百年老屋一燈昏

復園

蘊藉能工絕妙詞最難石帚與同時  
和禪未淨殘生淚地變天荒剩自知

疆村

淒馨哀豔比江遲慘綠年華黃絹詞  
學道者顏哀樂淡

依然淚濕落花詩

蒿庵見予落花詩嗚咽失聲

憶阿育王寺方丈山茶

四圍山色靄庭花石磴爭碁至日斜  
最是禪心沾惹處當窗一樹白山茶

書梁文忠公遺詩後

早歲名高有悔辭中年懷抱太淒其  
酒酣小杜凌雲氣

春去冬郎絕代詩蓮墓松風魂繞處橋山雪夜淚枯時

傳心一語終難滅病榻微聞細似絲

易簣前謂曾壽曰人心死盡我輩心

不可死盡一分算一分聲細如絲

道路胼勞百祟侵真成銜木一精禽經筵自昔因人重  
晚遇何期與恨深書札長緘千點淚斗罍無復十分斟  
性剛太傅門生在忍事全灰請劍心

### 紀夢

今生了不記俄爲何世人夢中有寐覺所覺孰幻真沈  
沈古剎中斗室棲我身一身繩榻上開眼微欠伸日影  
滿東窗計時方及晨枯几攤卷帙壞壁懸瓢巾不記生

我誰亦無妻子孫荒荒何歲月寂寂餘爐薰旋來擁箒  
奴偃僂除埃塵口誦普賢偈悲音動心魂虛空不能容  
無始貪癡嗔誠心猛懺悔記授菩提新眾業自無盡我  
願自無垠彼唱我徐和既寤猶津津嗟我有生初大母  
逮雙親有叔復有姊弱弟惟午君六齡出京師鄂渚三  
十春蕃衍族滋大人事故叢悲辛飄風六十年忽然迹已  
陳萬里異色天峨峨冰雪鄰君恩未能去麋性安可  
馴前塵既渺渺來軫尤惛惛還視窗日影玩榻徒逡巡  
和蘇堪夜飲三首

一世難逢了了人尊前說餅最清新韭黃生菜兼冰雪

便與平章作好春

往往聞歌鼓市中朝朝入直對哦松不須更說同光事  
風味行園可再逢

劉

忠誠

張

文襄

沈

文肅

李

文忠

想神姿從事誰知老更

奇不恨古人吾不見稼軒妙語故堪思

與蘇堪茗雪治薌夜飲各成三首

朋比薰爐怯酒尊寒林相對耿朝昏看看雪霽三月暮  
辛苦春工換小園

宮禁掃除甘穴散歸來面壁卻如僧多君挽出縱談笑  
亦似東風來引繩

不欠魚羹未拂衣端平心事付誰知甕齏食籍同寒士

猶是希文畫粥時

後村贈鄭丞相詩江湖不欠魚羹飯卻爲君恩未拂衣

### 題翰林集

把卷微吟輒斷腸一生同病只冬郎分明坐久槎逢斗  
不待歸來海已桑無限幽情隨暮雨幾多清淚濕紅芳  
顛連莫爲唐昭借正有隨身孤鳳凰

### 立之屬賦白孔雀

高展瓊屏素羽齊金花翠尾品原低飛依王母銀臺隔  
背寫邊鸞粉本迷霄路雲裳曾夢舉閩山玉樹不雙棲  
東南何限徘徊意未暇哀吟小吏妻



一夕夢至陳仲恕園中花木鬱然有小精室爲予畫竹  
一幅題語甚多壁間懸其尊人藍洲先生山水小幅  
尤精妙醒記以詩

錢塘賢俊稱二陳坦蕩尤推髯絕倫舊京隱伏廿一世  
誰知元是英雄人廿年蹤跡久闊略宵來入夢嗟何因  
小園花木鬱精舍琳瑯滿架仍奇貧興來爲我畫風竹  
低梢偃葉饒姿神更題長句寓憤慨纍纍押印紅泥新  
壁懸尊翁之手蹟倪迂小幅尤逼真當年先師關季華先生  
結深契往還書札逾天親使君江漢舊桐邑至今歌泣  
傷遺民老成雖無典型在可念往迹隨飄塵何時春明

更相見真看入手蒼嶙峋

次君任韻

樂事平生數已微  
凋年繼見更依依  
春惜別終難惜  
歸北歸南未是歸  
天目山中春酒熟  
桐廬江上鱖魚肥  
何時把臂成長往  
隔斷人寰所見稀

酷暑寄立之山中

虐雪饗風作道場  
那知世有汗如漿  
賸持塞外寒林影  
來淡樓頭酷日光

知君涼納五更時  
蒲葦冥冥月影微  
轉過山陰更幽絕  
小舟撐出乍添衣

舊京見黃芍藥

廿年負盡看花事來趁殘春亦可歛萬紫千紅渾意倦  
一枝愁對柘黃衣

小極音啞感賦四首

中藏失清虛寒燠乃見侵冷飲邊肺氣晨起忽成瘖甚  
難一字吐豈凜三緘箴平生坐口過忍俊每不禁惡業  
有體相虛空恐難任病啞暫自幸寡言神所歛吾聞古  
至言中士先閉心

辛勞念亡婦厚稟終銷磨經年不得語牀蓐淹沈疴我  
今偶失音兒女殊驚眠一瞑豈易事苟活良可訶回思

五十

瀟灑

際視

投艱

交諸

袁與

久要

少年

欲入

苦難

斯傲吾挽詩

區區人事君撫衷有深媿  
荼蔬或妄收冥鴻渺難致  
波流萬人海肝膽君小異  
攀鱗願始酬伏櫪志莫遂  
昂昂千里姿局促仰徒隸  
龍德疑天淵精魂斂壯士  
積慘摧越石醇酒死無忌  
宿昔同馳驅居困氣彌厲  
豈意沈寒灰翻坐回羲轡  
辛苦卅年心向注經天淚

入門驚蹶蹶出門感涼涼  
昔昔府中趨室邇人已亡  
平時少溫熨忽忽淡若忘  
一朝棄中路觸體如金創  
始知同志者不必居相望  
精誠共天壤闊遠能扶將  
但使類不孤自慰熱中腸  
今茲飮冰雪形神豈殊僵  
我行迫西

日復此異路傷一暝可終古論君志氣剛

族兄叔容相別三十三年茲復見於瀋陽幾不相識矣  
留飯海拉爾磨菇及自製藕丸風味絕佳談及家鄉  
零落之狀不勝感歎率成一首

阜帽藜牀歲月多卅年重見鬢雙皤盤中風味巴河藕  
塞上奇磨海拉磨話到家園堪痛哭未填溝壑且高歌  
腐儒濩落英雄老回首蒼茫等逝波

別西湖六年矣憶幽居之趣率成四首

幽居足良夜月出東峰隅滅燭坐空明靜極罷琴書山  
雨灑一陣清逼淪茗餘几榻入微涼荷氣流空虛湖光

熒暗壁葉葉風卷舒何人夢來此應詫仙人居

山居起我早曉色猶朦朧漱齒下階立蕉竹清露濃白  
雲褥低空上承翠玉峯氤氲奇彩儼若挂屏風山居  
雖云久奇景偶一逢伫興若有悟隔水聞清鐘

意行沿澗曲濕履芳露盈忽然微風至奇香不可名採  
尋遍高下衆綠掩一莖長蔓小白花燦燦綴玉英馨烈  
奪蘭蕙娟然發幽情相逢不相識一見真目成誓將表  
孤隱圖檢離騷經

古人有奇趣寒夜起讀書我廬雖不廣俯仰自有餘滌  
慮入秋清涉想含春愉生物觀氣象彌滿忘寒儒素心

期未來沈吟定何如

治薊同年六十生日

人間何處無良夜難得二人相對閒踏雪衝泥會不厭  
俗情凡語已全刪廿年愁隔春明夢晚遇仍同侍從班  
六十逢辰是佳節菊萸薦酒好開顏

王病山先生遺櫬歸蜀感賦二首

經筵左右九十日便了孤臣一往心耿耿填胸終不下  
磬磐蓋世更何尋早拚削迹仍推辱除是看山有笑吟  
廿載思歸歸已得峽江秋氣萬重深

醴醴二老愛王朱空谷偕來興不孤下榻談深非世味



付誰別後感西湖死生甯順庸關慮悲憤人天豈異途  
耆舊因依回首盡殘年殘淚尙難枯

落葉二首用前詠落葉韻

天涯搖落本相關漫借霜華發醉顏酒罷幾番聞夜雨  
妝成容易換寒山抱殘碧樹蟬同盡望斷平沙雁不還

多謝故人書遠憶獅窩錦幃夢躋攀

立之適奇香山  
獅子窩紅葉

寄遠緘紅尙有情矜秋愛晚似前生任教温室全靈壽  
從此寒林屬李成歲暮觀山人獨立夜長敲戶夢頻驚  
風軒掃盡秋何寄佇待空枝偃雪聲

蘇堪作東坡生日會飲

千秋幾丙子絕代一東坡置酒爲公壽年年逸興多老  
嫌金帶重各愛紫裘歌一笑風流在花枝發醉哦

髯翁生自華嚴界不借仙家七返丹異代逢辰原不隔  
窮冬嘉會自成歡身閒從識幽居味詩小猶迴大海瀾  
笑我多情華髮早蹉跎終是戀高寒

東坡生日酒間蘇堪誦寒食雨及蒼梧道中寄子由詩  
聲情激壯爲作此詩

坡老去今幾何世耿耿清光在天地年年置酒拜公辰  
坐客微嗟今昔異海藏詩老能駐顏韻勝于公有深契  
酒酣高歌移我情黃州蒼梧儼坐次蝸居雨中過寒食

海棠如雪紛滿砌君門九重家萬里孤臣偃卧空餘涕  
荒江落月迴孤角一往扁舟落何際瞻儻由雷肆惡謔  
路人猶識東坡弟遺詩千載動心魄當年身受何滋味  
故作達語掩悲涼豈真解脫忘憂惴天公有意變要荒  
遠謫韓蘇同一致達者或窮窮乃達此中得失難淺議  
惟公解事人勝天晚歲和陶入聖諦當歌對酒萬端空  
領取當前真實意

次韻惜仲除夕

寒花瘦影伴伶俜慣看春燈雪裏青獻歲久應忘舊曆  
賀正猶自望天星洗心童子無嗔偈遮眼枯禪十忍經

薄酒未消年事換，笑予非醉亦非醒。

子安同年用予寄散原老人詩韻寄贈奉和

早歲高談接士衡，晚來肥遯謝時名。銳鋒誰記楊無敵，

強聒空憐楚兩生。

在學部同子安疏爭新刑律  
喬左丞茂萱稱爲楚兩生

勝日杯

盤陪綠野疏星鐘鼓夢，西清心灰鬢雪邊塵裡。何日寒

鷗訪舊盟

次韻祇厂同年

不見高人對榻論，天涯何日酒重溫。早知楚失難期復，

誰料凡亡並喪存。拜賜冬郎空掩涕，

用唐昭贈  
麴豆事

移官臣

甫欲招魂春明遺恨猶難滅，更寤鈞天愴夢痕。

蒼虬閣詩卷十

丁丑至庚辰

蘄水陳曾壽仁先

次韻惜仲元旦試筆

溫香夜發水仙濃  
年景春明感舊蹤  
欲曙天光分罨靄  
生新人意自黃農  
趨踰深愧朝班列  
衰憊惟應  聖主  
容屈曲神山多歲月  
區區塵露報何從

詠花瓶

生來長是供花枝  
淨几添泉好護持  
幾度湘簾春日影  
今番相對夢回時

恭王舊邸萃錦園  
海棠最盛心畬王  
孫數約看花至今

歲始得踐適值歇枝春寒花遲小萼而已

臺蝕朱欄水渴池曲深蘿徑隱穠姿晚春風日猶淒冷  
絕世芳菲費護持曾是憂勤疏勝事只今追賞異清時  
熱天香燼難通奏爛漫催開儻待詩

丁丑三月至舊京與立之伯夔君任夔梅及心畬叔明  
兩王孫聚晤常至夜分始散心畬園中花正開以詩  
紀之

十分春色在鸞枝老去逢迎恰未宜惟有牆陰一株雪  
疏疏淡冶最相思

妝遲睡欠試猩脣簾外餘寒怯暮春不借東風誇爛漫

只應身分是天火

千花萬草醉芬芳  
幽妙清醲費品量  
微覺香中參酷烈  
插瓶偏愛紫丁香

小溪捧硯供題壁  
主客行吟入畫圖  
名署蒼虬佳石底  
欽崎相對不曾孤

密國檇軒歲一來  
暫憑香茗洗邊埃  
花時雨閣連宵話  
清夢人間第幾回

舊京視散原老人  
旋因事促返長春  
感賦

身世悲涼不可論  
寥寥天壤晚相溫  
豈惟空谷足音喜  
聊欲人間孤誼存  
故國春光欺倦眼  
五陵殘照黯驚魂

高齋小語風吹斷愁絕歸來記夢痕

蘇堪約遊淨月潭

一日名傳鄭國渠直移廣漠作江湖山圍翠幙開天鏡  
身共閒鷗入畫圖小艇乍堪衝峻瀨片雲何意送跳珠  
征衫檢點西湖雨惆悵煙波舊釣徒

書誠齋集

探湯絕筆見心期詩格誠齋不厭卑慣以纖新娛俗眼  
還將狡獪出偏師拔奇卻有驚人技白戰曾無寸鐵持  
堪羨虞公身死日堂堂博得一聯詩

予最喜誠齋挽虞丞相二句雪山真

將相赤壁再乾坤真大手筆向來無人拈出



府中白芍藥及雜花始開已過夏至矣

進扇懸囊節候新餘寒重裕且相親一庭花作晚春事  
萬里天掩衰相身波影搖人宜小立梧陰留掖感逡巡  
玉盤風露明如許微逗芳悰一愴神

丁丑五月十三日

舊恨驚心耿不眠沈沈影事渺如煙羊求歧路途何問  
葛采旄邱歲幾遷同夢未甘成已背銷魂難再是丁年  
分明後劇非前劇苦語何由訴九泉

二十年來事萬更梟豺狐蜚各縱橫諸公齋志誠難瞋  
後死投艱自可驚徑絕雲通容有日海枯石爛總無名

須臾共影熒殘夜可有孤光作啟明

次韻茗雪白芍藥詩

殿春春去奈佳期寂寞遺芳欲怨誰  
差勝傷離三月盡還如見佛一花持  
翻風偏自當瑤砌炙日何曾損雪肌  
難補韶光補愁恨故應莫羨楚樂無知

書江焱叔詩後

蘇堪苦說江焱叔能表幽潛意自長  
教外師傳空倚著卷中天地太悲涼  
仲車狷介有深性無已賡酬稀抗行  
成就若爲身世定獨行此士信堂堂  
后山自蘇黃後所與游者多悉平流  
故其酬唱不能如蘇黃之勝  
焱叔所交亦未能無所憾也

平生

雨過花氣馥深更並坐無言背月明消我禪心無量劫  
夢中一响若平生

園中遍植秋芳有花俗名夜來香者尤多入夜萬花齊  
放幽芬襲人亦塞外之一奇也戲作一詩紀之

花開真約黃昏後風露中庭月上初萬里涼秋愁絕塞  
十分奇夜慰幽居靈芸美盼鐙猶卻飛燕容光晝不如  
道服寒香太清絕不辭久立向階除

幽居

北牖森蒼雪南楹罨綠天安心毛穎佛同命蠹魚仙見

放猶難去非潛敢望賢秋芳淡移影容得日高眠

散原先生挽詩

磊磊蒼松姿翁爲何世人天風石牀夢歷劫一欠伸翁嘗

夢中忽若夢覺于石牀上欠伸而起不自知何世人也棄官非爲高絕糧不知貧

見人無過差諧俗無緇磷純天絕機事老輩誰等倫精

誠屈騷通茹吐垂天垠高風遺世間使我傷千春

一老不能容神州何偪仄削迹入匡廬洪荒忍結舌喜

我蹙然來談笑暖冰雪破戒盈詩篇荒寒留聲歎浹月

難竟留分手若永訣贈行語何哀萬緣盡一別豈意重

合并三載慰飢渴回首離合情嗒焉肝膽絕

冥心餘死灰回天瘞孤願窮途覓歸墟生趣略可見碩

果惟此翁歲晚矢婉孌舊京歲一來深交天所鑒

每歲請假

視翁皆奏明

便擬投劾歸結鄰爲侶伴素心約二三晨夕無

隔間相依守心魂寸隙聊把玩此願深可哀此約竟不踐六合一游絲蕭寥空畔岸

九日寄諸弟上海

病身佳節若相違強近清尊對落暉風景不殊懷抱盡人間何世笑啼非劇憐字曠蠅鑽紙遙羨雲空雁脫圍暫得心降書遠至萬方一概欲安歸

識先買白菊一盆甚佳

有典圖詩卷一  
三  
年來全負菊花期初浥寒香三兩枝幾葉殘經攤坐次  
一鉤冷月入簾時凋晨嚴夜獨宜我妙色華光合似誰  
欲寫精神慚筆力沈吟空惜出塵姿

寄海藏舊京

關天出處莫輕論幾度驚心入國門獨望西山誰共語  
晚來東道賸招魂嗟峨金碧都無恙板蕩蒼黔僅有存  
地動天迴愁偏處身謀甯徇一樓尊

同姜庵聽歌並寄詢先七弟上海

啁啾百鳥鳳孤鳴蹀躞三搥氣未平寒日餘姿染清淚  
萬方一概洗歌聲慰君哀樂殘生感惜我蒼涼絕塞行

爲報江南少年叔柳枝怨斷不勝情

惡聲啼煞白門烏法曲飄零慰勝無亡國何曾到商女  
爲鄰應悔聽吳歎難逢籠袖驕民世再見當場出醜圖  
愁念家山聲入破大千秋色上氍毹

臘八日煮粥感賦

香粥分雛鬧膝前兒時風味渺如煙老夫奉佛焚香了  
自懺平頭六十年

粥飯家風孰識儂多生禪味尙沈醞迷離煙水藏幽夢  
魂返南屏夜半鐘

病起寄強志長春

有虫言卷十一  
與君相與在清虛對榻經年一語無幾日離居侵病惱  
始知學道欠工夫長圖大念心猶在弱植勞生力已痛  
安得入山尋舊約松篁清景寄須臾

丁丑除夕

遠書危地報平安強抑驚心且作歡已有春聲喧爆竹  
聊尋好語對椒盤神焦鬼爛會何訴地闢天開有至難  
迴斡彼蒼誰得會硯冰濡筆起微瀾

聞爆竹聲不斷感賦

聲聲爆竹攪宵眠景象承平廿載前誰識神州半焦土  
斯民今歲已無年



卽事

庭樹惟栖雪窗虛暝色寒息交疏茗椀知味愛蔬盤未  
信乾坤息甯期旦暮安冰齋兼淡粥深愧腐儒餐

二月已過半小園春未遲日暄冰釋徑煙媚雪殘枝弄  
筆忘衰老添香轉歲時逡巡渾得計留眼待芳期

無端

慣住冰天與塞塵無端縹渺憶千身深燈亭館迴初夜  
細雨樓臺濕暮春亦識腸迴能害道終憐泥塑似非人  
拈花解事成微笑了了當前涕淚新

春雨

點滴初聞春雨聲江南舊夢不勝情梅飄殘粉濕幽徑  
柳暗嬌黃啼好鶯邊地東來惟積雪劫灰南憶賸空城  
冰畦寒漠聊回潤一漑何由洗甲兵

蘇堪挽詩

移國屬大盜決藩自名流罪首張與湯倒行覆神州惟  
君揭大義華管霄壤侔海隅始相見世外深綢繆憶與  
散原翁衝雪憑高樓三士共殘年冷啜酒一甌君意極  
凜烈信道無疑猶沈霾甘死前已自堪千秋

甲寅歲暮  
子與散原

冒雪訪君滬居君有詩  
云倚樓三士共殘年

會合非力能緣分天所判行在同入直昔昔對几案

閒暇極溫煇因急賴助援繫馬終一馳適遘風雲變一  
名我所爭假手君所擅斷斷持異同公言異私怨年來  
我杜門戢影絕酬宴數蒙過高軒旬日必相見深談移  
日影歷久無怠倦奮慵固殊趣意外垂婉變俯仰數陳  
迹作惡供慨惋毀譽膜外事懶餒由自斷來日非所期  
一瞑倘無憾

三月奉 命察視 福陵 昭陵界址山行有作

梵潮流轉界三千說法松風正熾然深禁偶看遺鳥影  
寂光長自攝龍天微寒暗送神靈雨飛翠遙迷淡沓煙  
穿徑衝泥有餘興聊隨傭作策衰年

春盡日遊西公園

雪院冰廬久住持，春來春去不曾知。  
偶經煙柳芊緜際，便有江湖浩渺思。  
未信此鄉能老我，竟成孤往欲逢誰。  
流連一霎年芳影，已是天荒海涸時。

雨中偶作

低迷柳眼倦忪惺，散漫閒苔欲滿庭。  
小雨夢回香未燼，薄寒花落酒微醒。  
牽連出處都無賴，悵惘心情總未經。  
自笑冬巖無暖氣，賸看邊樹幾回青。

將赴舊京茗雪以詩贈行次韻

逆流故步未曾離，水馬安知力已疲。  
氈毳自疑淪土著

江湖何處隱天隨根搖頻見三豪崇柯爛難收一局棋  
暫得出遊憂莫寫感君親切慰行詩

長椿寺拜散原先生殯所

蕭寺淒風愴獨來德人泉下夢難回辭春老樹留經院  
過雨殘英委綠苔小立便完仍歲迹幽藏甯掩百年哀  
舊踪何限深明閣刻骨前塵苦未灰

聞娟淨喪妾寄問

投邊歲月苦駸駸相對惟看鬢雪深晚歲著書成噩夢  
多生償債賸傷心還山已分身無望遠世仍嗟崇易侵  
待與煎茶留夜話鱖鱖羈緒再追尋

子安同年自上海寄便面贈詩三首和寄

昏燈老屋宣南集舊味醅醅最不忘  
少日年華真一夢  
兵塵天地永相望翻因高詠生離感  
可笑寒灰守故香  
北爛南焦竟何世與君何處話悲涼

五月十三日情仲約酒集

覆棋一局恨陳陳又見神州涕淚新  
朱味難招空感逝  
白頭相對更何人聊憑煙景消尊酒  
漸密樓臺掩塞塵

鬱鬱久居仍寂寂天迴屈蠖倘能伸

丁巳復辟共事已逝者張忠武梁文

忠袁貞毅王文肅劉文節朱文誠萬果敏陳文忠  
沈乙厂師辜鴻銘梁崧生陳貽重黎露苑諸君

子安同年見予舊京弔散原先生詩越夕夢與散原及

予飲西湖上散原歡悅予憂悴作詩寄示因和  
人天苦樂已分途邂逅何緣入夢俱詩事久應亡日下  
酒痕忍更說西湖分明血淚同幽顯冥漠神交定有無  
歷劫前踪消不盡累君存歿再嗚呼

小圃

小圃宜初夏朝朝翠綠還新涼階似水薄霧樹疑山飽  
飯殘生愧關門一味閒終難聞見滅猶羨石能頑

夢與梅泉同哭蘇堪醒記以詩卽寄梅泉

與君久別會無夢忽夢同君哭海藏違俗膏肓餘涕淚  
彌天意氣付悲涼廿年舊事痕俱埽萬里邊聲夜正長

賸憶誦君詩句好一街月色半林霜

梅泉有句云月淡乍鋪一街水葉乾

猶戰半林霜蘇  
堪時喜誦之

若雪作感舊詩有欲近霜風吹帽節可能無感白衣來  
之句蓋去歲九日余在病中蘇堪強邀作登高之會  
也因次其韻

當時豈意無來歲刻意周旋到不才倍惜流光酬令節  
強攜衰病攬高臺卧聞寒蟀淒淒語仰數昏鴉一一回  
苔碧楓紅秋色裏閉門岑寂更誰來

牽牛花

小女褰簾呼早起披衣小立看牽牛幽娟數朶最宜曉



風露一庭先入秋

浥露層層翠作堆  
迎風澌澌紫霞杯  
小園莫笑秋容淡  
猶賺衰慵一顧來

老來無事獨焚香  
藥裏扶身萬念忘  
連日爲花拋美睡  
一分猶作少年狂

少日看花興最賒  
天香國色費評誇  
五年萬里邊塵眼  
隨分回青到此花

翠蔓迴環抱曲廊  
粉肌含露媚朝陽  
姜郎結習應難讖

老去猶然愛淡妝

白石咏牽牛詩老覺淡妝  
差有味滿身秋露立多時

蘇堪上海所居園中有栝四株李拔可所贈也既來長

春故居斥賣栝還舊主今蘇堪逝世栝亦枯矣拔可  
乃作還栝圖徵題

昔訪海藏居一樓聳孤標庭前四五栝日夕望其高預  
計十年後滿意聽秋濤孤憤積山岳物外寄蕭寥終然  
舍之去將身託行朝世事等博塞呼盧或成梟樓中意  
萬端所期難所遭成敗豈論定孤行一世豪故居既斥  
去還栝亦已凋榮枯皆有情草木真久要我敬李侯意  
微物重雲霄魂魄倘戀此何殊賦大招

長春一畝宅僅容旋馬來差喜數株柳垂陰下覆堦斗  
室數燕集酒半行蒼苔冷月挂高樹相看久徘徊海外

來使星百國窮沿洄歎詫首相室陋隘見此纔引退懷  
舊京意中搆池臺海棠數百株盆列蘭與梅行廚具精  
饌賓客供嘲談心知有難言艱屯鬱風雷津津可喜事  
此意彌可哀彌天蓋世氣阨塞成寒灰惟餘平生意長  
鑄故人懷

伯夔六十壽詩

當代能文章義甯第一手削迹入匡廬與世隔絕久時  
翁年八十往拜有誰某維君蹇然來真氣暖巖岫温温  
子弟色服勤常左右于今薄師門風義庶可救豈惟斯  
文傳真脈在孝友修身貽令名四海仰賢母客語夜稍

深趨入唯恐後孺慕及深慈目中未曾有自嬰風木悲  
碩腹俄損瘦推讓及羣季周恤遍親媾時交尙意氣握  
手肝肺剖反面或下石創甚柳州柳惟君久益親相看  
進于舊經年更患難鬢髮已老叟但深孤露悲豈效庚  
申守願君葆康強特爲親故厚能爲義甯文並齊義甯  
壽質直無飾辭聊用當春酒

嵩儒辭官索詩爲別

朝年江漢觀新政臨老邊關見朔風回首與君同一夢  
索然相對各成翁事前結局誰能料悟後初心漸已空  
得間息機歸去好古人高蹈豈能同

東坡生日約治薊茗雪嵩儒鯉門曼多酒集鯉門詩先  
成以公在儋耳時歲爲戊寅今歷十五甲子矣持較  
身世婉而多諷予亦繼作

坡詩絕千古最勝屬過嶺皮膚剝落盡意外出妙境阨  
塞極生前臍蠻乃彌永當時歲在寅儋州方遠屏甲子  
十五周逢辰薦果茗今昔較異同身世殊寬窘劉侯妙  
語言蘊藉若深幸古人處憂患如玉試火猛攜手葛與  
陶心光何炯炯居屯不得力我輩可歎憫長腰米撐腸  
闕領衣蓋癭細和淵明詩差勝持十忍

紅梅二絕

凍萼微舒色正丹十年小別見偏難却防火迫花開了  
特減熏籠忍薄寒

幽香妙色淨埃塵孤潔誰知第一春細數羣芳無比儼  
見梅始信有天人

除夕

南朔東西一念中停杯兀對蠟燈紅自從分散無消息  
飛去安能苦樂同

子安同年六十壽

昔游抱冰門文武盛才傑畫餅或致嘲眞士固難得相  
人秘訣公有言謂有心思能筆墨六十人中最少年燕

許奇賞揚盈川茶囊獨爲大年設詩事每稱公濟賢機  
要往復畫牘尾我昔伴君同進止五更霜月氣清嚴回  
憶蒼髯眞夢耳高才見忌終補外匡廬宮亭歸管內運  
斤成風難爲質卿與桓温豈並世晚狎湖海希冥鴻當  
年慘綠各成翁昏燈老屋車脫轄舊京冷話何時同富  
貴由來草頭露獨負張公深感遇會須南北重合并相  
訪醉翁行樂處

十年以來日習寸楷未嘗間斷所用筆以邵芝巖紫毫  
長穎中楷爲佳自兵事起筆坊被毀無可覓購詢先  
七弟來書云覓得三枝喜極長句報之

我性散漫稱拙書晚歲收心聊自課非能主敬非要好  
略等抄胥做閒惰厚重純密愛紫頰狼鬣輕悍羊毳軟  
浙工首舉邵芝巖壓倒京師戴月軒與賀蓮青舊得乾

隆內製毫珍藏未敢凡墨澆堅強不鈍順不剽得心應  
手餘地破形式精微得二三差推邵氏能彷彿作年來做  
禿動盈束伏几長賓駒影過異國兵鋒掃地來筆工星  
散坊灰堞收合餘材強充役白日昏昏倦欲卧今君爲  
我竟搜得鵝毛千里真奇貨從茲滿意弄窗光聊破枯  
禪駱駝坐

荒鴉



曲曲蘭房密密局紅燈依黯月朧明覺來一枕年時影  
啼入荒鴉三兩聲

讀劍南集悲其壯志不遂篤老窮困然平生遇合亦有  
不可及者爲作二詩

常分僧米蕢村醪八十衰翁飯一瓢不諱貧愁終得力  
強爲壯語益無聊魂傷未作稽山土夢遠猶依萬里橋  
細校平生蕭瑟甚示兒遺恨尙難消

第一文章薦鎖廳筆端迴斡動宮廷傳詩突過曾吉父  
學道還親朱考亭密好誠齋能抗手居停待制與忘形  
非常遇合都堪羨豈必乘時帶萬釘

有人贈牡丹一盆以避寒不見日光開後極似芙蓉爲

作一絕

深避寒威一室幽春陽雖好見應愁如何第一東風眷  
却似芙蓉泣素秋

惜仲招飲有詩次韻

殘局難爭一著疏袖觀柯爛欲何如自憐廢籍瀕奄忽  
還與乾端共慘舒舊國遺芳縈斷夢故人斗酒慰幽居  
樽開北海容私釀閉置差強范粲車

茗雪手抄蘇詩數卷屬題

春夢驚回夜未央百年回首牘淒涼干搖萬兀成何事

差覺抄詩意味長

退筆成邱紙萬張老來事業未荒唐卷中字字華嚴界  
防詫兒童夜放光

請假往舊京茗雪贈別次韻

報主無成只自嗟還容疏放澤頻加尋春久冷春明  
夢訪舊惟餘舊識花痼疾未除甯免累去來差好是無  
家相期重續城南會載酒閒停野寺車

時茗雪亦  
將歸視

哭澄姪

昔喪少子淮萬境變蕭索一日未暫忘廿載事猶昨今  
喪吾姪澄老懷彌作惡淮也有兩兄澄惟兩妹弱子季

篤厚人一子胡竟奪世難傷哉貧資生極菲薄一飯未  
嘗飽黽勉仍赴學斗室聚族居長夏赤日灼豈能免疾  
病況復少珍藥相攻劇刀箭孰云貧可樂我今居塞外  
三伏卻絺葛嬰稚食兼盞相較實裕綽所愧兄弟親不  
往共飢渴急難莫相恤萬里悲契闊子昔母深憐甯忍  
罹此酷向來惟疾憂諒不隔冥漠勿戚在天靈保身防  
鬱悶我素持金經生心無住著雖云妄塞悲聊復資解  
脫願子此迴向一解生死縛

焚香

回首人閒一夢涼老來功課只焚香好花供養如天女

斗室廻旋卽道場  
歸宿未忘水香地  
飄零愁注漢宮方  
博山寸寸灰難燕  
終古空存是願王

閉門

灰冷何心問歲華  
閉門寂寞自生涯  
偶同靜趣忘形侶  
長伴幽居妙色花  
晚食芳甘參稚筍  
遠書珍重寄新茶  
西冷消夏年時味  
漫與氈鄉較等差

牽牛花

步步軒廊翠蔓牽  
閉門生事只蕭然  
秋來未覺淒涼甚  
更與牽牛伴一年

相宣五色炫晨光  
豆架瓜棚共作場  
一例當風相嫵媚

不知齊魯有姬姜

一枝顏色費評誇  
冷翠光中暈淡霞  
絕世幽情容一現  
能如我意是秋花

千畦萬隴付驕陽  
小院呼童汲甕忙  
堪笑書生說宏濟  
惟餘一漑到幽芳

雪青衫子綺羅新一晌  
當前色相眞袖薄天寒無限意  
至今猶憶淡妝人

亭亭美箭欲開遲  
秀出羣芳聖得知  
滿地蟲聲殘月裏  
秋心如許語將誰

雨中摧抑更淒清  
擁髻愁姿倍有情  
黛色脂光看不定

最宜侵曉未分明

團蒲曲几動淒馨  
遲慕何心鬪尹邢  
小破枯禪曾不懺  
從渠一念幾千齡

相看動是隔年期  
立盡銀河欲沒時  
不負九秋風露冷  
彌天幽怨一花持

綠陰陰地鬱芬芳  
落月淒迷映屋梁  
短夢人間香未滅  
高花枝上露何涼

浮生恩怨苦難休  
憎莧彈蕉故事稠  
荆棘未忘蘇玉局  
忍將尋約坐牽牛

光華妙似帝青寶  
身世略同優鉢曇  
萬相莊嚴一彈指

請君迴向此中參

牽牛花中雪青一種幽冶絕世日開一花閒居無俚若  
相慰藉者爲賦一詩

慘絕人間世衰餘藥裹身不妨秋氣冽猶及晚芳新病  
葉邀寒雨幽花屬恨人娟然共遲暮採擷莫辭頻

堪歎

沈沈一綠罨窗紗落角銀河影半斜夜起慣看四更月  
老來偏愛九秋花清涼況味人誰覺收斂心情晚未差  
堪歎觸蠻同一盡殘蟄霸穴尙爭譁

夢見劉樸生丈謂到庚年有事樸丈逝世已二十餘年



久不入夢醒後凄然有作

當時大念各相期積慘并州世久辭物外早消全體熱  
夢中還作有情癡五銖符讖雖當復一髮關天劇可危  
屈指上章來歲是死灰殘局欲何爲

夜起看牽牛花寒氣凜然不可久立慨然有作

太白耿殘輝孤月隱雲端雞聲四野起獨袂一何寒蟋  
蟀動微吟欲咽意已闌一身餘死灰魂影依欄干蒼茫  
萬古去逝者孰控搏人道旣永息何者爲坤乾還歸入  
室坐孤花對洩瀾

竄身萬餘里腐心三十秋畢竟何所得閒卉相綢繆號

賦震往來大合成一邱魂斷故山墟目極滔天流非族  
心必異況爲烏鵲鶴但求隆二伯不問黨與讐我今復  
異此厄甚劉并州

寒節已至牽牛花猶有開者

八月邊庭霧幕單十分月色不曾看花前猶自忘遲暮  
事退何心怨早寒朝日遙憐鴉影淡戰風漸覺葉聲乾  
衰頹未得無生忍可笑將心何處安

詠懷二首

漢高歌大風雄氣雲飛揚武帝塞瓠子放歌亦蒼涼高  
歡攻玉壁士卒多死喪勢窮解圍去悲感涕泗滂斛律

勅勒歌聲情何慨慷千古絕妙詞風低見牛羊古來梟  
傑士成敗皆非常奄奄無生氣蝮志誠可傷

宇文奮西魏實惟割據才邂逅得令綽專任無疑猜不  
幸棄中道雄圖遂不諧治喪崇儉素恐與夙志乖惟君  
知我意惟我知君懷送葬申一言失聲聲已哀偏局誼  
尙爾大業當何哉

伯夔挽詩三首

交久晚彌真意多緣乃促人事輕隔離萬劫不可贖排  
排散原翁碩果此尊宿温燁吾與子期約歲相續北南  
會舊京歡笑洗慘黷頗疑天壤間嘉會惟此獨絕續勉

相保俄驚壞梁木苦思尋舊踪執手同一哭豈意旋哭  
君相偪乃爾酷殘生尙未盡生意先結束兩心閉所期  
胡君遂瞑目

賢豪昔辟地德星聚海角創局古所無十年風掃籜維  
子守師傳斯文有付託同心得二三濡响不寂寞飛書  
邀我南頻繁情意懇昔負疆村翁今復爽子約温温舊  
遊地寤寐餘作惡方知少一人世味成淡薄踽踽任君

任與梅梅泉書問淚同落

餽口念予季狷介少往還課餘獨詣君時倚破蕭閒書  
來屢告我緩急最相關今無談走處何以開心顏維君

篤天性無間昆弟言至情結友生迴思逾成妍殷勤特  
予厚曠世垂恩緣千秋身後事寂寞誰爲傳  
將往舊京感作

欲出遨遊散鬱伊却愁惘惘與誰期老來世宙異年少  
夢裏天親多醒時下溪寡歡連夕飲西郊遣興願春遲  
古人雖說窮愁極落漠猶殊此日悲

崇效寺看牡丹並觀紅杏青松圖卷自辛亥後越二十  
九年復來此寺不勝淒感

西山只作傷心碧野寺還開照殿紅誰識花前舊年少  
愁看鬢底百春風諸天帝釋終爲漏一念冤親未易空

春山詩卷一  
三二  
松杏依然圖畫在往車來軫豈能同

遺芳重見廿年遲淒冷心情只自知未惜命酬傾國色  
應憐才盡送春詩池經凝碧仍絃管殿入披香亂絮絲  
一世荒嬉成溺笑何人癡絕望佳期

書杜集後

狼狽國風手飄飄黃屋憂致君終不遂爲客竟長休衣  
鉢三宗在江河萬古流神方誰檢得撼樹任蚍蜉

小立

陰陰涼翠掩軒楹小立方知露氣清斜月半庭花半吐  
一蟲滿意作秋聲

九日約愔仲說餅

無邊落木氣蕭騷深擁熏鑪怯緼袍風物淒清宜說餅  
心情寥落敢題糕相看且喜芳尊滿求祓曾無藕孔逃  
把菊胡床惟一醉方知栗里是人豪

毅夫同年挽詩

梁傅堂堂後斯人重海南名垂朱鳥影心託杜鵑盦事

往披遺疏情深積寸函後中傷敝席惘惘豈能甘

宣統實錄

載君辛亥所上封事極切直 曩歲子由滬北征君賸  
百元堅辭未受乃託附書愔仲抵京偶忘之後一年忽  
于故紙中見此書發視乃幣百元  
在焉蓋欲假手培仲期子必受也

予謚昭臣節書官限本朝向隅靈可慰齋志恨難消危

涕乘衰暮同心委  
沈寥兵塵昏嶺表  
慘淡若爲招  
次韻惜仲同年除夕

徑絕人踪雪塞廬  
殘年飽飯愧閒居  
誠知歲歲都非故  
只見朝朝有不如  
饗賜羸秦天醉甚  
逃誅汪罔亂生初  
九州鐵鑄成今日  
自撥寒灰恨有餘

十四歲除夕有句云  
詩成兩歲乘除裏  
春在萬家歡喜  
中先師關季華先生  
極爲歎賞以爲他日  
立朝事業  
所在也今老矣一無  
所成感賦一絕

詩成兩歲乘除裏  
春在萬家歡喜中  
回首髫年真是夢  
雪燈影裏一衰翁



次韻惜仲元旦

櫪馬無暄少盍簪會朝佳竹喜先吟紀恩獨感平生遇  
占復猶存正始心天步艱難無遜位臣絃危苦是商音  
王正免賦康乾夢換世難酬雨露深

寄懷立之

中興國故味醺醺肝膽無如周息庵維摩獨爲眾生病  
魯直誰同連夜談舊苑羶腥惹花木西山鋒鏑暖煙嵐  
何時暫息閻浮劫去與彌陀共結龕

寄懷子安同年

錦瑟華年逝莫追蓬萊路隔悵差池散仙鸞鳳虛鞭策

藏壁金絲費護持妍暖同行紅雨地蕭閒並坐白雲司  
論都賓主垂垂盡絕世幽情却語誰

思念伯夔不已因寄懷君任梅泉各一首

霸才沈寂無王猛豪氣摧殘老計東友似傾城難再得  
士當負俗分奇窮燕鶯絃上百千語桃李尊前一再風  
潑眼春光渾似夢行吟惘惘與誰同

君任 計甫草以  
王景略自負君任

亦  
然

獨立曾無想孤踪亦可哀故人俄異路老淚滴寒灰道  
喪文安託名逃世尙猜誰知仲長統雄志鬱雄才

梅泉

丁卯之歲予病甚陟甫約遊鄮山阿育王寺一日晚坐

山門外萬念俱忘恍然若有以無得爲得也別經廿  
載世變不可言感念不已因寄懷陟甫一首

僧堂晚出坐松根梵寂鐘殘淨客魂當日忘言兩居士  
只今牽夢一山門舊遊回味真難再末劫深臨倘有存  
終擬入山尋宿約塔前勤禮佛慈恩

書憤

不自我先後神州末劫來人爲普同塔地卽一堆灰歷  
歷昭戎首沈沈積禍胎斯須留眼在天網豈恢恢

傷心鷓蚌久相持敗類誰吟芮伯詩妖鳥有聲愁滴血  
角端無語警還師不妨殘局支青骨但痛神州化赤眉

千古強梁遺轍在滔天自孽豈能追

梅泉寄近詩來有閉門只合死前休之句悲其孤憤寄

懷二首

曠代誰知己真才匪斗量只緣詩愈好遂與世相忘無  
競仍逢嫉純真或誤狂悠悠從滿目柴立獨中央

情豈生前見交從別後深冰霜何慘烈魂夢與蕭森藥  
老惟遮眼涪翁悟死心言休休未得猶復此孤吟

梅

獨犯巫閭雪來銷楚國魂乍看夢相似一笑格猶存縹  
緲青霞意淒涼舊月痕分明來去跡應感后皇恩

每日入宮內府教宗室子弟感賦

朝朝適館五雲間恰似參堂歲月閒  
法駕鉤陳生淨理丹垣碧樹想仙山  
許身稷契原虛語託迹衰推亦強顏  
哀樂此心猶未死窮通於世已無關

庚辰三月至舊京下榻治薌齋中窗前藤花一架極盛  
如海春花懶去尋傷心極目怯登臨  
竭來自笑何聞見成就藤蘿一架陰

四月出關道中感賦

次第看花已作塵出關煙景似初春  
東風又綠先疇土血染誰哀讓畔人

去歲牽牛花雪青一種今秋復發

一箭比瓊華娟娟涼露斜窺庭惟皓月貽佩是青霞往  
事沈沈去新怱念念差相思得相見猶有去年花

向夕巡籬落侵晨汲井華微添經外課不斷佛前花曉  
夢連淒豔鑪煙擁翠霞未須託禪悅冷淡足生涯

長是無人見惟餘殘月斜新承九秋露出浴五更花浙  
瀝輕寒襲淒迷宿霧遮霎時最清絕寂寂未啼鴉

衰白餘生事沈冥遣有涯無心呈妙色破涕向幽花自  
識優曇瑞甯爲大耋嗟秋光散庭宇眞作野人家

次韻鯉門

日對秋芳灌小園漸於人世隔悲歡不妨雞雍時爲帝  
却笑蛙聲亦屬官畫裏溪山無恙在吟邊鷗鷺久盟寒  
華子歲晚期無負香几瓶花次第安

梅泉九日登高觴客懷伯夔賦詩寄示有四海彌天少  
一人之句次韻

愁見萸囊繫臂辰蕭寥孤抱與誰親中央周角無淨土  
北斗以南還幾人積慘暫歡求豈得枯鱗相响迹俱陳  
郢人今後何爲質四海彌天一聚塵

時防疫人皆以  
囊繫口鼻間

書梅泉今覺盦詩集後二首

散原醲粹太夷嶢兼至重看今覺盦振古才難天不惜

百年心死味猶諳有涯何苦殉哀樂相望幾時同笑談  
動地邊風淒欲絕尙叱無寐倚詩函

冷暖由來只自知人間怪好未妨齊傷春有鳥惟啼血  
飲酒何人解到臍滅性勞生言至痛香爐古廟去仍迷  
平生風義陳袁鄭只與樊南作淚題

梅泉重貲助刊拙集感賦

蛛絲枯几度年年息壤沈沈墮杳然廷秀立朝餘結局  
致堯留命豈符天無成甘以詩人見憎命猶爲我輩憐  
佳處何由望端叔幸同坡句一時編

十月廿三日夜夢節齋師來長春寓一小園中往謁語



次涕泗橫集嗚咽而醒紀之以詩

聞說高軒駐小園急趨相見意難溫  
欲言石闕仍銜口苦戀修門應愴魂  
家國萬端償一淚君臣孤注博沈寃  
他年史筆誰能諒豐鎬遺黎倘有存

得梅泉書感賦

鬱鬱閒居已寡歡書來悵悵更無端  
難言深恨空餘淚強命詩人意已闌  
世棄君平還自棄化觀康節竟何觀  
壁枯枝化渾閒事只是難灰徑寸肝

俛俛

俛俛兀兀是家常虐雪饕風夜正長  
慣少睡眠仍點茗

了無知見獨焚香擔尋榔櫪心猶在井渫寒泉意已涼  
傳舍蕭頽魚少水不應歸路尙茫茫

悲涼

不會蕭瑟歎平生絕世悲涼亦可驚時至則行原不悖  
死而後已竟何成冬郎解笑東方朔漢武能知馬長卿  
漫效實齋書感遇負恩深處涕先傾

閉口

年來閉口廢吟呻竹罄辭窮但受辛小乘固應無實語  
昌期端合有真人枯枿柯爛餘殘劫本願香寒懺宿因  
占謝靈氛忍終古回風悲煞楚靈均

昔吾曾王父秋舫公當嘉道之際以廷試第一人官  
京朝名所居曰簡學齋值國家承平所爲詩雍容和雅  
名重公卿間承學之士無不知簡學齋詩者已而歛黜  
才華篤志於學詩境一變深思古抱世或不能盡知也  
純德早世著述未竟僅以詩傳而已逮王父小舫公居  
諫垣拾遺補闕彈劾權倖無所迴避直聲震朝野逝世  
以後吾父家居未仕至伯兄始復以進士官京曹當光  
緒末年朝列風氣已遠非昔比不數載遂遘黍離之痛  
自是以來二十餘年流離轉徙歷古人未經之奇變生  
平志事百不一酬而繁冤極憤鬱結佗僚幽憂之情乃

一寓之於詩蓋上距殿撰公官京朝時甫踰百年而陵  
谷遷異心境懸絕若相隔億萬年以外吾每取簡學齋  
詩與兄詩並讀之家國身世之感何如耶殿撰公嘗著  
詩比興箋謂讀古人之詩當考其時世觀其際遇以意  
逆志而得其比興微旨之所在故居千百世以下箋注  
千百世以上之作使古人難言之隱躍然楮墨之間焉  
且誦詩論世以知人者因其世變以知其人之志所之  
而卽因其人之志以知其世變之眞二者交相明也古  
之遭亂世而工於言者無過于少陵然少陵猶處於局  
外惟韓冬郎陳簡齋身在局中故其形於詩者尤爲痛

深而志隱兄所處視韓陳際遇尤過之而其所經之艱  
厄亦非古人所有者苟以是讀兄之詩則其所繫於世  
亦已重矣夫居今日而視嘉道盛時誠邈然其不相接  
然襟抱之所存流風之所被根於性靈貞於學術一脈  
相傳而未替者猶是志也然則兄詩之於簡學齋雖正  
變不同而淵源固有所自也歟蒼虬詩集刊刻將竣因  
書此跋示後輩子孫庶永念吾家世澤而動其興感云  
爾戊寅冬十一月曾矩識於長春之寓廬



跋

姻丈陳仁先先生詩名被海內久矣二十年前江甯蔣蘇厂曾以先生乙巳至辛酉詩稿三卷用聚珍版印行於滬其後先生嗣君邦榮復增錄先生辛酉以後詩合九卷排印小字本於天津願皆有譌脫未臻完善歲丁丑先生年既六十朋輩釀資謀爲雕版傳久遠先生乃取積年存稿覆加整比益以近作次爲蒼虬閣詩集十卷由舊京文楷齋寫定授刊國松故夙愛重先生詩者又躬與檢校之役既樂觀成因識其末庚辰中秋合肥李國松書於沾上肥遂廬





髻齡隨 先君旅寓舊京賃廬西城宣武門內太平湖  
宅故醇王舊邸面有湖地遂以名右傍郭而左有右橋  
通市 蒼虬年丈居區橋斜巷兩家相去甚近夏夜嘗  
衣葛製兩截衫隨 先君踏月至 文家未久 文移  
家杭州於蘇堤營小築榜曰陳莊歲時北上輒館余家  
宅故軒敞舊饒園亭之勝自德宗入承天統潛邸封置  
及余家移寓其中因重加修葺閱麗非復舊觀池館尚  
多幽致是時 先君勤躬內典攝徒世緣不復措意於  
文字之事交好中如宋芝田伯魯張董齋元奇王晉卿  
樹柙成浚庵多祿諸文強 先君結詩社觴詠園中而

文又遠來結習益雍逮捐 文嘗於齋中作秋齋夜話  
圖諸老聯句胡惜仲嗣璦年文以細楷書其端以圖後  
二十年尚懸之齋中故憶其句云老柳蕭疎故即秋迴  
燈深館益淹留為添畫意翻詩卷欲助談鋒瀉茗甌照  
眼殘山涼入夢堆骨野史慣言愁羈鳥明月心千里望  
裏杭州又鄂州 先君集中有壽 文五言古風前有  
小序云八月十一日為蒼乳居士生居士生後予四年  
而先予二日於先居士任世四十有二年矣既主余家  
乃治齋為壽賦詩索和由 先君之年推計是民國八  
年己未後歲壬戌重九 先君以波月生疎柳為韻增

諸兄賦詩有佳句  
又輒賜詩寵之  
節方八齡睹狀心  
竊嚮慕苦吟詩句  
又賜詩有吟詩老鳳驚雛鳳把筆  
義之視獻之玉句以為雙挹  
先君曾有和作詩載集  
中後二十餘年歲戊子旅宦南都聞  
文來寓周君亮  
兄宅中亟往伸敬嘗侍坐於清涼山掃葉樓陳文病樹  
陳君誦洛林君名宣同遊  
又以張南皮金陵雜詩獨  
喜清涼名實好今勅賦詩是歲重九復應李拔可詩老  
之約為登高詩諸什均收入碩果亭重九詩集中  
節曾  
獻詩  
又賜和什墨蹟尚存行篋中句云新詩能挽古  
風回刻意陰何撥燼灰  
顧我衰踪如井廢喜句佳句詩

心開澆愁已斷樽中酒望遠慵登江上台獨憶舊京佳  
會地登樓誰識仲宣哀未久哲嗣英三兄奉職部曹奉  
老人移家金陵寓此隣近得時親杖履其時年逾七十  
止酒如素精神尚健己丑冬節隨以府南下廣州詣  
又辭行 文以業頭蒼虬潛詩集見賜中有老人奉酒  
眉註珍重携持隨以入台在廣州得英三滬上書言由  
京五滬時兵亂中行李書籍俱失後屢轉聞老人下世  
之訊追御前徽跡切山顏之感令此集之詩僅存寥寥非  
數耶 文以光緒壬寅鄉舉聯捷成進士集選監察御史  
史事矣之時年甫三十四隱居不出有逸少之稱 曾

祖殿撰公太初先生有簡學齋集行世 尊人子青太  
年文 妣氏周太夫人均能書 太年文書學鍾王  
太夫人夙嗜老米尤善榜書南北各大禪林大雄寶殿  
題額多出 太夫人之章即署名陳周保珊者是也  
文於書法夙喜楊凝式而精妍似不能以一家概之其  
清節高名並世大雅耳熟能詳文學造詣非末學可得  
管涔萬一詩集早曾印行茲集晚出其中沙汰已多後  
十餘年所作皆未收入與 先君唱和之作集中僅存  
三首其駢散文聯語均未印行又有舊月移詞不知能  
免素灰否念三增喟茲記此集由來因略述景仰之私

如此

丁巳夏年姪江夏王開印敬識